


UNIVERSITY OF EDUCATION, WINNEBA

MBEBUSEM A OFA MFANTSE EKUAYE HO MPENSAMPENSAMU



2021

UNIVERSITY OF EDUCATION, WINNEBA

MBĔBUSEM A ƆFA MFANTSE EKUAYĔ HO MPĔNSAMPĔNSAMU

STEPHEN ESSEL

(200011671)

Nhwehwemu dwumadzi a medze ama esuapɔn yi ne fa a ɔhwɛ kasa ho adzesua do ne fa a ɔhwɛ Akan-Ndzema kansasua a ɔwɔ Simpa esuapɔn mu. Medze ama esuapɔn yi mu “School of Graduate Studies” so.

**Oyi bɛka ho bi ma esuapɔn no ama me
“Master of Philosophy”
(Ghanaian Language Studies-Mfantse) abɔdzin**

AYĔWOHO, 2021

PAEMUKA

OSUANYI NE PAEMUKA

Emi, Essel, Stephen paa mu ka de dem nhwehwemu yi, iyi nkorofu nhwehwemu a oaye no dada a musuaa biribi fii mu a mada no edzi dada a, dza aka nyinara ye mara m'edwuma a memmae nkegyee abodzin biara wo beebiara pen.

Odabaa:

Da:

OHWEDOFO NE PAEMUKA


Meka to gua de ofitsi dwumadzi yi n'ahyese kesi n'ewiei ye dza marankasa medze nhyehyee a wodze hwe nhwehwemu dwuma a otse dem do a ofi University of Education, Winneba, hwee.

Ohwedofu:

PROF. CHARLES OWU-EWIE

Odabaa:

Da:



DZINTO

Moto nhwehwemu yi dzin dze hye me mba, Desmond Nana Darko Essel, Christian Nana

Damfo Essel na Naa Darkowa Ama Essel (ND³) enyimnyam.




NDAASE

Me ndaase a odzi kan kɔ ma Otumfo Nyankopɔn a ɔmaa me nyimdzee na ahoɔden ma metum dze edzi dem dwuma yi. Medze ndaase soronko so ma mo hwɛdofo, Profesa Charles Owu-Ewie wɔ ahofama na adagyɛr a onyae maa me wɔ nhwehwɛmu yi ne nyɛ ho. M'enyi sɔ n'adwenkyere, ne ntsentseneɛ na n'abotar a onyae wɔ dwumadzi yi ho. Nyankopɔn nyɛ wo bambɔfo na kwankyerefo.

Medze ndaase soroko ma m'awofo a woɛnya hɔn sor frɛ, Evangelist Joseph Kweku Essel na Owurayer Grace Essel wɔ mbɔden a wɔabɔ no wɔ m'adzesua ho. Nyame mfa hɔn akra nsie yie.

M'enyi sɔ ndwuma pa a akyerɛkyerefo a wɔwɔ Akan-Nzema Education Department yɛɛ. Mo werɛ nnkefir Owura Emanuel Tetteh na Okunyin Kwesi Adomako wɔ hɔn mboa na ntsentseneɛ a wɔdze maa me ho.



Me ndaase a otwa tun kɔ ma ebusuafo na anyɛnkofo a wɔboaa me akwanhorow do wɔ dwuma yi ne ndzii mu, nkankaara Daniel Essel, Emmanuel Kwesi Turkson, Salifu Adul-Bachi, Timothy Eshun, Diana Akyampong, Silvia Dovor, Cynthia Ocran na George Asante. Meda edwumayɛfo a wɔwɔ Too Sweet Washing Bay, Spot and Restaurant a ɔwɔ Baifikrom na 2019/2020 MPhil esuafo a wɔwɔ University of Education, Winneba, Ajumako Campus nyinara so ase.

DZA ƆWƆ MU

Paemuka	iii
Dzinto	iv
Ndaase	v
Dza ƆwƆ mu	vi
Nhenmu	xi
TSIR KOR: DWUMADZI NO NE NYIENYIM	1
1.0 Nyienyim	1
1.1 Nhwehwemu no ne ngyinado	1
1.2 Ɔhaw no	4
1.3 Nhwehwemu yi no botae	6
1.4 Nhwehwemu yi ho nsembisa	6
1.5 Nhwehwemu yi ho mfaso	6
1.6 Nhwehwemu yi ho akwansiwdze	7
1.7 Bea a nhwehwemu yi pem	7
1.8 Dwumadzi yi ne nhyehyee	8
1.9 Tɔfabɔ	9
TSIR EBIEN: ENYIMDZEFO BI ADWENKYERE	10
2.0 Nyienyim	10
2.1 Mfantsekasa no	10
2.4 Bɛ asekyere	11
2.5 Bɛ ne farbae	13
2.6 Akanfo bɛ no su	15

2.7 Bɛ nhyehyɛɛ	18
2.7.1 Nkakuho na nsido	18
2.7.2 Akan mɛ a ɔyɛ asentɔw tsiaba	19
2.7.3 Akan mɛ a ɔyɛ asentɔw tsentsen	20
2.7.4 Mɛ a ɔwɔ ngyegyee su	22
2.7.5 Mɛ a ɔyɛ asentɔw mbɔho	22
2.8 Kasasu a ɔda edzi wɔ Akan mɛ mu	23
2.8.1 Akan mɛ a ɔyɛ ngyinahɔma	24
2.8.2 Akan mɛ a ɔyɛ ntotohosem	24
2.8.3 Akan mɛ a ɔyɛ se-nyimpa	25
2.8.4 Akan mɛ a ɔda nokwasem edzi	25
2.8.5 Akan mɛ a ɔyɛ enyido-ebirabɔsem	26
2.8.6 Akan mɛ a ɔyɛ ebirabɔsem	26
2.9 Akanfo mɛ mu nsentsitsir mu bi	27
2.9.1 Ahendzi na tumdzi	27
2.9.2 Edwumadzen mu wɔ akatua	28
2.9.3 Edwumaye	29
2.10 Dwumadzi a ɔfa dza enyimdzefo akyerew dada a ɔnye dwumadzi yi wɔ twaka wɔ kasa a ɔnnye Akan kasa mu	29
2.11 Dwumadzi a ɔfa dza enyimdzefo akyerew dada a ɔnye dwumadzi yi wɔ twaka wɔ Akan kasa mu	41
2.12 Adwenmusem ho akwankyere: ‘Conceptual Metaphor’ Adwenmusem	43
2.13 ɔfa yi no tɔfabɔ	46

TSIR EBIASA: NHWEHWEMU AKWAN	47
3.0 Nyienyim	47
3.1 Nhwehwemu no su	47
3.2 Nyimpa a menye hɔn dzi dwuma yi	49
3.3 Nyimpa pɔtsee a medze hɔn dzi dwuma yi	49
3.4 Nyiyimu akwan	50
3.5 Beebi a minyaa mboanosem no fii	51
3.5.1 Kwan a mefaa do nyaa mboanosem no	52
3.5.2 Nwoma	52
3.5.3 Mara me nyimdzee de meye Mfantsenyi	53
3.7 Akwansere	53
3.8 Kwan a mefaa do pensapensaa mboanosem no mu	54
3.8 ɔfa no no tɔfabɔ	55
TSIR ANAN: DWUMADZI NO NE MPENSAMPENSAMU	56
4.0 Nyienyim	56
4.1 Mbe a ɔfa Mfantse Ekuaye ho	56
4.1.1 Mbebusem a ɔfa asaase noara ho	57
4.1.2 Mbebusem a ɔfa kwa no ndɔwee na asaase no do nsiesie ho	70
4.1.3 Mbebusem a ɔfa aba no nduae anaa aba no ngui ho	83
4.1.4 Mbebusem a ɔfa ekuadwuma mu otwaber ho	91
4.1.5 Mbebusem a Mfantsefo dze dzi dwuma a ɔfa ekuadze no ntɔnee ho	101
4.2 Nsentsitsir a ɔda edzi wɔ Mfantse mbebusem a ɔfa ekuafɔ ho mu	110
4.2.1 Edwumadzen ne nyee	110

4.2.2 Dzenhye	110
4.2.3 Abotar	111
4.2.4 Enyidosi	111
4.2.5 Edwumadzen	112
4.2.6 Onuado	112
4.2.7 Owuraye/ɔdzedzeho	113
4.2.8 ɔbra mu adandan	113
4.2.9 Nsonsonce	113
4.2.10 Ndaase	114
4.2.11 Korye	114
4.2.12 Ahobambo	115
4.2.13 Nyinii	115
4.2.14 Mfaso	116
4.3 Kasasu ahorow a ɔda edzi wɔ Mfantse ekuaye ho mbe mu	116
4.3.1 Ntotoho	116
4.3.2 Sɛ-nyimpa	117
4.3.3 Nsawɔwdo	118
4.3.4 Nkɔnsonante ntoatoado	119
4.3.5 Enyihaahaa	120
4.4 ɔfa yi no tɔfabɔ	121



TSIR ENUM: EWIEI: TɔFABɔ NA ADWENKYERɛ	121
5.0 Nyienyim	121
5.1 Dwumadzi yi no tɔfabɔ	121
5.2 Dza nhwehwemu dwumadzi yi dze to gua	123
5.3 Adwenkyerɛ	125
5.4 Tɔfabɔ	125
MBOAYɛ MBUUKUU	126
NKEKAHO A	131
Nsembisa bi a medze boaa mboanosem no ne nhwehwɛe no	131
NKEKAHO B	132
Mbɛbusem bi a ɔda edzi wɔ nhwehwemu yi mu	132



NHĒNMU

Nhwehwemu yi pensapensa mbebusem a ofa Mfantse a aka Kwa kasakuw a woka no wo Mfinimfin Mantow mu ekuafɔ ho a adze Conceptual Metaphor Theory pia mpensampensamu no ekyir. Nhwehwemu yi pensapensa mbebusem a Mfantse ekuafɔ dze dzi dwuma wo hon kuaye mu, nsentsitsir a oda edzi wo mu na kasasu a oda edzi wo mbebusem no mu. Minyaa mboanosem no nyinara fii praemri na sekendri. Prarmri dze no menam nkombotwetwe a menye me nsenyianofo no twetwee na mara me nyimdze de meye Mfantsenyi a meka Mfantse kasa do. Sekendri mboanosem no so minyae fii mbuukuu ahorow mu. Nhwehwemu yi da no edzi de Mfantsefo ekuafɔ wo mbebusem a ofa ekuaye ho; fitsi asaase do nsiesie, ekuadze no nduae, eduadzewa no ndowho, otwaber na no ntonee mu. Mboanosem no da no edzi de dem mbebusem yi da Mfantsefo adwenmusem a wowo no wo ekuaye ho edzi. Nsentsitsir a oda edzi wo mu no bi nye abotar, edwumadzen, owuraye, nkaɔmu na dza aka ho. Kasasu ahorow a oda edzi wo dem mbebusem yi mu bi nye nsawodo, se-nyimpa, ntotoho, na adze. Nhwehwemu yi hwehwe de no nhunmu no boboa dze nyimdze aka nyimdze a wo wiadze mfendzenan nyinara mbebusem ho.



TSIR KOR

DWUMADZI NO NE NYIENYIM

1.0 Nyienyim

Nhwehwemu dwumadzi yi fa mbe a Mfantsefo ekuafɔ a wɔwɔ Ghana ne Mfinimfin Mantɔw mu dze dzi dwuma wɔ ekuadwuma mu. Nhwehwemu yi hwehwe mbe pɔtsee a Mfantsefo ekuafɔ dze dzi dwuma wɔ hɔn dwumadzi mu, kasasu na nsentsitsir a ɔda edzi wɔ mbe no mu na mbe no ho mfaso ma abaeɔfor Mfantsefo ekuafɔ. Dem fa yi bɔhwe nyienyim, nhwehwemu no ne ngyinado, ɔhaw no, nhwehwemu yi no botae, nhwehwemu yi ho nsembisa, nhwehwemu yi ho mfaso, bea a nhwehwemu yi pem, nhwehwemu yi ho haw/akwansiwdze, nhwehwemu yi ne nhyehyee na ɔfa yi no tɔfabɔ.

1.1 Nhwehwemu no ne ngyinado

Kasa ye ɔdomankoma akyedze a ho hia yie wɔ nyimpakuw biara mu. Kasa gu mu ahorow; yewɔ dza yedze ano a yetse no wɔ hen asowa mu nna dza a ɔye nsenkyeredze a yedze hen enyi ho a ɔma hen ntseasee. Crystal (1990) de mbre ɔda edzi wɔ Wonkyi (2016) mu no da no edzi de kasa ye ndze, nsenkyeredze anaa mpo akyerew nhyehyee a wɔahyehye no esiado esiado a nyimpakuw biara fa do dzi nkitaho. Iyi kyere de kasa ho hia ma nyimpa anaa nyimpakuw biara. Wiafe-Akenten (2015) so kyere de, kasa ye adze a opia nyimpa ntamu nkitahodzi ekyir papaapa. Dza nyimpa beye biara nnyi ho a onngyina kasa do na ɔdze ye.

Dza Buaer (1988) da no edzi nye de, kasa nnda edzi wɔ nyimpa kor mu, ɔye adze a ɔda edzi wɔ nyimpakuw mu. Demara so na amambra so tse; amambra da no edzi wɔ

nyimpakuw a wɔwɔ bea kor na wɔka kasa kor ntamu. Iyi ma yetse ase de kasa a nyimpakuw bi dze bedzi dwuma no gyina hɔn amambra na kusum do. Wonkyi (2016: 1) si iyi do dua de “*Kasa do na yedua dzi nkitaho ma ntseasee ba wɔ nyimpakuw biara mu, na mbom kasa gu mu ahorow; ogyina nyimpakuw no mu nyimpa hɔn nyimpaban na hɔn gyinapɛn wɔ abrabɔ mu do.*”

Sɛ nyimpa rekasa a, ommbue n’ano ara nnkasa bi, ɔhwe sohyiolengwestekese nhyehyɛɛ bi tse de mfe, dzibew, gyinapɛn, beebi a nyimpa no gyinae rekasa na adze do. De mbre ekuafɔ dze kasa bedzi dwuma no rennye de mbre farfo dze kasa bedzi dwuma. Mbre ɔtse biara osiande wɔye nyimpakuw ebien a ɔsor hɔn edwuma no ntsi ɔye denara amambra mu nsosonee a ɔda edwuma ebien yi mu no dze nsonsonɛe bi beba hɔn kasa mu.

Akasafɔ binom rekasa a, wɔnnka hɔn kasa no traɛ demara. Wɔdze mbe hyehye hɔn kasa no mu ma kasa no yo huan san so ye dew. Mbre akasafɔ befa do dze ne be bedzi dwuma wɔ ne ber mu no da edzi de nyimpa no anaa akasafɔ no apɔw papaapa wɔ kasa no ho. Mbe no bi wɔ hɔ a ɔfa edwuma pɔtsee bi ho. Mbe a wobu fa far dwuma ho no nnkeye de dza wobu fa ekuadwuma anaa atondwuma ho.

Agyekum (2017) kyere de mbe ye kasa korengyenn a ɔda nokwasem anaa nhyehyɛɛ bi na nyimpakuw bi abrabɔ edzi. Ɔkyere mu de mbe gyina nokwasem a nyimpakuw bi hɔn suahu, nyimdzee, adwen, adwenmusem ngyinado, asetsena – amambrasem ho nhyehyɛɛ na kwan a nyimpakuw bi hu wiadze yi. Iyi kyere de mbe mmba ara bi, ɔnam nyimpa ne nyimdzee a

ɔfa wiadze yi do ba. Mbe ma hen nkɔmbɔtwetwe ye dɛw, na kasa ne ntseasee dzi mu ber a yɛdze mbe a ɔfata ahyehye mu.

Mbe ye amambra ho nyimdzee nkyerekyeremu a ɔfa hen mpanyimfo hɔn suahu na asetsena – amanyesem a ɔfa abrabɔ ho (Agyekum, 2005a). Ɔkyere mu dɛ dza ɔda edzi dɛ obi akwadar wɔ kasa ho nye dɛ otum dze be hyehye ne nsem anaa ne kasa mu.

Kquofi, na no dɔm (2013) ka dɛ, “Akanfo amambra mu no, se ɔkasafɔ no dze be fora ne kasa ka a ɔda asem no edzi kyere etsiefo no wɔ kwan soronko do.” Wɔwɔw do kyere dɛ wiadze mbea dodowara na se obi dze be dzi dwuma anaa dze forafɔra ne kasa mu yie a wobu no dɛ ɔye ɔkasafɔ mapa. Ɔda edzi dɛ se obi botum akwadar wɔ kasa bi mu a gyede otum hu kwan a obotum dze mbe behyehye ne kasa mu.


Nhwehwemufo dodowara na hɔn enyi dzi mbe ho nhwehwemu ekyir wɔ wiadze mfendzanan nyinara (Hwe Agyekum 2005, Kquofi na no dɔm, 2013, Villers, 2016, Yakub, 2018 nna Owu-Ewie 2019). Mbe a wɔka no ne ber ano no mu wɔ ntseasee kyen kasa a wɔka no kwaa ara, na mbebesem a wɔammfa enndzi dwuma yie twetwe ɔhaw anaa enyimtsiabu bre ɔkasafɔ no (Borentine, 1999). Mbe ye kasa tsiabaa a ɔda hen adwendwen na nyimdzee a yewɔ no wɔ hen daadaa abrabɔ ho anaa ɔda nokwasem bi edzi (Amate, 2011).

Owu-Ewie (2019) kyere dɛ, “Ɔnntaa nnsi dɛ obi bekasa wɔ Ebibirmu ha a ɔremmfa be nhyehye ne kasa mu, nkanka se ɔkasafɔ no rekasa fa nsem bi a ɔfa amambra na amandze

ho na nkorɔfo bi hɔn suahu ho. Amate (2011) hwɛɛ Akan mbe a ɔnye dza yehu, adwenmusem na asetsena-amambrasem mu nhyehyɛɛ.

1.2 Ohaw no

Nhwehwɛmu dodowara na wɔayɛ wɔ mbe na ekuayɛ mu kasa ho wɔ kasa ahorow mu a Akan dzi mu adɔntsen. Nhwehwɛmufɔ agyɛn hɔn enyi ahwehwe Akan mbe mu wɔ mfe a abesɛn yi. Annobil (1995) hwehweɛ Akan mbe bi nkyerekyerɛmu, Borentine (1999) yɛɛ nhwehwɛmu faa Twi mbe na mfonyin ho. Abakah (2008) hwehweɛ mbe, Akan amambra ho nyimdzee korabea, Bannerman (2011) yɛɛ nhwehwɛmu faa Mfantse - Akan mbe nkyerekyerɛmu, dɛ ebesaw anaa erennsaw: mbarimasem wɔ Akan mbe mu na hɔn nsunsuando wɔ ndɛ mber yi asetsena mu so yɛ nhwehwɛmu a Diabah na Amfo (2018) yɛɛ na Owu-Ewie (2019) hwɛɛ kwan a wɔfa do dze mbe dzi dwuma wɔ Akan awar mu kasakyɛɛ mu.



Wonkyi (2016) so hwehwe nkasafua a Mfantse ekuafɔ dze dzi dwuma mu wɔ hɔn ekuayɛmu wɔ semantese kwan do. Nhwehwɛmu yi mu no ɔkyɛɛ dɛ kasa a Mfantse ekuafɔ dze dzi dwuma wɔ hɔn ekuayɛ mu no gyina hɔn amambra do. Iyi ntsi nnyɛ adze a kasa a wɔdze dzi dwuma no nye afofor dze yɛ pɛr. Ɔwɔ mu dɛ no nhwehwɛmu no mmfa mbɛbusɛm ho dze, eso ɔhwɛ nkasafu a Mfantse ekuafɔ dze dzi dwuma wɔ hɔn kuayɛ mu yi ara dze nna ɔnye mprempre dwumadzi yi wɔ twaka. Mapensapensa Wonkyi (2016) mu yie wɔ tsir a ɔto do ebien no mu.

Nhwehwɛmu a ɔwɔ sor hɔ yi nyinara yɛ dza ɔfa Akan nyinara ho; no mu biara nnyi hɔ a wɔdze gyinaa mbe a ɔfa Mfantse ekuayɛ ho. Mfantsefo wɔ mbe ɔfa ekuadwuma ho a ɔda

Mfantsefo adwenmusem edzi, kasasu na nsentsitsir, iyi na okenyaan me ma midzii dem dwuma yi. Nhwehwemu kwan a ɔda hɔ no ma nyimdzee a nhwehwemufo dze ato gua fa Mfantsefo mbe ho no nndzi mu nnwie papa na ɔma mbe a ɔfa Mfantse ekuafɔ ho no ne nkyeremu ye dzen kakra. Nhwedo bi tse de;

Ɔbaabɔn tse de haban mu bankye ndua, se edze no gu apa do mpo a, obefifir.

Finnegan (1970) kyere de, mbe ye kasahuam a no dwumadzi nye de ɔye adwenmu mfonyintwa ne farbae a wogyina do ma nsem ho nkyerekyeremu ahorow. Iyi kyere de se wɔdze be bi to hɔ a, nyimpa botum enya nkyeremu pii ama no. Yehwe be yi a ɔwɔ sor hɔ yi a, etsiefo botum egyina ɔbaabɔn no suban do dze nkyeremu ama anaa obotum egyina mbrɛ bankye ndua tse do ama ho nkyeremu (a obotum ama ntseasee a be no dze roto gua no asesa). Mbom dem mfonyintwa yi a ɔwɔ mbe no mu no boa hen ma yetse be no ase. Be no a ɔwɔ sor hɔ no ne nkyeremu ara nye de, “Suban nnsoma” mbrɛ ɔtse biara no obopue. Ɔkyere de, bɔn rekyere nyimpa su de ɔda edzi wɔ beebiara a nyimpa no bɔkɔ. Nkyeremu a nkorɔfo dze ma a ɔnnhye da nndzi mu wɔ mbe a ɔfa Mfantse ekuaye ho nye haw a mprempre dwumadzi yi repe de osiw ano, ɔno nye de ɔbɔboa dze nkyeremu a no mu do bɔto gua na aboa mbe no hɔn ntseasee.

Mprempre dwumadzi yi hwehwe mbe a Mfantse ekuafɔ dze dzi dwuma wɔ hɔn dwumadzi mu na ksasasu na nsentsitsir a ɔda edzi wɔ mbe no mu. Dwumadzi yi no botae nye de ɔbepensapensa mbe a ɔfa Mfantse ekuaye ho, mbe yi mu nsentsitsir na kasasu a ɔda edzi wɔ mu. Dwumadzi yi so hwehwe mfaso a mbe a ɔfa Mfantse ekuaye ho no mu bi ye ma ekuafɔ no.

1.3 Nhwehwemu yi no botae


Dwumadzi yi no botae tsitsir nye de;

1. Oye mbe a ofa Mfantse ekuaye ho mpensampensamu.
2. Oda nsentsitsir a oda edzi wo mbe no mu na oye ho mpensampensamu.
3. Opensapensa kasasu a oda edzi wo mbe no mu.

1.4 Nhwehwemu yi ho nsembisa

Nhwehwemu yi pe nyiano ma dem nsembisa yi;

- Eben mbe na ofa Mfantse ekuaye ho?
- Nsentsitsir ben na oda edzi wo mbe no mu?
- Kasasu ben na oda edzi wo mbe no mu?



1.5 Nhwehwemu yi ho mfaso

Dwumadzi biara nnyi ho a ommfa mfaso mmbre nyimpa. Iyi ntsi dwuma biara a nyimpa bedzi no ohwɛ mfaso a odze beba ana oahye ase de oridzi ho dwuma. Mfaso a nhwehwemu yi dze beba na oka do yi.

Nhwehwemu yi boboa ada mbe ahorow a ofa Mfantse ekuaye ho. Nhunmu a dwumadzi yi dze boto gua no beye mfaso ama esuafo, akyerɛkyerɛfo na Mfantsefo a woka Mfantse kasa na wape de wosua kasa no ko ekyir anaa enyim.

Nhwehwemu yi so beye mboa ama nhwehwemufo a wope de woye nhwehwemu fa Mfantsefo mbe ho. Dwumadzi yi boboa akora Mfantse kasa no mu nhyehyee bi na abo ho ban.

Korakora no, dem nhwehwemu dwumadzi yi dze nyimdzee a obeda no edzi no beka nyimdzee a owo mbe ho wo Akanfo mu no ho.

1.6 Nhwehwemu yi ho akwansiwdze

Mbre nhwehwemu yi no bobew tse ntsi, metasee mboanosem no wo nyimpa a menye hon dzii dwuma no ho wo ber a nna woreye edwuma. Ohaw a owo iyi ho nye hon a menye hon dzii dwuma no; nna hon a menye hon ridzi dwuma no nnhye da mma hon tsir do wo dwumadzi no ahyese no osiande nna wonnhye da nnyim me yie. Woyee hon adwen de meregye hon nyimdzee akere sika. Mbom, osiande nna meka hon kasa ntsi mutumii kyerekyeree nsem mu yie kyeree hon ma wokentseen honho wo dwumadzi no mu.

Bio, m'efir a nna medze ridzi dwuma no so twee m'aso kakra, nkanka dwumadzi yi ne ntsintsimii mu. Osiande oye efir ntsi nna otofabi a nna oagye noho na meka no beebiara a onnye yie. Iyi ntsi nna mitsintsim bi wie biara a motwe gu efir a wodze adze sie do (pen drive) do na se ekyir yi efir no gye noho a nna medze ako me nyenko bi ho akotoa do.

1.7 Bea a nhwehwemu yi pem

Nkurow dodowara na owo Mfinimfin Mantow mu a woye ekuadwuma wo ho naaso meyye m'adwen de mebeye nhwehwemu yi wo Mfantseman na Edwumako-Enyan-Esiam mansin

mu. Mefaa dem nkurow yi osiandɛ edwuma tsitsir a wɔyɛ wɔ hɔ ara nye ekuadwuma. Demara so na ndwuma ahorow pii na wɔdze mbe dzi dwuma wɔ hɔn dwumadzi mu, naaso medze m'enyi sii ekuadwuma nkotsee do. Nhwewwemu yi gyina mbe a Mfantsefo ekuafɔ dze dzi dwuma wɔ hɔn dwumadzi mu. Dem mbe yi mu mmpa kasasu, iyi ntsi dwumadzi yi bekyea enyi ahwe kasasu a ɔda edzi wɔ mbe a Mfantsefo ekuafɔ dze dzi dwuma wɔ hɔn dwumadzi mu. Osiandɛ yetum gyina nsentsitsir do kyekye mbe mu ntsi, mobɔhwe nsentsitsir a ɔda edzi wɔ Mfantsefo ekuafɔ mbe mu na korakora no maahwe mfaso a mbe yi ye ma nde mber yi mu Mfantsefo ekuafɔ.

1.8 Dwumadzi yi ne nhyehyɛɛ


Dem nhwewwemu yi wɔ afaafa enum. Ɔfa a odzi kan no nye dwumadzi yi ne nyienyim, ɔpensapensa nhwewwemu no ne ngyinado, ɔhaw no, nhwewwemu yi no botae, nhwewwemu yi ho nsembisa, nhwewwemu yi ho mfaso, nhwewwemu yi ho haw, bea a nhwewwemu yi pem, nhwewwemu yi ne nhyehyɛɛ na ɔfa yi no tɔfabɔ. Ɔfa a ɔto do ebien no so pensapensa enyimdzefo binom adwenkyerɛ a ɔfa tsir asem yi ho mu. Ɔsan so da adwenmusem ngyinado a medze bepia mboanosem no ekyir edzi ('Conceptual Metaphor' Adwenmusem).

Ɔfa a ɔto do ebiasa no so hwe nhwewwemu akwan a medze dzii dwuma yi. Tsir anaa ɔfa no pensapensa bea a minyaa mboanosem na kwan a mefaa do nyaa mboanosem no, nhwewwemu no su, nyimpa dodow a menye hɔn dzii dwuma no, nyimpa pɔtsee a menye hɔn dzii dwuma wɔ mboanosem no ne nyae mu. Ɔsan da nhwewwemu ndzɛmba a medze dzii dwuma wɔ nhwewwemu yi mu na akwansere edzi.

Ɔfa a ɔtɔ do anan no nye dwumadzi no ankasa. Ha na mada mbe pɔtsee a Mfantsefo ekuafɔ dze dzi dwuma wɔ hɔn dwumadzi mu edzi na mapensapensamu. Kasasu na nsentsitsir a ɔda edzi wɔ mbe yi mu nyinara ho mpensampensamu wɔ ɔfa yi mu. Ɔfa yi ara so hwehwe mfaso a dem mbe yi ye ma nde mber yi mu Mfantsefo ekuafɔ. Tsir anaa ɔfa a ɔtɔ do enum nye dwumadzi yi n'ewiei. Ohwe dwumadzi yi no tɔfabɔ, nhunmu a nhwehwemu yi da no edzi, adwenkyere na tɔfabɔ.

1.9 Tɔfabɔ

Dwumadzi a ɔfa nhwehwemu wɔ mbe a Mfantsefo ekuafɔ dze dzi dwuma wɔ hɔn dwumadzi mu yi ahwe ɔfa yi ne nyienyim, nhwehwemu yi ne ngyinado, ɔhaw no na dwumadzi yi no botae. Ɔfa yi ara mu so na mada nhwehwemu yi ho nsembisa edzi. Masan so ahwe nhwehwemu yi ho mfaso, bea a nhwehwemu yi pem, nhwehwemu yi ho haw na nhwehwemu yi ne nhyehyee. Dza otwa tun a ɔfa yi daa no edzi nye ɔfa yi no tɔfabɔ.



TSIR EBIEN

ENYIMDZEFO BI ADWENKYERE


2.0 Nyienyim

Tsir a ɔtɔ do ebien wɔ nhwehwemu yi mu yi ye adwenkyere a enyimdzefo bi dze ato gua ho mpensampensamu. Makyekye mu ebiasa; dza ɔfa mbe ho, dza ɔfa adwenmusem a medze ripia dwumadzi yi ekwir ho na dwuma a nkorɔfo edzi dada ɔnye mo dwumadzi yi wɔ twaka. Dwumadzi a ɔfa dza enyimdzefo akyerew dada a ɔnye dwumadzi yi wɔ twaka mu no makye mu ebien, dza ɔmmfa Akan kasa ho na dza ɔfa Akan kasa ho. Mpensampensamu a ɔfa mbe ho no hwe be n'adzeban, nyia be ye nedze, nsentsisir na kasasu ahorow a ɔda edzi wɔ mbe mu na Akan mbe ne nhyehyee na no ho mfaso.

2.1 Mfantsekasa no

Mfantse ye Akan kasa no nkorɔfo etsisir ebiasa no no mu kor a wɔka no wɔ Mfinimfin Mantɔw mu na Atɔree Mantɔw mu wɔ Ghana. Mfantsefo hye Nkranfo na Nzemafo mfinimfin wɔ mpoano afa mu (Owu-Ewie, 2014). Kasafua Mfantsefo gyina ho ma nyimpa a wɔwɔ Mfantseman mu na kasa a wɔka nye Mfantse. Wɔka Akan ebusuakuw no ho na hɔn kasa no ka Kwa kasakuw no ho. Agyekum (2006) kyere de, Ghana asaase a ɔwɔ anaafɔ no, Akanfo fa no mu fakese. Mfantse kasa gu mu ahorow akese ebiasa; Anee, Iguae, Boka. Mfantse ye kasa a wosua no wɔ skuul fitsi mbofra skuul kesi esuapɔn mu (Agyekum, 2006). Mfantse kasahorow no na ɔda edzi wɔ mfonyin yi do wɔ ase ha yi (pon 1).

Pon 1: Mfantse kasa ne nkyekye mu ahorow pon



2.4 Bɛ asekyerɛ

Borentine (1999) ka dɛ, “sɛ yɛba bɛ no dwumadzi mu a, ntseasee a ɔwɔ mu nye dɛ tseka botum ayɛ kwan pa a yɛfa do dzi nkitaho”. Nwoma kyereɔfo na abemfo pii ama bɛ nkyerɛasee ahorow a ogyina hɔn botae bi do, (Owu-Ewie, 2019: 26). Iyi afa mu no, Villers, (2016: 371) tsi mu dɛ bɛ wɔ nkyerɛasee ahorow a ntawantawa bi wɔ ho osiandɛ bɛ wɔ suahu ahorow hɔn nkwanɛ: tsetsesɛm, nhwehwɛmu fa biribi ntseasee ho, kwan a nwoma kyerefo fa do dze kasa dzi dwuma wɔ hɔn akyerɛw mu, kwan a nyimpakuw bi fa do dze

kasa dzi dwuma, kwan a wɔfa do wen abasem bi na dza ɔkeka ho. Iyi kyere de, nkyereasee a obi dze bema be no gyina mbre nyimpa no dze be dzi dwuma na dza oesua afa be ho anaa beebi a ɔwɔ nyimdzee wɔ. Tetteh, (2013) ka de, be ye ano kasadwin ne fa ketseaba bi a ɔnye ebisaa na anasesem nam nye ano kasadwin a aka no. Ohwehwee mu bio hun de be ye nsentɔw tsiaba a yenya fi suahu mu na yedze bɔ asem bi tɔfa anaa dze ka biribi fa asem bi ho wɔ akwan fofor bi do.

Durkhein (1933: 170- 171) de mbre Diabah na Amfo (2018: 181) dze dzii dwuma no, “Be ye nsem ahorow a wɔaka abɔmu etwa no tsia a ɔda dwenmu ahorow anaa atsenka a ɔfa adze pɔtsee bi ho edzi”. Whiting (1983: 80) de mbre Malik, (2017: 54) dze dzii dwuma no, be ye nsem a nyimpa dze bɔbɔɔ adze a ɔda ne abɔse edzi wɔ mbre no bɔbew tse na asemfua mu. ɔkyere dza otum ye nokwarsem a ɔwɔ fie kasa mu a no ho hia na wɔtaa wen ma ɔye few mbom wɔdze ngyegyee nsisi do wɔ nkasafua ahyese a ɔwɔ nsensanee bi mu na ngyegyee kor ye. ɔtaa ye ntsiantsia naaso nnye kyenkyenene de ɔnye tsia; ɔtaa ye nokwarsem naaso nnye kyenkyenene de ɔnye nokwarsem. Bi wɔ nkyereasee a ɔye tseraa na ma no mu do nyinara a ne nyinara tɔ asomu; naaso mpen pii no wɔwɔ ebien no mu kor. Finnegan (1970: 393) kyere de, be ye “nsem a wɔka no kwan pɔtsee bi do anaa ɔntse dem do na ne tsiatsia, ne asomuto, nkyen a ɔwɔ mu (ne dɛw) na nkasafua kakrabaa bi a wɔdze da nokwarsem a wɔagye ato mu no edzi ma ɔye soronko no boa ma yehu. Annobil (1992) hu be de ɔye ahwehwe a ɔda nyimpakuw bi hon abakɔsem na amambra edzi.

Agyekum (2012) kyere be mu de ɔnnyew, ɔye gyedzi na kasa a no mu awo, ɔtaa gyina ho ma biribi a ɔkyere nokwarsem anaa ɔda biribi a ɔwɔ ho edzi a ogyina abrabɔ mu suahu do na wɔdze gyaw nkyirma a ɔnnyew se mber dan mpo a. Yankah (1989) ka de, be ye nyansa

kasa a ɔye tsia a no mu do na wɔdze nkasafua kakrabaa bi dzi dwuma. Iyi kyere de be dze nkasafua kakrabaa bi dze nsem pii to gua. Mbom hon mu ntseasee hia adwendwen a no mu do na nyansa. Wɔtaa bu be wo daa kabea mu dze kenyan adwen a ntsaeasee a wo mu no enyi nda ho pefee.

2.5 Be ne farbae

Villers (2016: 369) kyere de, wo mu de nhwehwemu pii wo ho a wodzi dwuma fa be ne farbae na hon a wɔdze be potsee bi bobo adze ho naaso ɔye dzen yie de benya bi a okyerkyere kwan a yefa do nya be ankasa. Mbom Taylor (1934: 10) de mbre Villers (2016: 369) dze dzii dwuma no kyere de, be biara no obi na odze bobo adze na odze to gua ma afofor tse naaso nyimpa bi n'asemfua tsiabaa bi a ɔye nokwarsem anaa no mu awo no runntum mmbeye be gyede amambra no agye atum. Iyi kyere de nyimpa na odze be bobo adze mbom wo de wɔdze to gua tserew mu ko ekyir ma amamfo enyi ba do. Dem ngyina do mu no, Villers (2016: 373) ka de, mpenpendo a odzi kan wo be no mbobo adze mu no nnye no nwenee bi mbom dza onam do ma be no ba. Firth (1926: 263) de mbre Villers (2016: 373) dze dzii dwuma no kyere de iyi ye "tsebea potsee bi". Villers ko do kyere mu de dem tsebea potsee yi ye adze a otum ma biribi si wo abrabo mu: suahu a yanya nsem bi fi mu. Mfatoho tse de Borfo be "*Garbage in, garbage out*" a wokyereew no wo 1957 dawurbu mu no fa mbre wɔdze kompiwta dzii dwuma maa efir a okyer hen a onko na dza ongyina nye kwan do ho be mu. Wofa no de dza odze asem yi baa no ye mfomdo a woyee ma wonyaa nsunsuando bon. Se woka dem nsem yi kyere afofor a, onnda ho nnye adwen mu nsem bio mbom odu mpenpendo a wotaa ka. Iyi nye mpenpendo ebiasa a

wɔkyerɛkyerɛ mu wɔ Gustave Guillaume no Saekɔmekanekese adwenmusem mu no dzi nse.

Suahu (adwen) → wɔdze roto gua (kasa) → ne ka (kasa)

Villers (2016: 373) kyereɛ de mpenpendo bio a be fa do ba nye mbea na ndzɛmba ahorow a obi hu. Ber a woenya suahu bi efi tsebea bi mu ewie no, se obotum ahye ase akɔ ekyir yie ma obiara atse a gye de hon a wɔka anaa wotsie no dodowara tse asem no ber kor noara mu. Villers kyere mu de ndzɛmba a wɔma nsem bi kɔ ekyir tse de sen, dawurbɔ, buukuu, asem a wɔdze ato gua na dza ɔkeka ho na ɔma dodowara aso tse. Iyi kyere de ndzɛmba a ɔma nsem kɔ ekyir boa ma asem no kɔ ekyir yie ma dodowara dze dzi dwuma. Mpenpendo bio a Villers hwɛe nye mpenpendo a asem no bɔkɔ ekyir ma dodowara atse a ohun iyi de ɔye mpenpendo a ɔwar wɔ be no mbɔbɔ adze mu. Otsi mu bio de dem mpenpendo yi taa dzi mfe pii. Ndzɛmba pii na ɔma asem no tum kɔ ekyir yie. Odzi kan no, asem no twar de no ho hia a nyimpa bepe de wɔbeka akyere afofor. Bio, se asem no botum etsim a otwar de ne ka ye mberɛw, onnyi de ɔye tsentsenntsen pii anaa ne ntseasee ye dzen. Odzi ewie, asem no ne ngyegyee nhyehyee anaa dza ɔwɔ ho a ɔye few (dɛw) nkaa no botum ama dodowara aka. Iyi kyere de mpen dodow a wɔka no nna ɔma ɔye asem fofor a nyimpa dodowara tse dze dzi dwuma. Meieder (2004: 9) de mbrɛ Villers dze dzii dwuma dze boa dem asem yi kyereɛw de, se be bi ba a, wotum dzi kan dze dzi dwuma wɔ ebusua kakrabaa mu, kurow mu, mantɔw mu, ɔman mu, asaasepɔn nna ekyir yi wiadze nyinara mu.

Mpenpendo bio a Villers hwɛe nye mpenpendo a wonnɔhu be no wura. Se asem no beye fofor ma obiara anaa obiara ka a nna kwan a be fa do bɔbɔ adze no nnsii nnwei. Otwar de

ber a wonnihu be no wura no si ana kwan a be fa do bobo adze no esi. Dem nyewee yi tum si ana asem no ako ekyir, otum nye asem no nko ekyir no si pereper anaa otum si ber a asem no ako ekyir ewie na otum gye mber tsentsen. Se asem bi botum edur ekyir ntsentsem a nna ogyina nyia adze asem no bae na ndzamba otum dze asem bi ko ekyir no do. Se obiara nyim nyia adze asem no bae no na hon a wodze nsem ko ekyir no ennyi ne dzin (ne nyimpa ban) no emmfi ho kwan a be fa do bobo adze no runntum nnsi. Halm (2006) ka de, be fi tsetsesem mu na woka kyere nkyirma no na ama oda ho wo ho.

Mfatoho bi nye;

‘Epuropurobin mmba bobaa a orupuropurow ho’

2.6 Akanfo be no su

Tetteh (2013) ka de, Akanfo abebu nnye kuntann na otaa dze asempow no to gua pefee a adze hon ngyinahoma dzi dwuma. Okyere mu de Akanfo be ye ntsiatsia na oboa ma nyimpa tum kaa no ntsem de wodze dzi dwuma ber a wrekasa. De mbre be twa nkyerekyeremu tsentsen tsia no, Tetteh hun de oye dzen de benya nsentow kuntann a oye be. Dem ntsi Akanfo be biara a nyimpa dodowara nyim no wonnka nnwie. Yankah (1989) ka de, dwuma a wodze be bi dzi na okyere ne yeba na ne asekyere. Bio, oka de Akanfo be tum sesa. *Be dze onngyina faako, otu.* Yeroko enyim no, Tetteh kyeremu de nyimpa a orubu be no ka ofa a odzi kan no nna oegyaa ofa a aka no ber a etsiefo no betse dza oreka no ase. Be bi tse de; ‘Abɔ wo kar no,.....(nna wɔsoa wo).

Akan mbebussem no mu bi wo ho a wodze asem no hye mbowa ano ma woka no tse de mbre mbowa no buu dem mbe no. Onnye na koraa de betse de nkorɔfo ka nsem bi a nkorɔfo ka tse de mbre oye be. Obotum aba de dem nkorɔfo yi ye nyimpa etsisir bi a nna wowa

Akanman mu mber bi a abesen. Su kor a ɔda edzi wɔ be mu nye de ɔye dzen de ibohu nyia ɔdze be no bɔbɔ adze. Naaso, Tetteh (2013: 10) kyere de dem mbe yi a wobu hye nkorɔfo ano yi tum da be no wura anaa be no ntuaɔze edzi. Nkorɔfo a wɔbɔ nkorɔfo dzin de hon na wɔkaa asem no a aye abebusem no mpen pii no ɔye a nna kwan bi do no ɔye nyimpa no ho biribi/nyimpa. Tetteh (2013: 10) ko do kyere mu de nnye nyimpa nkotsee na wotum dze be hye hon ano de hon na wɔkae, wotum bu be hye Nyankopɔn na mbowa bi ano.

Ɔwɔ mu de yɛdze be yi hye mbowa na Onyankopɔn ano dze, eso be no ne ntseasee no dze no mu do kyen dza yehu no de mbowa no ka no, nna ber biara so ɔfa nyimpa ne daa daa abrabɔ mu nsem ho. Dza ɔma ɔba no dem nye de be ka nyimpa ne bra na ne kasaa ho, na mbowa na ndua nntum nnkasa. Mbom siantsir a wobu be yi nye de osuahu a woenya wɔ dem mbowa na ndua no ho a ɔnye nyimpa ne daa daa abrabɔ saa anaa wɔ twaka. Yenhwɛ dem mbe yi a ɔka do yi a mefae fii Tetteh (2013:11) mu yi. Dem mbe yi ye dza wobu hye nyimpa ano.

*Me Nana Tanowa na ɔse, 'Asuo refa Kramo a, wose ne kye?
Ɔpanyin Kofi Nyame na ɔde, 'Ano fa tserew a, ɔsen namɔn.*

Ehwɛ be a ɔwɔ sor ho yi a, ihu de be no ye dza wɔdze ahye obi n'ano de nyimpa no na ɔkae. Iyi kyere de ɔwɔ mu de be nnyi farbaa dze, naaso yetum dze hye obi ano se ɔba no de dem nyimpa no nye obi a odzii kan dze too gua anaa taa dze dzi dwuma a. Ɔye de mbre nyimpa a wobu be no hye n'ano no na be no ye nedze. Yenhwɛ be a ɔwɔ ase ha yi a ɔfa ndua na mbowa ho yi:

Ɔkwankyɛn borɛdzewa dɛ, 'Ahowaawaa nsti mannyɛ yie'.

Abowa atwɛr na ɔka n' asem dɛ, 'Sɛ me na Kwenkwentsiba (wa) wodzi a, nkyɛ mowɔ enyimnyam wɔ nyimpa enyim'.

Bɛ a odzi kan wɔ sor hɔ yi so da edzi dɛ wɔdze bɛ no ahyɛ borɛdzewa a osi kwankyɛn ano. Ɔda edzi dɛ borɛdze no na orubu anaa obu dɛm bɛ no. Nna dza otsia ebien no so yɛ dza ɔyɛ dɛ yebu bɛ no dze hyɛ abowa atwɛr ano. Dza otwar dɛ yɛhyɛ no nsew nye dɛ, ɔwɔ mu dɛ yebu dɛm mbɛ yi hyɛ nyimpa ano dze, naaso ntseasee a wɔdze to gua no gyina osuahɔ a woehu no wɔ mbowa na ndua no hɔ a ɔfa nyimpa ne daa daa abraɔ hɔ. Dza iyi reda no edzi nye dɛ yetum bu bɛ hyɛ nyimpa na mbowa, ndua na Onyankopɔn ano

Bɛ no su kor so nye dɛ mpen pii no bɛ anaa mbɛbusɛm dodow ara yɛ ntsiantsia. Iyi da edzi wɔ nkyɛmɛm a Agyekum (2011) dze to gua fa bɛ ho no mu. Ɔkyɛrɛ dɛ bɛ yɛ kasa tsiabaa anaa kasa fɛnɛkyɛmm a yɛdze twa asem tsɛtsɛn tsia. Ɔwɔ mu dɛ mbɛbusɛm no mu dodow ara yɛ tsia dze, naaso ntseasee a wɔdze ma no gye ndwenho.

Bɛ no su kor so nye dɛ ne ntseasee no tum sesa osian dwumadzi pɔtsee a yɛdze bɛ no ridzi dwuma wɔ ase no ntsi. Bɛ bi tse dɛ “Sɛ eyɛ w'akokɔ soɛ soɛ a, akorɔma kyɛr no” ne ntseasee gyina ber kor na dwumadzi a ɔrokɔ do no do. Sɛ edze dɛm bɛ yi dzi dwuma wɔ awargye ase dɛ wɔdze rutu ɔbaa a wɔregye no awar no fo a, nna wɔrɛpɛ akyɛrɛ dɛ otwar dɛ ɔhwɛ no kun yie annyɛ dɛm ma basia fofor hwɛ no yie a banyin no n'enyi bɔkɔ ekedzi basia fofor no ekyir. Iyi tum mpo dze awargyaa ba. Mbom wɔdze dɛm bɛ yi ara so dzi dwuma wɔ enuanom a akasakasa esi hɔn ntamu ma worutu hɔn fo mu a, ntseasee a ɔdze bɛma no bɛsesa efi awargye ase dze no ho.

2.7 Bɛ nhyehyɛɛ

Akan mbebusɛm wɔ nhyehyɛɛ a ɔwɔ ha yi; nkakuho, asɛntɔw tsiaba na asɛntɔw tsentsɛn.

Yetum so nya bɛ a ɔwɔ ngyegyɛɛ su na asɛntɔw a ɔyɛ asɛntɔw mbɔho.

2.7.1 Nkakuho na nsido

Bɛ wɔ nhyehyɛɛ ahorow a nkurow ahorow no agye ato a wɔdze dzi dwuma, (Tetteh, 2013: 4). Nkakuw ho na nsido yɛ Akanfo bɛ no su. Iyi kyɛɛ ber a ndzeyɛɛ bi nnsi kor nngyɛ mbom ɔkɔ do kesi mber bi. Tetteh kyɛɛ dɛ dza wɔka kuw ho no taa yɛ nyɛɛ a ɔwɔ bɛ no mu. Mfatoho, asɛntɔw ‘Morohwɛ adze’ kyɛɛ ndzeyɛɛ kor. Na ‘Morohwehwe adze’ kyɛɛ ndzeyɛɛ a akɔ do mpɛn pii dɛ rohwehwe biribi wɔ mbea ahorow. Yetum hu dɛ nsɛntɔw ebien yi mu biara wɔ nkyɛɛase soronko. Nkakuwho wɔ Akanfo bɛ mu no tum si wɔ asɛntɔw a ɔyɛ bɛ ne ahyɛɛ, mfinimfin na ne ewiei. Hwɛ dɛm bɛ a ofi Tetteh (2013: 6) mu yi.

- *Krɔdɔ krɔdɔ annyɛ ma, na pam pam na ɔbɛyɛ dɛn?*
- *Hei, hei! na amma akromma annyɛ kɛsɛ.*
- *Kraman na ɔhwehwe biew, na nnyɛ biew na ɔhwehwe kraman.*
- *Iwiawia nkorɔfo nkokɔ dua w'eburow a, nkokɔhwerɛw tutu.*
- *Idzidzi efiduasasa mu a, w'ano nnyɛ dzen.*

Ehwɛ mbebusɛm a ɔwɔ sor ho yi a, itum hu dɛ mbɛ no mu nsɛm no bi wɔ ho a wosisi do mbɛn ebien na no mboreɛ wɔ bɛ no mu. Bɛ a odzi kan no mu no, wosi “krɔdɔ” do mpɛn ebien na “pam pam” so wosi do mpɛn ebien. Bio, ehwɛ bɛ a ɔtɔ do ebien no so mu a, ihu dɛ wosi “Hei” do mpɛn ebien. Nhwɛdo a otsia ebiasa no so nedze no yɛ soronko kakra fi

ebien a medzi kan aka ho asem no. Oda edzi de woetsi nkasafua beye ebiasa mu wo mu; “kraman, ohwehwe na biew.” Dem nhwedo yi ara mu no so, yetum nya nkasafua a woaka ekuw ho wo mu; wokuw “hwe” ho ma obeye “hwehwe.”

Nhwe do anan na enum nyinara so ye dza nkakuho da edzi wo mu. Siantsir nye de, be no mu no, woakeka nkasafua no mu bi kuw ho ma oboa ma be no ne ntseasee da edzi. Nhwedo a otsia do anan no mu no yanya kasafua bi tse de “wia” a woaka ekuw ho ma abeye “wiawia” na “tu” a woaka ekuw ho ma abeye “tutu”. Demara so na otse wo nhwedo enum no mu. Yehu de woabo “dzi” ho ma abeye “dzidzi” wo be no mu.

2.7.2 Akan mbe a oye asentow tsiaba

Asentow tsiaba ye asentow a owo oyefo na nkasaho. Odoom (2013) kyere de, asentow tsiaba biara wo nyee kor per. Nnye onno nko, Boham (1997) so ka si iyi do dua de asentow tsiaba nnyi nyee a obor kor. Dza akyerewfo beenu yi ada no edzi yi kyere de dza Agyekum (2010) dze to gua no ye nokwar de, “Asentow tsiaba ye asentow a oda adwenmu kor per edzi. Mfantse mbe mu no yetum nya mbe a oye nsentow tsiaba. Mbe a otse dem no bi na mada no edzi wo ase ha yi;

- Fun apow nda.
- Guantsir nnyew nkwan mu.
- Burofua na oye san.
- Wotow itur kyere hamu.

Nhwedo anan a medze ato gua yi nyinara ye mbe a Mfantsefo dze dzi dwuma wɔ hɔn daa daa abrabɔ mu. Ɔda edzi wɔ mu de mbe anan no nyinara da adwenmu kor per edzi. Ehwe nhwedo bi tse de “Fun apow nda” a, ihu de nyee kor per na ɔwɔ mu, ɔno nye ‘apow’ na ɔda adwenmu kor edzi. “Guantsir nnyew nkwan mu” so wɔ nyee kor a ɔno nye ‘nnyew’ na ɔda adwenmu kor per edzi. Demara na nhwedo ebiasa na anan no so tse.

Wiafe-Akenten (2015) kyere mu de, Akanfo mbe mu dodowara ye asentɔw tsiaba. Ɔtoa do ka de mbe a ɔye asentɔw tsiaba no yetaa hu ndua na mbowa ahorow dodowara wɔ mu. Mbom, ɔdze nhwedo bi dzi dwuma de asentɔw tsiaba wɔ mu a muhu de ɔnnye asentɔw tsiaba. Se yegyina Oddom na Boham hɔn nkyeremu de asentɔw tsiaba wɔ nyee kor per no a, muhu de nhwedo a ɔwɔ ase ha yi de mbre ɔda edzi wɔ Wiafe-Akenten mu no.

- Akokɔ saw kyee a, ɔnnye akorɔma few.
- Abofra bɔ waw na ɔmmɔ akyekyere.
- Kusi nya fufu a obedzi naaso wɔdur na ɔnnkɔ no tu ano.

Mbe a ɔye asentɔw tsiaba da edzi wɔ mbe a Akanfo ekuafɔ dze dzi dwuma wɔ hɔn dwumadzi mu. Mbe bi tse de “Dua kor nnye kwaa.”

2.7.3 Akan mbe a ɔye asentɔw tsentsen

Odoom (2013) kyere de, asentɔw tsentsen ye asentɔw a ɔwɔ asempruw tsir kor na asempruw mfemfamho so kor. Akrofi (1965) kyere asempruw mu de ɔye asentɔw ne fa bi a okitsa noara ne yefo na ne nkasaa. Asempruw gu mu ahorow ebien; asempruw tsir na asempruw mfemfamho. Yeka asempruw tsir na asempruw mfemfamho bɔ mu a na yenya asentɔw

tsentsen. Se yereka dem nsempruw ebien yi abo mu a, yedze nkabomudze ka hon bo mu. Yetum so dze hon bo mu a yedze nsanho to hon ntamu. Yehwe nhwedo bi tse de, “Abofra no bae no, ne maame boor no” a yehu de dem asentow yi wo asempruw ebien; “Abofra no” na “ne maame boor no”. Dem nsempruw ebien yi nyinara wo nyee, mbom kor tum gyina noho do ma ma hen ntseasee na kor so dan ne nyenko ansaana ne ntseasee edzi mu. “Abofra no bae no” ne ntseasee nnhye da nndzi mu nnwie, mbom, “ne maame boor no” dze ne ntseasee dzi mu. Iyi si nkyeremu a Odoom (2013) dze to gua de asentow tsentsen ma hen asentow kor a wo asempruw tsir na asempruw mfemfamho no tam.

Agyekum (2010) kyere de, nkabomudze ye nkasafua bi a yedze ka kasa afaafa no bi bo mu. Iyi kyere de nkabomudze no dwumadzi ara nye de yedze sisi nkasafua, nsemfua anaa nsempruw ebien bi ntamu dze keka hon bobo mu ara. Nkabomudze a Agyekum kyere de yedze ka nkasafua, nsemfua na nsempruw bobo mu no bi nye *se, osiande, ntsi, gyede, tse de, ber...a, ansaana* na adze. Akan mbe a oye asentow tsentsen no mu bi nye;

- Obi fom kum a, wommfom nngua.
- Ankwaanoma ennsu a, wonntse ne ndze.

Yehwe asentow a wo sor ho yi a, yehu de nkabomudze biara nnka hon mmba mu. Mbom, yedze kasa mpaapaamudze (,) ato asempruw ebien no ntamu. Asempruw a odzi kan wo nhwedo no mu no nye “Obi fom kum a” a oye asempruw a oboa ma asempruw a oto do ebien no a oye asempruw tsir no dzi mu wie.

2.7.4 Mbɛ a ɔwɔ ngyegyee su

Akan mbe de mbre kasahorow mbe tse no tum nya ngyegyee su. Tetteh (2013) kyere de fonolɔgyi nhyehyee a ɔda edzi wɔ mbe mu no, ngyegyee su mbɔho na ɔbɔ no nkyidɔm. Agyekum (2013) so susu de, kasafua anaa asentɔw mbɔho ye kasasua a ɔmma kasa dwumadzi bi nnye enyika nkotsee, mbom ɔda dwumason bi so edzi a ɔda edzi wɔ kasa dwumadzi no mu. Iyi kyere hen de kasafua anaa asentɔw mbɔho mma dwumadzi bi nnye enyika ara keke bi, mbom ɔma dwumadzi no so hye ma. Mbɔho a ɔda edzi wɔ mbe mu no ye soronko fi nkasafua ankorankor ho dze kodu kasa mu do. ɔda edzi de Akan mbe mu no, wotum bɔ ndze, selabor, kasafua na ɔkasa ho. Hwe be a wɔ ase a ɔwɔ Tetteh (2013: 28-29) mu no;

*Kakaw na kaw na ayamu kaw, ɔfanyim kaw.
Ber a odwon rodwen no, nna odwondwaaba so rodwen.
Opoku enyim dɔm enyim, ɔfanyim dɔm enyim.*

2.7.5 Mbɛ a ɔye asentɔw mbɔho

Agyekum (2010) kyere de, asentɔw mbɔho biara kitsa adwenmu ebien. Odoom (2013) so ada no edzi de nnye de ɔye asentɔw a ɔdze adwenmu ebein anaa dza ɔbor dem to gua keke bi, mbom nsentɔw a ɔwɔ mu no nyinara ye nsempruw tsir. Nsempruw a ɔwɔ mu no biara tum gyina noho do da adwen bi edzi. Dza akyerɛwfo ebien yi reda no edzi nye de se yenya nsentɔw tsiaba ebien a yedze nkabɔmudze aka hon abɔ mu a na yefre no asentɔw tsentsen no.

Menye akyerewfo beenu yi nyinara adwenkyere yi ye adwen osiando Akan mbe no bi wo ho a yenya nsentow tsiaba ebien a wodze nkabomudze aka hon abo mu ma sama hen asentow mboho. Mfantse mbe a oye asentow tsiaba bi nye;

- Akokober nyim adzekyee naaso ohwe onyin n'ano.
- Abofra bo waw na ombobo akyekyere.

Mbe ebien a owo sor ho yi mu biara ye asentow mboho. Yegyina Agyekum (2010) ne nkyeremu no do a, yehu de "Akokober nyim adzekyee naaso ohwe onyin n'ano" wo asentow tsiaba ebien; "Akokober nyim adzekyee" na "Ohwe onyin n'ano" a wodze nkabomudze aka hon abo mu. Iyi da edzi pefee de asentow mboho da edzi wo Mfantse mbe mu.

2.8 Kasasu a oda edzi wo Akan mbe mu

Finnegan (1970) da no edzi de mbe ye kasasu wo kwan kor anaa ebien bi do. Mbe wo kasasua ahorow bi a sama oye huam san so ye dew. Awesafu be bi ka de, 'Ohen tse de sumina a obiara dze no wura bogu do.' Akanfo so bu be bi de, 'Oyer tse de kuntu; edze bua wo do a, nna wo ho keka wo, iyi fi wo do so a nna awow dze wo.' Mbe tum kyer etsiefo aso, mbom kasasu a owo mu no so boa ma no dwumadzi no dzi mu (Tetteh, 2013). Akan mbe bi tse de, "*Daakye asem ntsi na wodow koto mpuwa a, wogyam ho.*" Bio, "*Nkokobeeenu roko na wohu akroma a, woguan fa suar kor do.*" Tetteh (2013) kyere mu de nnye mbe nyinara na owo kasasu, binom ye kasa akwantsen ara a wommfa kasasua biara nnkata do. Iyi ho nhwedo nye "*Kokoo kum akyer.*"

2.8.1 Akan mbe a ɔye ngyinahoma

Ngyinahoma taa da edzi wɔ kasahorow mu mbe mu. Agyekum (2013) kyere de, ngyinahoma ye kasasu a ɔdze adze ebien toto ho a ɔkyere de kor no dwumadzi tse de kor. Ɔko do ka de, se edze adze ebien toto ho na ammfa nkasafua bi tse de, “de” na “tse de” annka hon ammbɔ mu a na yefre no ntotoho. Tetteh (2013) so kyere de, ngyinahoma nntse de ntotohosem a ɔdze ndzamba anaa adze ebien toto ho a ɔdze tse de na de dzi dwuma wɔ mu, mbom ngyinahoma da edzi de ndzamba ebein no mu kor tse de kor no a wɔdze rototo ho no. Hwe mbe a ɔda edzi wɔ Tetteh (2013);

Nsadzen ye ɔtwetwesinyi.

Abotar ye wen, n'ekyir na ɔye dew.

Owu ye anoma.

Amandzenya ye nsan.

2.8.2 Akan mbe a ɔye ntotohosem

Ntotohosem ye ntotoho a ɔdze nkasafua bi tse de, ‘de’ ‘kyen’ na ‘tse de’ anaa nyee bi tse de ‘se’ dzi dwuma. (Agyekum, 2013). Ɔko do ka de ntotohosem dze nse a ɔwɔ biribi mu to gua. De mbre ɔbeyee a ntotohosem bedzi mu no gyede yedze ndzamba ebien a wɔnnse totoho. Se obi ka de ‘me nsa tse de ne nsa’ a kasasu mu no yennhu no de ɔye ntotohosem osiande adze ebien no a wɔdze rototo ho no nyinara ye adze kor anaa wodzi nse. Mbom, se yeka asem bi tse de “No kɔn tse de adankum” dze yehu de ɔye ntotohosem osiande ‘adankum’ na ‘kɔn’ nndzi nse wɔ kwan biara do. Tetteh san da no edzi de ntotohosem a ɔwɔ mbe mu no dze adze bi toto adze fofor ho. Wɔdze nse bi toto adze ebien bi ntamu. Tetteh ko do ka de adze kor a ɔda edzi wɔ Akan mbe mu nye de dza wɔdze rototo ho no nndzi nse. Hwe mbe a ɔka do yi wɔ Tetteh (2013: 35);

*Hɔho tse de nsunsuansu.
Mansotwe tse de ɔdo mona, obi nntɔ mu mmfa noho.
Ɔbra tse de ahwehwɛ.*

2.8.3 Akan mbe a ɔye se-nyimpa

Se-nyimpa ye kasasu a wɔdze nyimpa su ma ndzɛmba anaa adze a ɔnnye nyimpa (Agyekum, 2013). Ɔkɔ do da no edzi de se-nyimpa dze nyimpa su bi tse de atsenka, bɔbea, suban, dwumadzi na adze ma mbowa, ndzɛmba a yennhu na adze. Mfatoho nye, *Ɔpe no ruku me*. Ɔpe nnye nyimpa na oenya nyimpa su bi a otum ku nyimpa. Tetteh dze ohu se-nyimpa de ɔye nyimpa ngyinahɔma a ɔper de ɔdze nyimpa su bema ndzɛmba a ɔnnye nyimpa. Nhwɛdo a ɔwɔ ase ha yi da Akan mbe bi a ɔye se-nyimpa edzi;

*Edziban ye dɛw a, tekyerɛma na ohu.
Enyiwa na ɔtan nyimpa, na asowa dze ɔnntan nyimpa.
Adar nngya ne ndam hɔ nnkɔ hamu.*

Minyae fii Tetteh (2013: 38) mu.

2.8.4 Akan mbe a ɔda nokwasɛm edzi

Tetteh (2013) hu de mbe dze kasasu a ɔye nokwar na nyimpa dodowara nyim to gua a yennkotum aka ne nyinara. Iyi no botae nye de ɔbeda nokwasɛm bi a ɔwɔ biribi mu edzi wɔ subuakwan mu. Mbe a ɔda nokwasɛm edzi no ye asentɔw tsiaba na nnye adze a wobotum ekwetsir no wɔ kwan biara do. Mbe a ɔdze nokwasɛm bi to gua no ne ntseasee nntaa nda edzi wɔ enyi do, ɔgye ndwenho kakra. Wotum so frɛ dem mbe yi kasa a odzi nse osiande wɔbɔ kasa kor no ara ho mpen ebien anaa dza ɔbor dem. Hwe nhwɛdo a ɔka do yi a ɔda edzi wɔ Tetteh (2013: 32);

*Dua wui nntwer dua wui.
Hɔho nnkyere hɔho.
Ewu ananmu fir ewu.*

2.8.5 Akan mbɛ a ɔyɛ enyido-ebirabɔsem

Enyido-ebirabɔsem su da edzi wɔ Akan mbɛ mu. Agyekum (2013) kyerɛ dɛ enyido-ebirabɔsem yɛ kasasu a ɔyɛ ebirabɔsem a sɛ ehwɛ asem no mu a, nkyɛ nyansa biara nnyi mu naaso sɛ ekɔ mu papaapa dze a, ihu dɛ nyansa wɔ mu. Ɔda edzi dɛ onnyi dɛ obi fa asem no enyido nkotsee. Nhwedo, “Abofra no yɛ papa no n’egya.” Tetteh, (2013) so kyerɛ dɛ, enyido-ebirabɔsem da edzi dɛ asem no ara nye noho bɔ ebira, mbom sɛ edwen ho yie a ihu dɛ ntseasee wɔ mu. Sɛ obi hwe bɛ a ɔyɛ enyido-ebirabɔsem a bɔdwen dɛ nyansa biara nnyi mu. Hwɛ mfatoho a ɔwɔ ase ha yi:

*Ɔbaa kɔ awar, ɔdze ne na kɔ.
Nyimpa wu a, ne gyirama mmporɔw.
Hɔho ba fie a, nna mbofra dzidzi.*

2.8.6 Akan mbɛ a ɔyɛ ebirabɔsem

Ebirabɔsem yɛ kasasu a dza obi ka no na dza ɔpɛ dɛ ɔdze to gua no nnyi twaka biara. Agyekum (2011) kyerɛ dɛ, ebirabɔsem yɛ kasasu a ɔkyerɛ dɛ asem a obi reka na dza ɔdze rekyerɛ no nnam bebiara koraa. Tetteh (2013) da no edzi dɛ ebirabɔsem a ɔwɔ bɛ mu no da nsem a ɔnye dza wɔreka ho asem no bɔ ebira, mbom ber biara mu no ndzesu anaa biribi a ɔkyerɛ dɛ ntseasee bi wɔ dza wɔreka no mu. Dza ɔka do yi yɛ nhwedo a minyae fii Tetteh (2013) mu;

*Dua katankyenankye na nsunsuan dze no resen yi, na emi eburohon dɔndɔnku
menyɛ dɛn?
Hɔn a wɔdze hɔn enyim rofow mpo wɔrepa, nna emi a medze m’ekyir.
Kɔtɔ mpo nsukɔm dze no, nna emi Okweku a meda sor.*

2.9 Akanfo mbe mu nsentsitsir mu bi

Ɔnam dwuma a mbe dzi wɔ Akanfo abrabɔ mu ntsi wɔnntoto be ase wɔ hɔn bra ne fa beebiara. Fitsi Akanfo bra n'ahyese, mekyere abawoo dze kesi owu na owu ekyir asetsena nyinara Akanfo hwe ho bu be. Akanfo gyedzi, enyamesom, edwumaye, awar na adze nyinara mu mmpa mbe. Tetteh (2013) da dza ɔka do yi edzi de ɔye nsentsitsir a ɔda edzi wɔ Akanfo mu no bi; Nyamesom, ahendzi na tumdzi, mpanyin na mbofra, ɔɔ, ebusua na adzedzi, ayamuyie, ahohoye, ɔbra, owu, suban pa na dza ɔkeka ho. Mensah (2020) kyere de dem nsentsitsir yi na Annobil akyere ato no dzin de, "Dza wɔhwe ho bu be no." Nsentsitsir yi boa da Akanfo amambra na enyamesom edzi. Mbe mu nsentsitsir no mu bi nye dza mapensapensamu wɔ ase ha yi;

2.9.1 Ahendzi na tumdzi

Tetteh (2013) kyere de, Akanfo amambra ma ahemfo enyidze na tum bi na iyi da edzi wɔ hɔn mbe mu. Ɔkyere de, Akanfo da suro na bu edzi ma hɔn ahemfo. Akanfo nntoto hɔn ahemfo ase koraa. Mbe a ɔfa Akanfo ahendzi na tumdzi ho na ɔka do yi;

- a) Ɔhen no ho beye few o, ɔbeye hu o, ofi nhenkwaafɔ.
- b) Ɔhen bɔn nnyi wiadze, na mbom ɔhen ɔkyeame bɔn na ɔwɔ wiadze.
- c) Ɔhen ntam tse de ɔdo mona; obi nntɔ mu mmfa noho tɔtrɔɔ.

Nhwedo a ɔwɔ sor hɔ nyinara ye mbe a ɔkasa fa ahendzi na tumdzi ho. Be a odzi kan no da enyidze a Akanfo wɔ ma ahemfo ntsi wɔma hɔn nhenkwaafɔ ma se worubopue gua do a wɔkɔhwe de ɔhen no n'afadze no obiara mmfaa bi nnyee noho na woesiesie no ma n'ahosiesie no aye dansewa. Akanfo mu no, ɔkyeame na ɔye ɔhen ne kasamaafɔ. Iyi ntsi ɔhen nnkasa baguamu basabasa. Ber biara a ɔhen bi bekasa wɔ bagua mu no, mpen pii no

ɔwasa ɔkyeame no ma ɔdze nsem no to gua. Iyi ntsi se ɔhen no ne kasa mu no no ho anntsew a ayeyaw na adapaatwa a obopue mu no nyinara ko ɔkyeame no ho. Be a otsia do ebiasa no so da Akanfo gyedzi a wɔwɔ no ntam ho. ɔhen ne ntam ye kurow no ne ntam ntsi se eka to a nna kurow no nyinara na ebur hon kur ntsi wɔtwe w'aso. ɔda edzi de Akanfo nnsɔer ara nnka ntam bi. Agyekum (2011) kyere de wɔka no ber a enyiber aba.

2.9.2 Edwumadzen mu wɔ akatua

Tetteh (2013) kyere de, Akanfo enyi so edwumadzen papaapa osiande akatua wɔ ekyir. Iyi ntsi wɔdze ye be dze forafora hon nsem mu dze tu fo na wɔdze bi so fora hon nsem mu ka ma nsem no ye dew. Se Akanfo rogor bra a, wɔkyere asakyima no mbre woku ntsin ye edwuma ma mfaso papa fi mu ba. Demara so na mbanyin no so rukosua edwuma a wotu hon fo fa edwumadzen ho. Mbe a Akanfo bu fa edwumadzen mu akatua bi nye;

- a) Akowaa hu no wura som a, ɔfa noho dzi.
- b) Asesaw nsu no ho mbɔn.
- c) ɔbra pa gya owura kwan.

Be a odzi kan no da dwuma a akowa nokwafo nya wɔ ɔsompɔ mu. ɔkyere de se akowa kum ne ntsir mu ye edwuma a, no wura tum pon no fi nkowasom no ase ma onya ne fahodzi. Dza otsia ebien no so kyere de nyimpa a odzi dwuma bi no nnye adze a adze no ho ndzinoa ba a ɔbepa no ho. Nhwedo a otsia ebiasa no so da no edzi de se ebɔ bra papa a ɔda w'enyim, demara so na se ebɔ bra bɔn so a ɔda w'enyim rotweɔn wo. Mbe ahorow yi nyinara da no edzi de Akanfo nntoto edwumadzen ase koraa osiande ndzinoa papa wɔ ekyir.

2.9.3 Edwumaye

Akanfo wɔ gyedzi wɔ edwuma mu, iyi ama hen abɔasefo ahwe ho ebubu mbe ahorow afa Akanfo ndwuma ahorow ho. Edwuma ye ɔman biara ne ngyinado. Ɔman anaa kurow a edwuma nnyi mu no ye tseaseewu osiandɛ dem kurow anaa ɔman no nnyi daakye. Mbe ahorow a ɔfa edwuma ho a Akanfo dze dzi dwuma no bi nye;

- a) Edwuma bɔn nntse de adzewia.
- b) Edaadaa wo dadze wɔ serebo enyim a, no so daadaa wo wɔ nkwanan enyim.
- c) Okuafo nnkɔ haban mu nngya ne dadze wɔ fie.

Mbe ebiasa a ɔka do yi nyinara fa Akanfo edwuma ahorow ho na gyedzi a Akanfo wɔ no wɔ edwumaye mu. Nhwedo a odzi kan no kyere de edwuma biara ye na ɔye enyimnyamhye ma nyia a ɔye dem edwuma no. Dem be yi ara so da Akanfo amambra bi edzi de wɔka adzewia enyim. Ɔda edzi wɔ be yi mu de nnye adze a Akanfo sosow adzewia do. Be a otsia ebien no so kyere de ridzi dwuma biara a pra wo yamu ye na enya ho mfaso pa osiandɛ dza ebeye biara no da w'enyim rotweɔn wo.

2.10 Dwumadzi a ɔfa dza enyimdzefo akyerɛw dada a ɔnye dwumadzi yi wɔ twaka

wɔ kasa a ɔnnye Akan kasa mu

Kasa ho nhwehwemu a ɔfa mbe ho no ye dza kasa mu enyimdzefo dodowara enyi gye ho wɔ wiadze mfendzanan nyinara. Mbe kɔ do da nyimpakuw bi hɔn adwenmusɛm edzi. Dem nyimdzee na dwumadzi a ɔfa mbe ho yi nnda edzi wɔ Akanman mu nkotsee, mbom ɔye adze a ɔda edzi wɔ atsenae ahorow a ɔwɔ wiadze nyinara mu. Iyi da no edzi de abemfo dodowara a wɔnnye Akanfo a wɔwɔ kasahorow mu aye nhwehwemu afa abebu ho. Dem

abemfo yi mu bi nye Nabifar (2013), a ɔhwɛɛ adwen mu nhyehyɛɛ a ɔkɔ do wɔ Persian na Borɔfo kasa mu mbe mu na ɔhwɛhwɛ ntseasee fofor na nsiananmu ɔda edzi wɔ mu. Nabifar pensapensaa Persian na Borɔfo kasa mu mbe eduonu (20) na ɔkyekyɛɛ mu ekuw du a ogyinaa hɔn ntseasee do. Ɔda no edzi dɛ wɔdze mbowa dzi dwuma wɔ Persian mbe mu kyɛn mbre wɔdze dzi dwuma wɔ Borɔfo kasa mu mbe mu. Mbom, mbe a ɔwɔ kasa ebien yi mu nyinara dzi dwuma kor na wɔda adwen mu kor edzi. Mpen pii no, kasa ebien no nyinara da adwen mu nhyehyɛɛ kor, ntseasee fofor na nsiananmu edzi. Hɔn ntseasee so nye hɔn nkyir wɔ twaka. Iyi dze pue gua do dɛ dza Goddard (2006) ka dɛ Persian na Borɔfo kasa mu mbe gyina hɔn amambra do no ye nokwar. Asetsena mu nsem ho hia papaapa wɔ mbe mu osiande wɔdze nsem to gua ma ɔboa bɛ no ne ntseasee. Iyi saso ntsi, mbofra amambra a mpanyimfo dze kyere hɔn no do sua.

Akinmade (2009) pensapensaa mbe a Ondofɔ a wɔwɔ Nigeria dze dzi dwuma. Nhwɛhwɛmu no da kwan a Ondofɔ dwɛn dwumadzi ho na ntseasee a wonya wɔ hɔn abosom ndzeyɛɛ ho. Kwan a wɔfa do da hɔn nyimdzee a ɔfa nkwa na owu ho nye dɛ wodua mbe do da no edzi. Akinmade da mbe bi a ɔda hia a ohia dɛ nyimpa dze noho behyɛ ɔman dwumadzi biara mu.

Nyia ɔwɔ adwen papa wɔ wiadze ho no nnye no nkotsee na odzi ho ndzinoa.

Akinmade (ibid) kyere dɛ, bɛ yi to obiara taferbanyimbɔmu dɛ wɔbɔboa ma wɔako ama ɔman no na obiara no mpontu na wongyaa mara medze anaa monko medze a ɔtwe ɔman no mpontu ekyir na ɔbɔ ɔman no adze wɔ sunsum mu.

Iyi mu no, Akinmade (2009) de mbre oda edzi wo Hughes (2006) mu no susu de;

*Se edwen wo nko wo kankɔ ho a, ibedzi okogu.
Mbom se edwen afofor kankɔ ho a konyimdzi beye
wodze.*

Be no kyere hen de yenye nyimpa a hen yamu ye na yemfa hen suahu mboa oman no mpontu. Ne nyinara da kwan a otwar de yefa do bo hen bra wo oman anaa kurom. Ondofɔ amambra hye hon nkuran de wonye etuhoakye mma hon man anaa kurow no mpontu na iyi da edzi wo dem be yi mu. Dem adwenpɔw yi a Ondofɔ amambra da no edzi yi so da edzi wo Mfantsefo a wɔwo Ghana mu. Be bi tse de “Monko me tsir mu, ɔporɔw” da no edzi de se enya wo nyenko anaa nkorɔfo kye dza ewo a oboa oman anaa kurow no mpontu, mbom se edze dza inyim no hye woho a onkyer na ahwer adze no. Akinmade da no edzi de be bi wo ho a otwe adwen si do de Otwerampon nkotsee na biribiara dzi wo no na odzi ma nyimpa. Hwe be a ɔwo ase ha yi;

Se abobow kor mu tow a, fofor bue.

Dem be yi kyere hen de oye Nyankopɔn na ohye nyimpa n’ehiadze nyinara na nnye nyimpa noara bi a. Se nyimpa ko hoomberew mu a oye Nyankopɔn na opegya no, nnye nyimpa na opegya no. Be ye kwasafɔ dze na oda edzi wo mbe a ɔwo Mfantseman mu. Hwe be a oka do yi;

Se biribi annsee a, birini rennye yie.

Bio, Malik (2017) ye adwenmusem mpensampensamu a ofa kasa ho mfaso a oda edzi wo Borɔfo kasa mu mbe mu. No nhwehwemu no da mbe ntseasee ahorow a wodze to gua na kasa mu mfaso a wodze to gua edzi. Malik no nhwehwemu no dze mbe totoo kasatum a mbe no wo de ɔpensapensaa ntseasee ahorow a woda no edzi ber a wodze edzi dwuma. Dza otwar de yehye no nsew ber a yerepensapensa kasatum mu wo mbe mu nye de mbe a wodze

dzi dwuma wɔ ber pɔtsee bi mu no nnkyere de yerobobo nkasafua a ɔwɔ dem be no mu, mbom, yeridzi lenguesteks nyehyee bi a yerudua do edzi kasa dwuma bi a ɔnye dza ɔnam ho ma wɔdze dzi dwuma no wɔ twaka (Akmajian na no dɔm 2001:387 de mbre ɔda edzi wɔ Malik 2017:54). Iyi kyere de mbe nye kasatum dodowara tse de afotu, kɔkɔbo, amandzɛebo anaa nkaabo nam. Hwe be a ɔwɔ ase ka yi;

Anapaber mu nyankontɔn ye kɔkɔbo.

Dem be yi nnkyere wimu nsesae a ɔbeba, mbom, ɔda kɔkɔbo bi edzi kyere etsiefo no (ɔnye de, nsu robotɔ). Mbom be yi ne nkyeremu mu no, dwumadzi ebiasa a biara dan ne nyenko na ɔko do wɔ mu: kasatraa no, kasa no ne ntseasee na kasa no no nsunsuando a onya wɔ etsiefo no do (a wɔye adze a ohia papaapa wɔ kasatum mu). Rubu be “*Anapaber mu nyankontɔn ye kɔkɔbo*” no na kasatum mu no yeka de ɔye kasatraa no. Dem dwumadzi yi nye de edze asentɔw a odzi kasa mbra do na ne ntseasee so tɔ aso mu na wɔabo dzin yie. Kasa no ne ntseasee no nye dza yɛpe de be no dze to gua, anaa eben kasatum na yɛpe de be no dzi. Be yi da edzi de ɔye kɔkɔbo ma dasanyi. Dza iyi kyere nye de ɔye kasatum a ɔnnye akwantsen a wɔdze bo kɔko. Hwe nhwedo a ɔwɔ ha yi;

Ewia rehyeren mununkum n'ekyir.

Dem be yi wotum dze dzi dwuma wɔ ber a mununkum mmbaa wimu wɔ hen daa daa abrabɔ mu. Ehwe no yie a, be yi ne nkyeremu mu no ɔda kasatum a ɔnnye akwantsen a ɔko ndɔnkɔye edzi na kwan a wobobu nyimpa nyinara de wɔye kor wɔ hɔn dwumadzi biara mu. Malik kyere de, dem be yi wɔ abakɔsem bi a Amereka mampanyin (Eisenhower) a ɔpeer perperye maa no nkorɔfo no ho. ɔdze dem be yi dzi dwuma de ɔye asetsena mu akadze a nna ɔdze roboa ada ne gyedzi a ɔwɔ wɔ perperye mu (Mieder, 2004: 183 de mbre ɔda edzi wɔ Malik, 2017).

Asentsitsir a ɔfa be ho a Akmajian da no edzi no nnye soronko mmfi Mfantsefo dze ho kora. Mfantse mbe da kasatum a wotum dze sɔw ɔhaw ano anaa wɔdze hwehwe mbuae ma ɔhaw bi a opue Mfantsefo mu anaa hen atsenae mu na kwan a wɔfa do bɔ nkorɔfo kɔkɔ edzi. Hwe be a ɔwɔ ase ha yi;

Beebi a enyidado nnyi no, ho na mboa fi ba.

Bio, Yakub (2018) pensapensa asetsena-amambrasem a ɔfa abotarsie ho de mbre Nzema a ɔka Niger-Congo kasakuw a wɔka no wɔ Atɔree mantɔw no n'anafo na n'atɔree afa mu no da no edzi wɔ mbe bi a ɔpawee ye nhwehwemu no mu. Yakub dze "Ethno-pragmatic" adwenmusem a Goddards (2006) dze too gua piaa no dwumadzi yi ekyir. "Ethno-pragmatic" adwenmusem yi kyere de se betse kasa bi ase yie a nna ogyina n'amambra do. ɔda edzi de Nzemafo gye abotarsie to mu wɔ abrabɔ ne fa biara mu. ɔgye dzi de se abotarsie tum ye edwuma wɔ nyimpa asetsena mu a, ɔboa tsew wentwiwentwi do na ɔma asomdwee ba hen sɔn mu na hen nkurow mu. Yakub (2018) kyere de, Nzemafo dze abebusem hyehye hon kasa dwumadzi ahorow tse de nkaenyim, abawdobɔ, nkuranhye, adzekyerɛ, enyigyesem na adze mu de mbre ɔda edzi wɔ amambra ahorow a ɔwɔ wiadze nyinara mu no. Iyi kyere de se wɔdze be dzi dwuma wɔ ne ber mu a, ɔnam kwan bi do to nkra. Hwe nhwɛdo a ɔka do yi;

Inya abotar gua ntsetseba a, ihu n'ayamudze.

Ntsetseba ye abowa a osian mbre ne kese tse ntsi nnye adze a botum egua no. Mbom be yi rekyere hen de se yɛdze abotar ye a yebotum egua ntsetseba no na yeetum ehu n'ayamudze. Iyi da edzi de se yɛdze abotarsie ye biribiara a wɔ abrabɔ mu a, yebotum aye no yie ma yeenya ho mfaso. Be yi kyere de otwar de nyimpa nya abotar wɔ no dwumadzi biara mu.

Ɔwɔ mu de dem nhwehwemu dwumadzi yi fa mbe a wɔdze dzi dwuma wɔ Mfantse ekuadwuma mu, mbom ne beebi nye Nzemafo dze no se. Mfantsefo mbe no bi wɔ hɔ a ɔda hia a ohia de nyimpa nya abotar wɔ ne bra mu. Be bi tse de; “*Abotar tutu nkokwaa*”. Ehwe mbre kokwaa tse a, nnye adze a ɔda famu de obi botum etutu ma aye yie, mbom se inya abotar a ibotum etutu no nkakra nkakra ma aye yie. Dza be yi kyere hen nye de abotar ho hia wɔ nyimpa ne bra mu papaapa. Nzema nsemboano no kyere de mbe bi wɔ hɔ a ɔnye iyi bɔ ebira. Dem mbe no kyere de ɔtɔfabi a otwar de nyimpa per noho si gyinae wɔ ne bra mu ama aboa no ma oetum esiw ɔhaw bi ano wɔ ne bra mu. Be bi tse de;

Abaa a ɔbɔwɔ w’enyi no wotu ase ntsemara.

Nyimpa n’enyiwa nye ne kandzea ntsi se ɔwer n’enyiwa a nna ɔhaw kese na ebodwir nyimpa no. Iyi ntsi se ɔba no de abaa bɔwɔ obi n’enyi ma ɔdze no ako ɔhaw a ɔtse dem mu a nna nyimpa no pe kwan a obotum eyi dem haw a abaa no botum dze abre no no ntsem. Kwan a nyimpa no botum dze eyi efi hɔ korakora nye de obotu dua no a obotum awɔ enyi no ase ntsemara. Dwumadzi yi dze be a ɔfa abotar ho bɔto gua wɔ ɔfa a ɔtɔ do anan wɔ dwumadzi yi mu.

Inusah na Issahaku (2019) pensapensa dwuma a mbe dzi wɔ Dagbambafo mu. Dwumadzi yi pensapensa Dagbanifo hɔn anokasadwin mu de ɔye adze a ɔboa hɔn amambra no mpontu. Nsentsitsir a ɔka do yi na wogyinaa do yee mpensapensamu no; nyimdzee, abotar, ewudzisem, ahoozen, awar, esumasem, suro, korye, mbe a ɔfa Nyankopɔn ho wɔ Dagbani ndwom mu. Ɔda edzi de Dagbanifo mu no, nnye beebiara na wobu be; naaso yennkotum dze ber pɔtsee bi wɔ hɔ a wogyina do bu be. Iyi kyere de mbe mmba ara bi, ogyina dwumadzi kor a ɔrokɔ do no na ɔkyere be kor a wotum dze dzi dwuma wɔ mu. Menye hɔn

yɛ adwen osiandɛ Mfantse mbɛ so mmba kwa anaa Mfantsefo mmbu bɛ kwa, wogyina dza ɔrokɔ do no do bu bɛ. Wotum gyina dwumadzi a ɔrokɔ do bi tse dɛ awargye, eyiye, amanyesɛm mu ntoabɔ mu, na dodowara a wɔkeka ho.

Dagbambafo mu no, obiara a ɔdze bɛ dzi dwuma wɔ ne ber mu no wobu no dɛ n'ano atsew. Agyekum (2012) gye dem asem yi to mu dɛ mbre Owu-Ewie (2019) dze to gua, ɔno nye dɛ, se obi tum dze bɛ dzi dwuma yie wɔ ne ber mu a ɔkyere nyimpa no n'ano tsew a atsew wɔ kasa no ho. Mbɛ a ɔwɔ Inusah na Issahaku (ibid) mu a ɔfa nsentsitsir na dza wɔhwe ho bu bɛ mu no da adze bi a ɔwɔ bɛ ho a ɔda edzi wɔ wiadze mfɛndzanan amambra na kasa nyinara mu. Mfantsefo mu no, bɛ bi tse dɛ, *Se eto wo bo ase gua abowa ntsetsea a, ihu ne yamu adze*. Dem bɛ yi yɛ kasatum a ɔda abotar edzi na hia a ohia dɛ nyimpa sie abotar wɔ ne bra mu. Mprempre dwumadzi yi da mbɛ bi a Mfantse ekuafɔ dze dzi dwuma wɔ hɔn dwumadzi mu a mebepensapensa mu ekyir yi. Mbɛ Yakub (ibid) da no edzi dɛ mbɛ a ɔfa abotar ho no wɔ mbɛ a ɔnye no bɔ ebira no, Inusah na Issahaku (ibid) dze no nntse dem. Mo hu dɛ nnye dɛ mbɛ a ɔtse dem nnyi Dagbani mbɛ mu, mbom enyi ara na wɔannkyea annhwe hɔ.

Azure (2010) pensapensa Gurenɛ mbɛ mu a ogyinaa ngyinado ebien do; mbɛ mmpue ara bi, mbom wogyina dwumadzi a ɔrokɔ do no do bu bɛ no. Dza otsia ebien nye dɛ, binom wɔ hɔ a nnye adze a ɔwɔ hɔ dada, mbom wɔhwe dwumadzi no ho na wɔdze ayɛ bɛ fofor ebu. Azure pensapensa Gurenɛ mbɛ mu a ɔhwɛɛ nsentsitsir na kasasu ahorow a ɔda edzi wɔ mu. ɔda no edzi dɛ Gurenɛ mbɛ tse dɛ mbɛ ɔda edzi wɔ amambra ahorow mu no.

Gurenɛ mɛ wɔ ntseasee ebien, enyi do ntseasee na bɛ no ne ntseasee ankasa a bɛ no ne ntseasee ankasa no nnda edzi pefee. Yɛmfa bɛ a ɔwɔ ase ha yi nyɛ mfatoho;

Panyin na onyim mbrɛ wansema ne yamu adze wɔ.

Bɛ yi kyere dɛ nyimdzee, nyansa na suahu a abotar na ahweyie ka ho a mpanyimfo na wɔwɔ, a ntsi wotum gyinado dze siw ɔhaw dodowara ano na wɔdze pɛ nyiano ma nsɛm a no mbuae ehunta. Azure no nhwehwɛmu no gyina nsentsitsir ebien do; dza ɔfa nyimpa ho na dza ɔfa ɔdomankoma na mbowa ho. Kasasu a ɔpensensa mu nye ngyinahɔma, sɛ-nyimpa, nsawɔwdo, bawor ngyegyee ntoado, ngyegyee kor, nkɔnsonante ntoado na adze a ɔdze dzi wɔ mɛ no mu.

Gurenɛ mɛ a ɔdze dzi dwuma no nyinara yɛ dza ɔfae fii nyimpa ne daa daa abrabɔ mu na suahu a nyimpa dze bɔ bra mu na nyimpa no su ahorow bi mu. Dɛm mɛ yi so twa mfonyin fa mbowa, nnoma, ndua na ɔdomankoma ndzɛmba ahorow bi ho. Ehwe Gurenɛ bɛ a ɔwɔ sor hɔ yi a ɔda nyimdzee a mpanyimfo wɔ wɔ ɔhaw ano nsɔwee mu yi, yebotum enya dɛm mɛ yi bi wɔ Mfantse mu so. Hwe bɛ bi tse dɛ *dza panyin kotow hɔ a ohu no abofra gyina atwer do mpo a nnye adze a obohu*. Bɛ yi kyere hen nyimdzee na suahu a mpanyimfo wɔ a wotum dze boa nyimpa ne daa daa dwumadzi na ɔboa so ma wotum sɔw ɔhaw ahorow ano.

Dorjey na Singh (2004) yɛ nhwehwɛmu fa mɛ ne mpensapensamu, nsesa a aba mu na ekuafo nyimdzee a wɔda no edzi mu. Hɔn dwumadzi yi dze enyi tsiim mɛ ebien a Yadavfo dze dzi dwuma wɔ hɔn dwumadzi mu do. Mbrɛ mɛ da edzi wɔ kasa ahorow mu dɛ ɔyɛ nsɛm tsiabaa no (Hwe Agyekum, 2005, 2012; Borenstine 1999; Owu-Ewie, 2019;

Finnegan, 1970), Yadav mboanosem no nye dem nkyeremu yi bɔ ebira. Yadav mboanosem no da edzi de mbe nnye ntsiantsia de mbre kasa ho enyimdzefo binom ka no. Be bi tse de;

Odu Ayewoho bosoom no ne mfinimfin na Dzifuu bosoom no ne mfinimfin a, ber a mframa bɔ fi epue kɔ atɔree no a, ekuafo ntɔn hɔn funtumdadze nkɔtɔ nnantwi, osiande biribiara nnkyere de nsu bɔtɔ wɔ dem bosom yi mu.'

Adar ber ahyese na Hast ber ewiei no, se okuanyi annhwe n'edwuma yie de obesiesie n'asaase na woedua aba a, ɔbɔberɛ ekwir yi.

Se obi betse be yi ase a gyede onya dza ɔnam ho ma ɔdze be no bae no ho ntseasee, mbom ɔnnye de ɔye asem tsiabaa bi ara keke. Muhu de dem Yadavfo be yi nnye war nkotsee na ɔwawaree, mbom idzi agor kakraabi a wo were befir. Siantsir a mereka dem n ye de otwar de nyia ɔdze be no ridzi dwuma no tum kaa dza osii no. Mbom Mfantse mbe mu no, ɔnnhye da nnhia asem tsentsen biara, ne ntseasee no na ɔye a no mu do ma ntsi ɔgye ndwenho. Shamsutdinova na no dom (2017) pensapensa mbe a ɔwo kasa bi a wonndzi nse tse de Borɔfo kasa, Arabic kasa na Tatar kasa wo nde mber yi dawurbɔ nkrataa na nwoma ahorow mu. Iyi de wɔdze be dzi dwuma wo kasafir do no fi ho a, nna wɔpe de wohu nsesa a aba mbe mu wo hɔn nhwehwemu no mu. Shamsutdinova na no dom (2017) kyere de ndzembra ebien na ɔnam do ma nkorɔfo bu be: odzi kan no, nkorɔfo bu be de mbre ɔbeyɛ a wobotum akora hɔn amambra a ɔwo ho fi tsetse no, dza otsia ebien nye de ɔboa ma akasafo no tum sesa kwan a wɔfa do kasa. Oda edzi de mbe dze nsesa ebiasa ba kwan a wɔdze kasa dzi dwuma wo kasafir do mu. Dza wɔda no edzi kor nye de wotum da edzi wo kasa mu de mbre wɔtse no ara a wɔmmfa nsesa biara mmba kasa nhyehyee mu. Dza otsia ebien nye de dem akasafo yi hɔn dwumadzi mu no wotum gyina be a ɔwo ho dada do dze be fofor to gua. Dem nsesa a ɔba be a ɔwo ho dada no mu no tum ye dza ɔnam kasafua, kasafua nhyehyee

anaa nsentɔw nhyehyɛ do. Dza otwa tun nye de, ankorankor nam be do dze nsem afofor to gua. Ha na akasafo nam kasa ntseasee do dze be dzi dwuma ma ɔnye dza ɔrokodo no saa.

Dem su a Borɔfo, Arabic na Tatar kasa wɔ wɔ kwan a wɔfa do dze be dzi dwuma wɔ nde mber yi dawurbɔ kwan do yi so da edzi wɔ Akan mbe ho. Hɔn a wɔdze kasa dzi dwuma wɔ dawurbɔ nkrataa na nwoma ahorow mu a wɔdze be dzi dwuma no dze be no dzi dwuma wɔ kwan bi do a ɔnye dza ɔrokɔ do no wɔ twaka de mbre ɔda edzi wɔ Shamsutdinova na no dom (2017) mu no. Mprempre nhwehwemu yi hwehwe be anaa mbe a Mfantse ekuafɔ binom dze dzi dwuma wɔ hɔn dwumadzi mu.

Yankah (1989) n'adwenkyere mu no, mbe ye kwan pa a wɔfa do da nokwasem bi a ɔwɔ asem bi mu edzi. Iyi da edzi de adwensu a nyimpakuw bi bu no de ɔda nokwasem a ɔwɔ dem nyimpakuw no edzi do da edzi wɔ hɔn mbe mu. Dem adwensu yi na Sultan (2013) pensapensa Saraiki mbe a ɔfa mbasiafo a wɔwɔ Pakistan a woguan fi hɔn awar ase osian atsetsee a wɔkɔ mu wɔ awar no mu ntsi. ɔda edzi de kwan a otwa tun a mbasiafo yi dua do wɔ awar mu atsetsee mu ara nye de woboguan efi awar no ase. Sultan n'edwuma no da kwan a Saraiki mbe yi da dem mbasiafo suban yi edzi. Hwe Saraikifo be a ɔka do yi;

*Nyia oegu awar no mfaso biara nnyi noho, mbom nyia ɔtsena awar ho no som bo.
Wɔnngye ɔbaa a oguan fi awar ase ndzi.
ɔbaa a no ho nnye few som bo kyen ɔbaa a ɔwɔ suban bɔn (Oguan fi awar ase).*

Sultan da no edzi de, mbasiafo a woguan fi awar ase no mbe no ma hɔn gyinabew forfor, wɔbu hɔn de nkekaa a ɔwɔ ebusua wɔwɔ mu no n'enyimnyam ho. Bio, wɔtsetsee ɔbaa no wɔ fie ansaana oeguan efi fie hɔ na ekyir yi n'atsenae mu nhyehyɛ bi so twe n'aso. Nnye

mbanyin nkotsee na wõtseetsee dem mbasiafo a woguan fi fie yi, hõn mfefo mbasiafo noara bi so ka ho ma wõtseetsee hõn.

Nsunsuando a mbe nya wõ hen bra do no nnye adze a wõto no ase a õbeyeyie. Wotum dze dwuma wõ dwumadzi dodowara mu tse de ndwumayekuw mu, bambõ mu, abotar mu, na adze. Albert (1977) so da dwuma a Swahili mbe a õda edzi wõ amanyesem mu edzi. Òkyekye mbe no mu ekuwekuw bi tse de ka-bi-ma-menka-bi, nyimpa noara, amanyekuw, amanyekuw nsesamu amanyesem mu ntoabõ, õkogu, konyimdzi, nyimpa a wõwõ tum, ketesehye, nhwehwemu, nkatado, ambatow no mbobõe na ambatow no ewiei nsensem. Albert da no edzi de Swahili wõ dem nsentsisir ahorow yi nyinara wõ South Africa amanyesem mu. Hwe Swahili nhwedo a õwõ ase ha yi;

Nyimdzee tse de nhwi, obiara wõ nedze. (adwenkyere)

Nyimpa dodow bagua nye abaguakuw; nyimpa kor nntum nnye abaguakuw.

Mbe a õwõ sor hõ yi kyere de obiara ho hia wõ õman mu osiando obiara n'adwenkyere ye soronko na ohia ma õman no mpontu. Fie mbowa bi tse de mbõdõm, ngyinambowa, mpõnkye, nkokõ na adze so hõn su da edzi wõ nkurow dodowara mbe mu. Nyimpakuw bi adwensu tum da edzi wõ mbowa wõwõ hõn atsenae mu. Iyi mu no, Kobia (2016) da mbe mpensapensamu a õfa fie mbowa ho na nkyere ase fofor a wõda no edzi. Òdze no dwumadzi no gyinaa nkokõ nkotsee do. Òda edzi de nkokõ dzi dwumason wõ Swahili mbe mu. Osi no pi de Swahili nkurow da mfaso a mbe dzi de õye hen a õsoa hen nkõmbõdzi. Iyi kyere de yetum dze be dzi dwuma wõ nsem ahorow mu wõ kasa ahorow mu. Kobia dze akokõnyin gyina hõ ma nyimpa banyin na õdze akokõber gyina hõ ma nyimpa basia na akokõ ba so gyina hõ ma nyimpa a õye abofraba.

Swahili mboanosem no da no edzi de mbe a ofa nkokomba ho no tum nya nsentsitsir bi tse de akokodur, enyiodzen, adzebu na adze. Swahilifo adwensu da edzi wo nkokomba a wodze hon dzi dwuma wo hon mbe no mu. Kobia no nhwehwemu no da no edzi de wodze nkokomba toto nyimpa ho ma woda nyimpa su bi edzi. Hwe be a oka do yi;

Akokɔ a abowa aka no da no se enam a ohwe noho yie.

Swahilifo be yi mu no, akokober gyina ho ma nyimpa a obra dze no asewew da anaa woehyia ehyiakwa bi wo obra mu pen. Beebi a nyimpa a otse dem biara nam no onyim de obotum ehyia dem ehyiakwa no bi ntsi ohwe noho yie. Suro na nyimpa no suro, ono nnkyere de oye ohufo.

Mbowa ngyinahoma a oda edzi wo mbe mu yi da awofa na mba ntamu nkitahodzi a oko do wo abrabo mu. Swahili mbe bi mu no, dem nkitahodzi yi bi nye bambɔ, adzebu, ahweyie na adze. Iyi da edzi wo dem Swahilifo be yi mu:

Akokɔ nsee noara ne kyirefua.

Akokober no gyina ho ma obaatan a owo abadaa wo Ebibir mu. Oye abaatan asedze de wohwe hon mba yie. Obaatan a ohwe de obema ne ba nwomasua mapa na enyidze a wodze ma mpanyimfo no nnye adze a ope ne mba no hon bi. Abaatan hon abatsetse na ntsenae mu no oye a woye ahweyie papaapa. Onntaa nnsi de obi bedzi noara no ho nyimpa no wer. Dem be yi da dwuma a mbaa dzi wo hon abatsetse mu wo oman mu.

Bio, wodze enyidze na obu soronko ma mbasiafo wo oman mu osian hon abawoo na dwumadzi ahorow a ofa abawoo ho wo hon atsenae mu ntsi. Wohia obu na ahobambo osiande wotsetse mbasantsen a woreba no. Mbasiafo hon abatsetse na abawoo dwumadzi

yɛ adze a ohia Swahilifo yie. Sɛ ɔbaatan bi anntsetse ne ba yie a otum haw abofra no na otum so haw ɔmanmu no so. Bɛ a ɔwɔ ase ha yi da no edzi;

Wɔnntow abobaa mmbɔ akokɔ a ne mba dzi n'ekyir.

Osiandɛ mbe dzi dwuma ahorow ntsi, otwar dɛ yɛhwe kwan a mbe fa do da hɔn a woedzi dzɛm edzi wɔ hɛn atsenae mu. Devlieger (1999) hwɛhwɛ Ebibbir mu mbe bi a ɔfa dzɛmdzi ho. Ɔkyerɛ dɛ adze kor a ɔhaw adzesua a ɔfa nyimpa a woedzi dzɛm ho nye kwan a wɔda hɔn edzi wɔ asetsena mu nsem mu. Dɛm nhwehwɛmu yi gyina kwan a wogyina mbe do hwɛ kasa a wɔdze dzi dwuma fa dzɛmdzi ho na mbrɛ asetsena mu nsem da hɔn edzi. Reka dzɛmdzi ho nsem wɔ atsenae mu a ɔdze ɔhaw kakra brɛ hɔn a wɔdze kasa dzi dwuma wɔ dɛm kasa no mu osiandɛ wosuro dɛ wɔbɛkasa etsia hɔn a woedzi dzɛm. Hwɛ Swahili na Shonafo a wɔwɔ Zimbabwe hɔn abɛbusɛm a Devlieger, (ibid) dze to gua yi;

Sɛ eserew obi a oedzi dzɛm a wɔ ba so bedzi dzɛm.

Obi a ɔserew obi a oedzi dzɛm no bedzi dzɛm ansaana oewu.

Wo wu ekyir na botum aserew obi a oedzi dzɛm.

Dɛm mbe yi da nsentsitsir a ɔyɛ kɔkɔbɔ edzi a ɔkyerɛ dɛ onnyi dɛ obi dze obi ne dzɛmdzi serew no, osiandɛ obi nnyim ne gwinabew wɔ abrabɔ mu wɔ dzɛmdzi ho. South Africafo wɔ gyedzi bi dɛ Nyankopɔn mmbɔ nyimpa nnwie gyedɛ nympa no ewu. Iyi saso ntsi, otwar dɛ obiara yɛ ahwɛyie wɔ asereserew a ɔfa hɔn a woedzi dzɛm ho.

2.11 Dwumadzi a ɔfa dza enyimdzefo akyerɛw dada a ɔnye dwumadzi yi wɔ twaka

wɔ Akan kasa mu

Dɛm fa yi yɛ mpensampensamu fa nhwehwɛmu a enyimdzefo akyerɛw dada a ɔnye dwumadzi yi wɔ twaka. Akan mbe ho nhwehwɛmu yɛ adze a kasa ho enyimdzefo dodowara

enyi gye ho ma wɔye ho nhwehwemu. Nyia odzi mu adɔntsen nye Yankah (1991) a ɔye nhwehwemu fa asetsena-amambrasem ho mfaso a ɔfa anomusem a ɔfa Akan kasa a ɔwɔ Ghana no ho. Ɔhwɛ kasasu na kwetsikwan ahorow a akasafo dua do dze hɔn nsem to gua ma ɔtsew enyimtsiabu do na ɔbɔ enyimpa ho ban wɔ kasa mu. Ɔtwe adwen si kwan a nkorɔfo dze abɔdzin, mbe, ngyinahɔma na nsem a woefura no tam ahorow forafora hɔn kasa mu. Akasafo a wɔkasa wɔ baguamu dua kasambrienyi, tsetse kasa na be do da hɔn nyimdzee a ɔwɔ kasa mu edzi (Yankah 1991). Ɔkɔ do kyere mu de mbe anaa ngyinahɔma a wɔdze dzi dwuma no boa bɔ enyimpa ho ban wɔ baguamu kasa mu. Brown na Levinson ne Penelope (1978:35) de mbrɛ ɔda edzi wɔ Yankah (1991) mu no kyere de, ɔkasafo no, de mbrɛ ɔdze kasawan dzi dwuma guan fi enyimtsiabu a ne kasa no botum dze aba do. Borenstine (1999) ye nhwehwemu fa Twi kasa mu mbe na mfonyin ho. Agyekum (2005) so hwehwɛ mbe a Kwabena Konadu dze dzii dwuma wɔ no ndwom mu; ɔhwɛ nsenstisiri bi na kwan a ɔfaa do dze mbe no bi dzii dwuma wɔ no ndwom no mu.

Amate (2011) pensapensa Akan mbe a ɔfa ndzɛmba a yɛdze hɛn enyi hu ho. Amate bɔɔ mbe eduanan bi enyikam a ɔreyɛ ayew na ɔyɛ nsenkyerɛdze bi maa dem mbe no. Agyekum (2012) hwɛ Akan mbe na mpanyin kasa a ɔfa awar ho. Dwumadzi no mu no, ɔhwɛ mbrɛ Akanfo dua do kyerekyere awar mu, awar ho nhyehyɛ na mbrɛ Akanfo hu awar. Steve na no dɔm. (2013) Da nsenkyerɛdze a ɔwɔ Akan mbe mu na asetsena-amambra ho nhyehyɛ a wɔfae fii Akanfo a wɔwɔ Ghana hɔn mbe mu. Ɔda nsenkyerɛdze bi a ɔda edzi wɔ mbe no mu. Agyemang na no dɔm. (2015) hwehwɛ Akanfo a wɔwɔ Ghana mu hɔn mbe mu mfaso a ɔdze ma nde mber yi nyimpa dwumadzi nhyehyɛ na ɔbrapa nhyehyɛ. Dwumadzi yi da kwan a mbe fa do dze nkyerekyeremu to gua fa nyimpa asetsena mu nhyehyɛ dwumadzi

bi tse de nkabomu dwumadzi, ntsetsee na mpontu, dwumadzi mu mponnee ho ntotoe, edwumayekuw mu mbra na dza okeka ho.

Agyekum (2017) yee nhwehwemu faa 'ohia' mbe wo Akanman mu. Okasae faa dza oye hu, ankorankor, amambra na nhyehyee a okyerokyere 'ohia' mu wo Akanman mu. Amfo na Diabah (2018) so dzi dwuma fa manyinsem na no ho nsunsuando wo Akan mbe mu. Hon dwumadzi no hwehwe de oda dza Akan mbeusem no pe de oda no edzi fa manyin hon dwumadzi wo Akanman mu. Nhwehwemu kor so a onye Agyekum (2012) dzi nse nye Owu-Ewie (2019), a oada mbe no dwumadzi edzi wo Akan awar mu kasakyere mbe mu wo Akanfo mu. Oada nsentsisir bi tse de korye, abotar, bu a wodze ma nsewnom, edwumadzen na adze edzi.

2.12 Adwenmusem ho akwankyerɛ: 'Conceptual Metaphor' Adwenmusem

Dwumadzi yi dze 'Conceptual Metaphor' Adwenmusem bedzi dwuma yi. 'Conceptual Metaphor' adwenmusem fi metafo adwenmusem mu bae. Yerepe metafo farbae a yebotum ehu no wo Lakoff na Johnson (1980) nhwehwemu a oato no dzin Metafo a oda edzi wo hen abrabo mu. Lakoff na Johnson (1980) susu de, "Metafo no nye ntseasee na suahu a yenza fi biribi mu a ogyina adze fofor do. Wokyerɛ de, adwensu a oye metafo hia wo ntseasee a yedze ma ndzɛmba ahorow a oko do wo wiadze yi mu. Woko do kyere de, nhyehyee kitsa metafo su dada. Ono nye de owo metafo na annto-metafo adwensu. Nhyehyee a onnye metafo nye dza yenza no wo suahu mu no, na honara kitsa hon nkyeremu dada. Ntsi, metafo adwensu nye dza yetse ase na owo nhyehyee a ongyina honara hon ntseasee do, mbom ogyina adwensu bi do.

Janda (2010) si iyi dua ka de metafo nye de yeretserew abose adwensu mu ako adwensu a yere de yeka ho asem no ho. Ono nye de ber biara a akasafu dze adwensu bi a owo ho dada na ope de odze ye adze fofor no, nna metafo edzi dwuma.

Geeraerts (2010) da no edzi de, metafo wo ngyinado etsitsir ebiasa, dza odzi kan nye de, metafo ye adwen mu nhyehyee, osiande metafo nngyina nkasafua no nkotsee do, mbom oye adwen mu nhyehyee a no mu do a otsentsen kwan yefa do dwen (nnye kwan a yefa do kasa), Iyi kyere de, metafo tra de yedze nkasafua no ridzi dwuma ara. Oda edzi wo hen adwen mu. Se betse metafo ase a, ohia adwen mu nhyehyee a ofa kasa no ho a hon a woka kasa no wo. Metafo dze ankorankor nkasafua no ko adwendwen mu na aboa ma yeehu ntseasee kor a nkasafua no pe de oda no edzi. Iyi kyere de metafo ye adwen mu mfonyintwa a ofa nkasafua ho.

‘Conceptual Metaphor’ adwenmusem ne ngyinado a oto do ebien nye de oye adwenmu ntotoho a ofa adze ebien ho. Ogyina dem ngyinado yi do na yeny ntseasee fofor. Metafo twa adwen mu mfonyin a wo kasafua bi ne ntseasee fofor ho a ne ngyina do nye kasafua no n’abose ntseasee no. Iyi na ohwe nkitahodzi anaa twaka a oda ekuw ebien no ntamu no. Richards (1935) de mbre oda edzi wo Geeraerts (2010) mu no da no edzi de abose kasa no nye tseaseanam a odze metafo no nam, ntseasee fofor no nye ndzamba a hen no dze roko no na nkitahodzi no nye kwan no a tseaseanan no nam do no. Dza odze iyi kyere ara nye de abose kasa ne ntseasee na ntseasee fofor no nyinara ho hia papaapa wo metafo ne ntseasee mu.

Evans na no dɔm. (2007) si iyi do dua de adwensu nhyehyɛɛ no gyina nkitahodzi a ɔda abɔse kasa ntseasee na ntseasee fofor no ntamu do a ɔka nyimpa no n'adwen mu mber tsentsen. Yenhwɛ nhwɛdo a Kövecses (2002: 7) dze to gua a ɔda edzi wɔ Geeraerts (2010) da no edzi no.

Ɔdɔ ye akwantu

Abɔse kasa

Akwantufo no

Akwantu no

Akwambew a ɔwɔ akwantu no mu

Nsusui a ɔfa kwan pɔtsee a wɔmfɔ do

Bea a wɔrokɔ

Ntseasee fofor

Adɔfo no

Ɔdɔ akwantu no

Nkukuhwease a wobehyia wɔ hɔn dɔ no mu

Nsusui a ɔfa dza wɔnyɛ ho

Ɔdɔ akwantu no no botae

De mbre nkorɔfo tsia hɛn na worutu kwan a wɔyɛ no, demara na ɔda edzi wɔ nkorɔfo beenu a wɔatɔ ɔdɔ mu so tse. Wɔdze botae bi si hɔn enyi do de mbre akwantufo a worutu kwan so dze bea pɔtsee a wɔpe de wɔkɔ no si hɔn enyi do no. Akwantufo no gyina hɔ ma adɔfo no, na kwan a wɔbɛfa do etu kwan no nye ɔdɔ nkitahodzi no ankasa. Akwantu no gyina hɔ ma ɔdɔ akwantu no, na akwantu no mu kwambew no so gyina hɔ ma nkukuhwease a adɔfo no bɛfa mu wɔ hɔn dɔ akwantu no mu. Nsusui a ɔfa kwan kor a wɔbɛfa do no so gyina botae a adɔfo no dze besi hɔn enyi do wɔ hɔn dɔ akwantu anaa nkitahodzi no mu.

‘Conceptual Metaphor’ adwenmusem ne ngyinado a otwa tun nye de metafɔ gyina suahu do: nyimpa no suahu tum dandan kasa anaa tum nya nsunsuando wɔ kasa do. Dem ngyinado yi nye adwen mu nhyehyɛɛ lengwestekese wɔ twaka. Geeraerts (2010) hu de, yɛntse nsem ase ara bi osian kasafua bi ntsi, mbom yetum so gyina su bi do dze ntseasee fofor ba. Evans na no dɔm. (2007) ma yetse ase de yetum kasa fa dza yehu na yetse nkotsee

ho, na dza yehu na yetse no na ɔbɔ mu ma hen suahu. Iyi kyere de nyimpadua no wɔ suahu ahorow pii a ɔma obiara nya adwen fofor bi fa wiadze yi ho.

Mefaa ‘Conceptual Metaphor’ adwenmusem yi ne fa a otsia ebien no do dze epia dwumadzi yi ne mpensampenamumu ekyir osiande ɔbɔboa ma yeehu ntseasee potsee a mbe a Mfantse ekufɔ dze dzi dwuma no da no edzi. Muhu de Mfantse mbe a ɔfa ekuafɔ ho no mu dɔ a, ohia ndwenho ana atse ase, iyi kyere de nnye be no a wobu no ara nye ntseasee a ɔdze to gua, ɔwɔ ntseasee fofor a ɔgye ndwenho ana etsiefo no atse ase.

2.13 ɔfa yi no tɔfabɔ


ɔfa yi ada enyimdzefo bi adwenkyere a ɔfa tsir asem yi ho. Mfantsefo na kasa a miridzi ho dwuma yi, be n’adzeban anaa be ne nkyeremu, Akanfo be no su na ne nhyehyee, dwuma a nkorɔfo edzi afa be ho wɔ kasahorow mu, dwumadzi a nkorɔfo edzi a ɔfa be ho wɔ Akan kasa mu, adwenmusem akwankyere na ɔfa yi no tɔfabɔ da edzi wɔ ɔfa yi mu.

TSIR EBIASA

NHWEHWEMU AKWAN

3.0 Nyienyim

Dem ofa yi da nhwehwemu kwan a mefaa do dzii dwuma yi edzi. Ofa yi bohwe nhwehwemu su, nyimpa a menye hon dzi dwuma no, nyimpa potsee a menye hon dzii dwuma yi, nyiyimu akwan, kwan a mefaa do nyaa nsem dzi dwuma yi, na mbre minyaa mboanosem no. Makyekye ofa yi mu de mbre oda edzi wo ase ha yi; Ofa 3.1 da nhwehwemu su edzi, ofa 3.2 pensapensa nyimpa a menye hon dzi dwuma no mu. Ofa 3.3 mu no, medze nyimpa potsee a medze hon dzi dwuma no to gua na mepensapensa kwan a mefaa do paaw nyimpa no wo ofa 3.4 mu. Beebi a minyaa mboanosem dzi dwuma yi no wo ofa 3.5. Akwansere so da edzi wo 3.6 nna ofa 3.7 mu no medaa kwan a mefaa do yee mpensampensamu no. Ofa 3.8 bo ofa yi tofa.



3.1 Nhwehwemu no su

Medze su-kyere nhwehwemu dzii dwuma wo mo nhwehwemu yi mu. Mefaa dem nhwehwemu su yi osian nhwehwemu yi no botae ntsi, onno nye de opensapensa mbebussem na kasasu a Mfantsefo dze dzi dwuma wo kuaye mu.

Su-kyere nhwehwemu su da nkasaa anaa akyerew ho mpensampensamu a ofa dwumadzi anaa su bi a nhwehwemufo ye ho nhwehwemu (Johnston & Vanderstoep, 2009). Creswell (2009) so kyere su-kyere nhwehwemu su ase de oye nhwehwemu su a ommfa nkanee nndzi dwuma. Dem nhwehwemu yi hye ase fi ber a yedze hen adwen na hen ntseasee a ofa ohaw

a ɔwɔ dem adzesua ne ntseasee a ɔfa ankorankor anaa nyimpakuw a yɛdze gyina hɔ ma asetsena mu nsem anaa nyimpa ne haw. Ɔdze dza ɔka do yi to gua dɛ yetum dze no mu biara ye su-kyere nhwehwemu; etsenografi, grandɛd tiɔri, keesi stadis, fenɔmenɔlɔgyi na naretifu.

Owu-Ewie (2017) so kyere dɛ, nhwehwemufo nam asembisa, ahwee na akyerɛkyerɛw do na wɔdze nya nhwehwemu no ho nsem. Ɔkyere dɛ, su-kyere nhwehwemu su kitsa nsem biara a nhwehwemufo no behia dze ewie no botae. Creswell (2009) dɛ mbre ɔda edzi wɔ Owu-Ewie (2017) mu no kyere dɛ su-kyere nhwehwemu su hia papaapa dɛ nhwehwemufo no kɔ bea pɔtsee a ɔreyɛ nhwehwemu no wɔ no na oekedzi hɔ nda kakra dɛ mbre ɔbeyɛ a ɔbetse nsem a ɔreyɛ ho nhwehwemu no wɔ ase yie. Su-kyere nhwehwemu su mu no, nhwehwemufo no tum dze noho hyehyɛ dwumadzi no mu ber a oridzi dwuma no anaa dɛ ɔgyeen n'enyi ara hwe a ɔmmfa noho nnhyɛ dwumadzi no mu.

Osiandɛ nhwehwemu yi ye kasa-amambra akwankyere a ogyina su-kyere do ntsi ohia dɛ mobɔ anan kɔ nsenyianofo no hɔ dɛ mbre ɔbeyɛ a mebetse nsem no ase yie. Menam iyi ara do so na mubotum edu dwumadzi no botae ho. Anan a okehiaa dɛ mobɔ dze kɔ me nsenyianofo no hɔ na menye hɔn kɔtwetwe nkɔmbɔ ntsi na mefaa dem nhwehwemu su yi na aboa me ma meehu dza ɔkɔ do no na maatse ase so yie.

3.2 Nyimpa a menye hɔn dzi dwuma yi

Acharya na no dɔm (2013) kyere de nyimpa a wɔpaw hɔn dze hɔn ye nhwehwemu no da edzi wɔ nyimpakuw bi wɔpaw hɔn dze hɔn dzi nhwehwemu dwuma mu a wogyina hɔ ma dem nyimpakuw no. Nyimpadɔm ye kuw bi a wɔwɔ su kor a nhwehwemufɔ pɛ de ɔdze hɔn dzi dwuma anaa ɔye nhwehwemu fa hɔn ho (Best & Kahn, 2006 de mbre ɔda edzi wɔ Owu-Ewie, 2017). Owu-Ewie da no edzi de nyimpadɔm ye nyimpa nkorkor a wɔbɔ mu ye kuw kor a wɔwɔ su kor a ɔma wɔye soronko fi afofor ho.

Sidhu (2012) so hu nyimpadɔm de nyimpa nkorkor a wɔbɔ mu ye kuw kor a wɔwɔ su kor anaa no mboree na nhwehwemufɔ pɛ de ɔye nhwehwemu fa hɔn ho. Ɔkɔ do kyere mu de nyimpadɔm no fa nyimpa na ndzɛmba ahorow a ɔka nyimpakuw no bɔ mu a ɔma wɔye soronko nyinara ho. Iyi kyere de nyimpadɔm mu no, nyimpa, ndzɛmba na adze a wɔdze hɔn ka ho dzi dwuma no a ɔbeye yie nyinara ka ho. Nyimpa a medze hɔn dzii dwuma yi nyinara ye Mfantsefo ekuafɔ a wɔwɔ Mfinimfin Mantɔw mu wɔ ɔman Ghana mu. Mapaw nkorɔfo a wɔwɔ Mfantseman Mansin na Edwumako-Enyan-Essiam Mansin mu.

3.3 Nyimpa pɔtsee a medze hɔn dzi dwuma yi

Mepaaw nyimpa duenum (15) a hɔn nyinara ye Mfantsefo na medze hɔn dzii dwuma yi a hɔn mfe a woedzi fi mfe eduanan (40) kesi mfe eduosia (60). Nyimpa duenum yi mu no, hɔn mu du (10) na wɔye mbanyin na enum (5) so ye mbasiafo. Siantsir a mbanyin no dɔɔ so kyen mbasiafo no nye de, mbanyin a wɔdze hɔn ho hye ekuadwuma mu no dɔɔ so kyen mbasiafo. Mepaaw mbanyin baanan fii Baifikurom, baasa fii Enyan-Apaa na beenu fii Enyanmanmu. Mbasiafo no afa mu no, mepaaw nyimpa beenu fii Baifikurom, beenu fii

Enyan-Apaa na mepaaw nyimpa kor fii Enyanmanmu. Siantsir a mefaa dem nkurow ebiasa nye de, ekuadwuma nye edwuma pɔtsee a wɔye no wɔ ho. Pon yi a ɔwɔ ase ha yi bɔ nyimpa dodow no tɔfa;

Kurow	Mbanyin	Mbaa	Dodow
Baifikrom	4	2	6
Enyan-Apaa	3	2	5
Enyanmanmu	3	1	4
Dodow	10	5	15

Nyimpa a wɔwɔ sor ho yi nye hɔn a medaan hɔn ma minyaa mboanosem no mu bi a ɔfa Mfantse ekuaye mu mbɛbusem ho. Binom wɔ ho a menye hɔn twetwee nkɔmbɔ wɔ hɔn fie, binom so wɔ ho a nkɔmbɔtwetwe no kɔr do wɔ hɔn haban mu. Menye hɔn twetwee nkɔmbɔ nyaa hɔn adwenkyere wɔ ekuaye mu mbɛbusem ho. Ekuafɔ no dze mbɛbusem a medze dzii dwuma yi mu dodowara maa me a mefae dze yeɛ mpɛnsampɛnsamu yi.

3.4 Nyiyimu akwan

Nyimpa a medze hɔn dzii dwuma yi nyinara ye Mfantsefo ekuafɔ. Migyinaa nyiyimu kwan a ogyina botae do na medze paaw dem nyimpa anaa nsenyianofo no nyinara. Nyiyimu kwan a ogyina botae do no boa me ma minyaa mbɛbusem a ɔfa Mfantse kuaye ho, nsentsitsir a ɔda edzi wɔ mu na kasasu ahorow a ɔda edzi wɔ mu. Nyiyimu kwan a ogyina botae do no gyina nhwehwɛmufo no do de ɔbɔhwɛwe obi a obotum ama no nsem a

orohwehwe efi ne nsenyianofo no ho ma aboa no nhwehwemu (Etikan & Bala, 2017). Woko do ka de otwar de nyimpa no enyi ku hon a woma no nsem a ose na woye krado de woboboa no de mbre obeye a ne nsem no bedzi mu.

Kothari (2004) kyere de nyiyimu kwan a ogyina botae do ye nyiyimu kwan a oye papaapa wo nhwehwemu mu se oba no de beebi a nhwehwemufo no reye nhwehwemu no suar a. Marshall (1996) so dze fua do, nyiyimu kwan a ogyina botae do anaa mpamu nyiyimu kwan ye nyiyimu kwan a nhwehwemufo taa dze dzi hon dwuma. Okyere de, nhwehwemufo no hye da ara paw hon a wowa nyimdzee wo dza orohwehwe no ho.

Migyinaa botae do paaw ekuafu a wowa Mfantseman na Edwumako-Enyan-Essiam Mansin mu dzi dwuma yi. Megye dzi de nsenyianofo a mepaaw hon no nyinara wo nyimdzee wo dza nna morohwehwe wo mbebusem a ofa Mfantse kuaye no ho.

3.5 Beebi a minyaa mboanosem no fii

Minyaa mboanosem fii mbea ahorow ebien, praemiri na sekendiri. Praemiri mboanosem no ye dza minyaa no wo enyim-na-enyim nkombotwetwe a menye me nsenyianofo no nyae no ho. Mekyer dem nkombotwetwe no guu efir do de mbre obeye a mowere nkefir ntsi. Sekendiri mboanosem no so ye dza minyaa no wo mbuukuu ebien (Mfantse-Akan mbebusem nkyerekyeremu, Bannerman (2011), na Kasadwin su a oda edzi wo Mfantse mbebusem mu, Tetteh (2013) mu. Meye Mfantsenyi a wodze Mfantse twaa mo mfunuma ntsi, mara so me nyimdzee kakra a minyim wo ho no medze boae. Medze mbe a otse dem

no maa Mfantsefo binom so a wɔka Mfantse ma wɔhwɛɛ mu maa me. Gyee too mu de ɔye mbebusɛm a ɔfa Mfantse ekuayɛ ho.

3.5.1 Kwan a mefaa do nyaa mboanosɛm no

Migyinaa nhwehwɛmu edwumayɛdze ahorow do nyaa mboanosɛm dze dzii dwuma yi. Praemiri mboanosɛm no, migyinaa nkɔmbɔtwetwe do na medze nyaa mbe a medze dzi dwuma no na mara so migyinaa me nyimdzee a ɔwɔ Mfantse kasa mu do de meye Mfantsenyi dze pɛɛ mbe no bi kaa ho.

3.5.2 Nwoma

Nwoma mu nyimdzee ye nsem bi a ɔda biribi ho a ɔkyerɛwfo bi etsintsim ato ho (Tuckman, 1999, de mbrɛ ɔda edzi wɔ Owu-Ewie 2017 mu). Iyi nsembisa na nkɔmbɔtwetwe no si nkyɛn a, mohwehwɛ mbuukuu ebien a ɔkasa fa Mfantse mbe ho, ɔye Mfantse-Akan mbebusɛm nkyerɛkyerɛmu (Bannerman, 2011) na Kasadwin su a ɔda edzi wɔ Akan mbebusɛm mu (Tetteh, 2013). Mbuukuu yi boaa me ma minyaa mbebusɛm dodow a ɔfa Mfantse ekuayɛ ho. Minyaa mbebusɛm dubiako wɔ dem nwoma ebien yi mu.


Mekaa me nyimdzee a mowɔ wɔ Mfantse mbebusɛm ho, nkɔmbɔtwetwe a menye me nsenyianofo no twetwee na mbuukuu ebien no a minyaa mbe fii mu no bɔɔ mu no minyaa ntseasee a no mu do faa mbebusɛm a ɔfa Mfantse ekuafɔ ho. Patton (2002), de mbrɛ ɔda edzi wɔ Owu-Ewie (2017) si do dua de nwoma ma abakɔsem na mprempre akwankyere a ma ahwɛɛ na nkɔmbɔtwetwe; ɔtɔfabi a ɔno na yetum dua do dze ho esumasɛm a nkɔmbɔtwetwe na ahwɛɛ enntum annda no edzi.

3.5.3 Mara me nyimdzee dɛ meyɛ Mfantsenyi

Meyɛ Mfantsenyi a wɔdze Mfantse twaa mo mfunuma yi, medze mbɛ no bi kaa dza minyae no ho. Naaso, osiandɛ mbɛ a medze kaa ho no beyɛ dza odzi mu ntsi memaa obi so hwɛɛ mu maa me sii do dua. Mesanee dze medze no totoo dza minyaa no wɔ nkɔmbɔtwetwe no mu no hwɛɛ.

3.7 Akwanserɛ

Akwanserɛ yɛ adze a no ho hia papaapa wɔ nhwehwemu dwumadzi biara mu. Iyi saso ntsi nhwehwemu dwumadzi biara mu no, beebiara a no ho hia dɛ meserɛ kwan no muduaa kwan pa do serɛɛ kwan.



Odzi kan, osiandɛ dwumadzi yi fa ekuafɔ ho ntsi ɔbeyɛɛ nhyɛ maa me dɛ mefa nsenyianofɔ a hɔn nyinara yɛ ekuafɔ. Onam dɛ ekuafɔ hɔn dwumadzi no hia ahɔɔɔzen soronko na wodzi hɔn dwuma no dodowara wɔ ber a kan wɔ do ntsi, na dɛm ber noara so na mpen pii no menyɛ hɔn kedzi dwuma no ntsi, nna meserɛ kwan fi hɔn nkyɛn ma wɔgyɛ pen ansaana mabɔ anan akɔ hɔn asoɛɛ nye hɔn akɔtwetwe nkɔmbɔ.

Otsia do ebien, beebiara a menyɛ hɔn bɔtwetwe nkɔmbɔ a no ho behia dɛ mekyɛr nkɔmbɔ no gu efir do no, meserɛɛ kwan fii hɔn hɔ ansaana merekyɛr nkɔmbɔtwetwe no. Nna sɛ merekyɛrɛw dza wɔka no mpo a, mibisa ma wɔgyɛ pen ana makyerɛw. Bio, nna mema wonya dza yɛreyɛ no mu ntseaseɛ na mema wohu dɛ sɛ okodu beebi na wɔmmpe dɛ wɔtoa do a, wotum ka.

3.8 Kwan a mefaa do pensapensaa mboanosem no mu

Migyinaa mboanosem a minyae ho nhwee mpensampensamu kwan do pensapensaa mo mboanosem no mu. Stemler (2001) kyere mboanosem ho nhwee mpensampensamu mu de oye esiado esiado kwan a wofa do ka mboanosem kua ma oye kakraabi anaa kumaa bi a ogyina kwan a efaa do edaa no edzi no do. Mboanosem ho nhwee mpensampensamu ye kwan a ogow anaa onnye dzen wo mboanosem mu mpensampensamu mu (Cananaugh, 1997). Eso, Gruba na Zobel (2017) hu de 'variables' (or akwan horow) na nhyehyee ahorow ye ndzamba ebien a ofa mboanosem ho dwumadzi na n'edzida mu. Dem adwensu yi da kwan a yefa do tse mboanosem no ase edzi. Edze mboanosem rudua nhyehyee bi do no ma itum pensapensa na ekyerekyere mboanosem no mu yie. Mitsiee nkombotwetwe a mekyeree guu efir do no na mekyerewe guu krataa do. Me ngyinado no ne kese kedzii dza hon a menye hon twetwee nkombon ka no do.

Ehwe dza Zobel na Gruba (2017) ka no a, mekyekyee mo mboanosem no mu ekuwekuw a migyinaa mo nhwehwemu ho asembisa no do. Ekuw oye nkumaa no bi nye mbebusem a ofa Mfantse ekuafu ho, dza ofa adow ho, dza ofa asaase do nsiesie ho, dza ofa aba no ngui anaa no nduae ho, dza ofa ekuadze no mbui anaa no ntwae ho na dza ofa ekuadze no ntonee ho. Ekuw akese a migyinaa do kyekyee mboanosem no mu no nye mbebusem potsee a ofa Mfantsefo ekuafu ho, nsentaitair a owon mbebusem no mu na kasasu ahorow a oda edzi wo mbebusem no mu.

3.8 Ofa no no tɔfabɔ

Dem fa yi pensapensaa nhwehwemu akwan a nhwehwemu dwumadzi yi duaa do dze paw nyimpa na mboanosɛm dze dzi dwumayi. Ofa yi hwɛɛ nhwehwemu su (su kyere), nyimpa a menyɛ hɔn dzi dwuma yi, nyimpa pɔtsee a medze hɔn dzi dwuma yi, nyiyimu akwan (dza ogyina botae do), beebi a minyaa mboanosɛm no (Praemiri na Sekendiri), akwansere na kwan a mefaa do dze nhwehwemu yi ho nsem too gua.



TSIR ANAN

DWUMADZI NO NE MPENSAMPENSAMU

4.0 Nyienyim

Ɔfa yi mu no meɔpensapensa mbɛbusɛm a Mfantse ekuafɔ dze dzi dwuma wɔ hɔn dwumadzi mu. Ekuafɔ dze mbɛbusɛm dzi dwuma wɔ hɔn daa daa abrabɔ mu. Mbɛbusɛm dzi akotsen wɔ nyimpa ne bra mu na nnye adze a woyi no tokyen a ɔbeyɛ yie wɔ kasahorow nyinara mu. Wɔda adwenmusɛm bi a ɔwɔ kasa no mu a wodua kasa do da no edzi. Hɔn a wɔdze be dzi dwuma wɔ kasa mu no gyina siantsir bi do, binom dze twa asem tsentsen tsia na binom so dua be do da nsumaa mu nsem anaa ammbɔdzin edzi. Mbɛbusɛm da edzi wɔ ndwom, awensɛm, aborɔme na adze mu (Finnegan, 1970:391).

Ɔfa yi rohwe mbɛbusɛm a Mfantse ekuafɔ dze dzi dwuma. Kwan a mafa do akyekyɛ ɔfa yi mu nsem mu nye yi; Ɔfa yi nefa a ɔyɛ 4.1 no da nkyekyɛmu a medze ama mbɛbusɛm yi; fitsi asaase no do nsiesie dze kepem eduadzewa no ntɔnee a megyina ‘Conceptual Metaphor Theory’ do esi no tadia. Nkyekyɛmu a ɔtɔ do 4.2 no da asentsitsir ahorow a ɔda edzi wɔ mbɛbusɛm ahorow no a ekuafɔ no dze dzi dwuma no mu, 4.3 so ada kasasu ahorow a opue wɔ mbɛbusɛm no bi mu na 4.4 no abɔ ɔfa yi tɔfa.

4.1 Mbɛ a ɔfa Mfantse Ekuayɛ ho

Mfantse mbe bi wɔ hɔ a ɔfa kuayɛ ho a wɔhwe ber pɔtsee bi mu wɔ kuayɛ no mu ho na wɔdze bu dem mbe no. Dem mbɛbusɛm yi da dwuma pɔtsee a ekuafɔ no yɛ no wɔ dem ber no wɔ kuayɛ no mu. Medze mbɛbusɛm eduokron yɛɛ mpensampensamu yi. Nkyekyɛm a

medze maa dwumadzi yi hye ase fi mbɛbusɛm a ɔfa asaase noara ho, asaase no ndɔwee, nduae, ntwae na ekuadze no ntɔnee. Minyaa dem mbɛbusɛm ahorow yi fii nwoma na nsenyianofo ho. Mbɛbusɛm a ɔfa Mfantse ekuay[ho w] ber p]tsee bi mu na map[nsap[nsamu w] ase yi.

4.1.1 Mbɛbusɛm a ɔfa asaase noara ho

Asaase nye adze a no ho hia papaapa wɔ kuayɛ mu, iyi no wɔ mu a nnyɛ adze a ɔbɛyɛ yie. Asaase do na wodua aba anaa wogu aba wɔ. Osiandɛ asaase yɛ adze a okuanyi biara hwehwe ansaana ɔaahyɛ no kuadwuma ase ntsi, wɔhwɛ ho bu bɛ ma ɔda adwensu a Mfantsefo wɔ edzi wɔ asaase yi na abrabo ho. Mfantsefo adwenmusem dodowara wɔ ho a wɔdze esie mbɛbusɛm a ɔfa asaase ho. Dza ɔka do yi yɛ Mfantse mbɛbusɛm a ɔfa asaase ho.

Asaase tse de nyimpa dasanyi, se ɔsow aba denara mpo a, ɔpo.

Bɛ yi dze nokwasɛm bi a ɔwɔ asaase ho to gua dɛ wodua adze wɔ do ma ɔkyer a opi. Mber tsentsen a okuanyi kɔ do yɛ edwuma a ɔmma asaase no nngye n'ahom kakra no, nna asaase no so pi araa na oripi. Sɛ ekuafɔ dze dem bɛ yi dzi dwuma a nna wɔdze rekaa hɔnhɔ de ohia dɛ wɔma asaase no gye n'ahom ama asan enya ahoɔzen a obotum egyina do ama ekuafɔ no ndɔbaa a wɔrohwehwe. Mɛ nsenyianofo no mu kor daa no edzi dɛ sɛ okuanyi yɛ edwuma wɔ asaase do mber tsentsen a, otwar dɛ ɔma asaase no hom kakra. Iyi boa ma asaase no nya ber dze siesie no ho ma ɔsan nya ahoɔzen a sɛ okuanyi no san dɔw do a obenya ndɔbaa a odzi mu. Sɛ okuanyi ama n'asaase ennya ber ammfa ennsiesie no ho ma no mu edziban a ɔboa ma ndua nyin no annsan ammba mu a, idua adze wɔ mu ma nsu tɔ denara mpo a nnyɛ adze a wo nsa bɛka ndɔbaa a erohwehwe. Abrabo mu no yɛdze bɛ yi

gyina hɔ ma nyimpa. Mbre nyimpa reye panyin no na n'ahoodzen rokɔ famu de mbre eko do ye edwuma wɔ asaase do a asaase no n'ahoodzen a adze boa ma okuanyi no nya ndɔbaa no so do tsew no. Be yi kyere hen de otwar de yehwe hen nyimpadua yie na yebɔ henho ban fi koannkɔ yarba ho na ama yeenyin akyer.

Emo se ɔpe nsu asaase, naaso idua no po do a, ommfifir.

Emo ye eduadzewa a wodua no wɔ atekye mu anaa ɔworaba ho, mbom se idua no wɔ po mu a, nnye adze a ɔbeyɛ yie. Nsenyianofo a medze hɔn dzii dwuma no mu kor a nna ɔye emodwuma wɔ Enyan Apaa kaa kyereɛ me de ɔwɔ mu de emo pe nsu ama aboa no ma etum enyin na wɔasow aba yie, mbom se nsu no bor do a onya nsunsuando wɔ ne yieye na no nsowee do. Dza nsenyianonyino kaa no kyere hen de emo no pe nsu dze naaso se ema no nsu mbordo a nnye adze a obotum ayeyie wɔ mu osiande onnyi de nsu no bor dza ɔpe no do. Yedze be yi toto hen bra ho a, ɔrekyere hen de adze biara a nyimpa beyɛ no mbordo no nnye anaa omuo. Nna tserɛ yereye adze a, otwar de yedze adwen to ho.

Wo fasew ammbɔ a nna ofi w'asaase.

Fasew ye eduadzewa a nnye asaase biara na ɔye yie wɔ do. ɔba no de se okuanyi bi nnyim na odua fasew wɔ asaase biara do a, ɔma itu fasew a osuar koraa kyen dza nkye n'enyi da kwan de obenya no. Iyi na hɔn a menye hɔn dzii dwuma no mu kor kyereɛ me mu de se okuanyi papa biara a odua fasew no rubodua fasew a, odzi kan hwe asaase no hu de oye ma fasew ansaana ɔaahye ase aye asaase no do edwuma.

Fasew a ɔwɔ dem be yi mu yi twa adwen mu mfonyin a ɔfa nyimpa ho kyere hen. Dza yenyim nye de fasew dze wodua na wɔhwɛ no yie a ɔbɔ akese. Mbom se wodua no wɔ asaase ɔmmbɔa fasew no a nnye adze a ɔbɔbɔ akese de mbre okuanyi no pe. Wɔdze dem be yi dzi dwuma wɔ ekuadwuma mu ber a wɔrepe asaase edua do aba. Okyere de ohia de wonya asaase a oye ma ekuadze bi ber a wɔpe de wodua eduaba. Se ammpɛ asaase a oye ma eduadzewa no na efa asaase biara a epe dze dua a, nnye a adze a wo nsa beka ndɔbaa a epe de inya wɔ w'edwumaye no mu. Me nsenyianofo no mu kor kaa kyere me de asaase biara na eduaba a wodua wɔ do a ɔye yie. Demara so na nnye eduaba biara na wodua no wɔ asaase bi do. Yɛdze be yi toto nyimpa n'abrabo ho a nyimpa biara nnyi ho a Nyankopon amma no akyɛdze soronko bi obiara wɔ n'akyɛdze a ɔdze dzi dwuma wɔ ne ber mu. Se obi botum dze n'akyɛdze aye edwuma a, gyede ɔye edwuma a ɔnye n'adom akyɛdze no wɔ twaka. Ammba no dem a ɔbeyɛ de fasew a weonndua no asaase pa do de mbre be no ka no, nnye adze a nyimpa no no dwumadzi no beyɛ yie. De wɔdze obi behye beebi a n'adom akyɛdze botum aboa dwumadzi a wodzi wɔ dem bea no do no ho hia papaapa wɔ abrabo mu. Se obi no dwumadzi ankɔ do yie wɔ edwuma bi mu a, nna ɔno nnkyere de nyimpa no nnyi ndzɛpa biara, bi a na dza n'adom akyɛdze botum aye no nnye ɔno na wɔdze ama no de ɔnnye no.

Mpanyimfo se, asaase bɔn tse de nsɔe ɔmmbɔ nkaa ansaana ɔawɔ.

Asaase biara na eduadzewa a wodua no wɔ do a otum sow aba yie. Mbom asaase bɔn dze, onnyim eduaba bi de oye ma asaase no anaa onnye mma no. Idua adze wɔ do na ehwe no yie denara mpo a nnye adze a ɔbe ye yie. Kookoo kuanyi bi a ɔwɔ Baifikurom kyere de, se okuanyi a ɔtse ekuadwuma ase biara reye asaase do edwuma a, odzi kan hwɛ mbre asaase

no tse, de ɔye asaase papa anaa asaase bɔn. Siantsir a ekuafɔ ye dem no nye de, asaase a ɔnnye no, eye no den mpo a nnye adze a obeyi ndɔbaa papa. Ekuafɔ tɔ de wɔpow dem asaase no na wɔhwehwe asaase papa ye do edwuma.

Be a ɔwɔ sor hɔ yi san so si mbre be yi a ɔfa ekuadwuma ho yi da nsoe no suban bi edzi dze kyere hen mbre nyimpa no su tse. Ansaana nsoe bɔwɔ obi no, ɔmmɔ no nkaa ana awɔ no, osuma beebi na se nyimpa no annye ahweyie a awɔ no. Ekuafɔ no kyere de asaase a ɔnnye nye dza onntum nnyi ndɔbaa papa. Dza ɔwɔ mu nye de, asaase yi mmbɔ okuanyi no nkaa de asaase yi nnye ntsi mma nnye edwuma wɔ do. Okuanyi no ye edwuma no wɔ mu na ekyir no onu noho. Hen atsenae mu no, nyimpa binom tse de nsoe anaa asaase bɔn, hɔn suban nnda edzi wɔ hɔn bɔbew mu gyede ɔda no edzi kyere wo ansaana. Be yi tu hen fo de otwar de yehu adze a yehwe no ebien anaa yepɔkye hen enyi hwe adze yie ansaana yedze hen nsa aka. Anaa se yeben nyimpa a otwar de yehwe yie ansaana yenye hɔn edzi dwuma. Iyi bɔboa atwe hen efi anyenko bɔn ho.

Asaase a ɔsow kube no, ɔnoara so na ɔsow abe.

Abe na kube nyinara ye nduadzewa a wɔbɔ ebusua kor wɔ nduadzewa mbusuakuw mu. Iyi ntsi beebi a idua a abe wɔ hɔ a ɔbɔsow no, se idua kube so wɔ hɔ a ɔbɔsow ma enya ndɔbaa a erohwehwe biara. Me nsenyianofɔ no mu binom kaa kyere me de se wodua mbe a ɔye a wɔdze kube sisi mu osiande asaase a ɔgye abe biara no gye kube so osiande hɔn nyinara ye eduadzewa kor anaa wɔse.

Be yi a ɔwɔ sor hɔ yi ye be a ɔda asaase a ɔsow kube na abe edzi de ɔye n'abɔse ntseasee. Ɔkyere de asaase a wodua kube wɔ do a ɔye yie no, wodua abe so wɔ do a ɔbeye yie. Ngyinahɔma mu no, kube na abe no gyina hɔ ma ebusuabɔ anaa onuaye, ber a asaase no gyina hɔ ma awofɔ no. Wɔdze dem be yi bu enuanom a etsi-me-na-aka-me regye hɔn tsir asoa. Wobu be yi dze kyere hɔn de wɔye den ara a, wofi awodze anaa yafun kor mu. Be yi kyere hen de oonyi de enuanom ko tsia hɔnho.

Mpanyimfo se, asaase a wodua do ekuadze ho manso, wɔtwe no owura.

Manso mmpa nyimpa ntamu nkitahodzi biara mu, demara so na ɔtse wɔ ekuadwuma ho. Mpen pii no manso tum ba asaase ho araa ma se nnyim asaase a erotwe ho manso no ano yie a, annye a nna obi agye w'asaase efi wo nsamu. Iyi ntsi asaase a wodua do ndɔbaa no mpen pii no ɔye a ewuranom no tɔ de wɔdze ndua na ndzamba ahorow bi ye ahyensewdze dze sisi ɔhe anaa ɔhye do. Se ennye asaase no wura a ɔbeye dzen de ibohu dem nsenkyeredze no ma se manso ba a edze akyerɛ de hɔ nye w'asaase no n'ano.

Okuanyi n'asaase a odzidzi mu no, noara na otwar de ɔfa no ho asodzi nyinara. Okuanyi biara no botae a osi n'enyi do no, noara na otwar de ɔtse ase yie na odzi ho dwuma. Ngyinahɔma ntserɛwmu mu no, okuanyi a ɔtwe n'asaase manso no gyina hɔ ma obi a ɔreyɛ n'abrabɔ mu daaso ho edwuma. Be yi bue ekuafɔ a wogyaa nkorɔfo ma wɔfa hɔn asaase afo no de se hɔn enyi amber annye ho biribi a ɔno hɔnara na wɔaye. Se yedze hen adwen si hen atsenae mu do a, obiara na onyim mbre n'adaaso tse na mbre ɔpe de odzi ho dwuma kodu. Ansaana obi bohu ne daaso na ɔabɔ ho bra no hia nsiye na nkodzen. Se emmia w'enyi a ebɔpa abaw. Be yi kasa tsia akwadwer na ɔhye edwumadzen na nsiye kutupa.

Okuanyi n'asaase do mbire, wotu no noara.

Nkan no nna nkye mbire taa fifir wo haban mu ma ewuranom no tutu dze ye edziban na wotum ton bi mpo. Mbom bi wo a nnye okuanyi noara na akoto. Oba no dem a otwar de nyia akotoe no kobo asaase no wura amandzee ma obotu na se ope a oma wo bi. Siantsir nye de, se eko obi ne haban mu a runntum nnkyere dza adze ahye asaase no mu anaa dza owo asaase no mu. Iyi kyere hen de adze biara se owura no na ase de odzi ho ndzinoa a ofata. Nde mber yi mpo dze onam ndur a wodze hyew efuw na adze ntsi omma asaase mmfifir mbire bio.

Dem be yi so da Mfantse ho adwenmusem bi edzi a wohwe ho dze bo hon bra. Okyere de okuanyi dza abere aye ho edwuma no noara na odzi. Owo mu de mbire no nnye okuanyi no na oduae dze, naaso osiande oye n'asaase mu adze ntsi owo do tum de otutu n'adze. Mbire no gyina ho ma adze soronko bi a nyimpa nya no wo n'edwuma mu a n'enyi nda. Iyi kyere hen de onnyi de kwadwefo dzi dza onnye ho hwee n'aba. Be yi kyere hen de mma yennyee adwer.

Asaase a ogye kuromanyi no, onoara so na ogye ahoho.

Be yi ne ntaeasee gyina mbre okuanyi no beyer no ho edzi no dwuma wo asaase bi do. Be yi kyere de, se eye hoho o, eye kuromnyi o, asaase a wodua adze wo do nnyim wo. Nyia asaase nyim no ara nye nsa a oye edwumadzen. Se kuromnyi yer no ho wo asaase do na onya ndobaa a, demara so na hoho so yer no ho ye edwuma wo asaase no do a no so benya ndobaa a ofata n'edwuma a oye no.

Be yi mu no, ɔda asaase a ɔgye kuromfo na ahɔho nyinara anaa asaase a kuromfo na ahɔho nyinara tum ye edwuma wɔ do de ɔye n'abɔse ntseasee. Ne ntseasee mapa mu no, be yi kyere ɔhen a ɔnnye nyiyimu wɔ n'ahendzi mu. Asaase a okuanyi ye do edwuma no nnyim hɔho na onnyim kuromnyi. Kuromfo na ahɔho nyinara ye do edwuma na wɔye no yie a wonya hɔn ndɔbaa. Wɔdze dem be yi bu akwadwefo a wɔmpɛ edwuma ye. Ɔkyere de se asaase no gye hɔho no a, ɔwo kuromnyi no na ɔnnkegye wo. Hen daa daa abrabɔ mu no, be yi da ahemfo hɔn su edzi. Ahemfo gye obiara a ɔtse bea a odzi hen wɔ no akoma pa mu, wɔnnye nyiyimu.

Mpanyimfo se, pintsinn asaase nnda hɔ kwa.

Asaase a ekuafɔ dɔw do no ma hen mbe ahorow a ɔda adwenmusem a ɔfa Mfantsefo ho edzi. Be a ɔwɔ sor hɔ yi da asaaseber a ɔda hɔ kwa anaa obiara mmfaa ne nsa nnka edzi. Okuanyi botum ehu asaaseber a ɔda hɔ a obiara mmfaa ne nsa nnkae anaa wonnduaa biribiara wɔ do, ɔba no dem a bohu no na ɔkeka okuanyi no n'enyiwa mu osiande onya a nkye ɔbeyɛ do edwuma. Mbom adze kor nye de dem asaase a ɔda hɔ dem no ye obi nedze n'egyapadze. Me nsenyianofo no mu kor a ɔwɔ Enyamanmu kaa de obi tum gyaa n'asaase to hɔ dadaadaw a nna ɔnnye do hwee. Ɔba no dem a beka de ɔnnye obiara dze mpo. Nsenyianofo no kyere de asaase a wogyaa no dem no taa dze manso ba osiande nkorɔfo hu na wonya pe de wɔbeyɛ mu edwuma a, osiande woegyaa ato hɔ pan ntsi ɔye a nna wɔdwen de ɔnnye obiara dze. Wɔdze nsa kae ara na no wura eyi ne tsir. Be yi kyere hen de biribiara nnyi asaase yi do a onnyi owura; adze papa biara wɔ no wura.

Okuanyi a ɔrotwoɔn asaase n'aba a ɔsom bo no, onya abotar kodu de ne nsa beka esusuow na Ɔbese.

Ɔbese ye bosoom bi ne dzin wɔ Mfantse nda nkane mu nwoma anaa krataa do a ɔye nsutɔber. Mfantsefo dze dem be yi dzi dwuma a nna wɔrepe akyerɛ de nnye aber biara na wɔye ekuadwuma anaa wodua adze anaa aba. Se okuanyi biara pe de ɔye ekuadwuma na onya no ndɔbaa yie a, onya abotar tweɔn Ɔbeseber a nsutɔ yie no a ɔye edwuma no wɔ dem ber no mu. Okuanyi bi a ɔwɔ Enyanmamu kyere de se asaase no ye denara mpo na nsu anntɔ a, nnye adze a okuanyi no dua aba a obenya aba a ɔpe. Iyi kyere hen de otwar okuanyi no tweɔn Esusuowber no a nsu tɔ yie no ansaana woedua n'edudzewa ama asaase no enya nsu a ɔfata na okuanyi no so n'edwuma aye n'edwuma no yie. Se yegyina ngyinahɔma ntseasee anaa ntseasee mapa no do a, dza mebeka nye de otwar de nyimpa tum sie abotar wɔ anamɔn anaa dwuma biara a obedzi ho. Nhwedo bi tse de obi a ɔrokɔ awar dem, otwar de nyimpa no nya abotar toto ne ndzemba yie ansaana oetu dem anamɔn no dze ahwehwe banyin anaa basia a ɔse fata. Iyi kyere de biribiara wɔ ne ber, mbom dza ohia ara nye abotar.

Asaase a ɔbɔsow edudzewa no nnyim ɔpe ber.

Be yi kyere mbre asaase papa tse. Asaase bi wɔ hɔ a nsutɔber mu nkotsee na wotum dua do adze ma ɔye yie. Nkorkor per na wotum dua do adze wɔ ɔpeber na nsutɔber nyinara mu. Dem asaase a ɔtse dem yi ho ye na papaapa. Asaasa yi mmfa ho na ber kor a okuanyi bodua do adze, okuanyi no bobu aba no enya ndɔbaa de mbre ɔse. Be yi ne ntseasee nye ahweyie a ɔwɔ de yeye wɔ hen asaase a yeye do edwuma no nhwehwe mu. Yebotum atserew be yi mu enya ntseasee bi wɔ mu a ɔda Mfantsefo adwenmusem edzi. Me nsenyianofo no mu kor kaa de be yi ase papaapa nye de obi a Onyankopɔn ehyira no no biribiara nnyi hɔ a

obotum ahwe no ase. Onyame ne nhyira nnyi de oyi fi ha anaa ofi ho no. Onnhwe obi ne nkyir ansaana odze ne nhyira ama no.

Asaase biara n'enyinyamhye nye ndobaa a obefi mu bopue.

Bio, iyi so ye mbebusem a ofa ekuafu ho a ofa asaase ho. Be yi n'abose ntseasee da dza ofi asaase mu ba edzi anaa ndobaa a asaase tum yi edzi. Ntseasee mapa anaa ngyinahoma ntseasee mu no oda edzi de nyimpa n'abawdobu gyina dza otum ye do. Okuanyi bi a medze no kaa me nsenyanofu no ho a ofi Enyan Apaa kaa de otufabi na ehwe asaase ne few ho a botu asaase bon. Mbom, dza wozde kyere asaase ne papa nye aba a asaase no tum sow anaa ndobaa a odze ma. Se bohu de asaase bi ye asaaseber a gyede oeyi no ndobaa ma ehu mbre asaase no mu ndobaa tse ansaana. Hen daa daa asetsena mu no, dza nyimpa botum aye no runntum ngyina hon bobew do mmfa nkyere. Hen edwumaye na okyere hen abawdobu.

Asaase bon noara da noho edzi wo edwumaye mu.

Be a wu sor ho yi da asaase bon edzi. Onnye adze a oda famu de ibohu asaase a oye papa na obeye ama eduadzewa bi. Osiande se wonnduaa hwee wo asaase no do a, hon nyinara kitsa su kor. Se wodua do aba a nna de oye papa anaa onnye papa no da edzi. Obaapayin bi a wu Enyanmanmu a medze no kaa nsenyanofonoho no kyere de okuanyi bi botum ehu asaase bi na oaka de asaase no nnye asaase papa, gyede otweon ma nsutober so ma wodua eduazewa wo do ansaana yeehu de onnye papa. Be yi nye dza abesen yi wo twaka bi, be yi kyere de nyimpa no dwumadzi na no suban nnye adze a ihu nyimpa no n'enyim ara a ibotum aka gyede yeaso hon ahwe ansaana. Nhwedo yi fa awar ho, se obi wo ho a nkorofu

hu no de no suban nnye ntsi obiara runntum nnwar no a, gyede owar ansaana yeehu. Iyi ntsi yerunntum mmfa suban bi nnto nyimpa do ber a yenngyen enyi nhwee hon yie.

Asaase a dua atsen si do no, noara so na dua a akyea so si do.

Be yi n'abose ntseasee mu no, oda asaase a dua a atsen si do na asaase kor noara so dua a akyea so si do. Yedze be yi ba ekuaye mu a, ndua a atsentsen no gyina ho ma ber a okuanyi no n'ekudze no aba anaa asow pii, nna ndua a akyeakyea no so gyina ho ma ber a okuanyi no ndobaa ammba. Ekuafu gye dzi de asaase a oma ndobaa papa no, noara so na otofabi a no do ndobaa nnhye da nnye papa. Iyi ntsi se okuanyi reye kua a, adze dem nsem yi nyinara ko adwendwenmu ansaana oedua dza ope de odua no. Be yi rekyere hen de obra dzi adandan. Otofabi a oye enyigye, otofabi so a nna aye dwe. Iyi ntsi se obra ma hen enyigye a womma yenda Nyame ase, se ammba no dem so na oye kodannda, akotorka, atsetsee na dza okeka ho no so a, otwar de yesie abotar tweon ber pa.

W'enyi tua wo hanoa a, ennse de ibobu san ma.

Ekuafu a hon enyi aber de woreye ekuadwuma enya mu ntseasee no dow kwa a wobeye mu edwuma a, woyer hon ho dow asaase a oso. Mpen pii no dem asaase no igyina ne fa a oye dzen de bohu kwa no anaa asaase no ne hanoa. Iyi ntsi se okuanyi bi ye kwa na se kwan no suar a igyina afa a ihu kwan no n'afa a onnyi de eye w'adwen de benya mfaso a obi a oye kwa kese no benya. Me nsenyinanofu no mu dodowara na wokaa kyere me de okuanyi biara a no kwa suar no nnya ndobaa kese. Iyi kyere de w'abomu na okyere w'adow.

Sɛ okuanyi biara to n'enyi na ohu ne hanoa a, nna ɔkyere dɛ no kwa no suar koraa, iyi ntsi otwar dɛ ɔdze n'enyi to ndɔbaa kumaa anaa kakraabi do. Dɛm bɛ yi wotum bu kyere okuanyi a no kwa suar na ɔpɛ ndɔbaa beberee anaa obi a ɔdze dwetsir kumaa bi ahyɛ n'edwuma mu na ɔpɛ dɛ onya mfaso pii. Sɛ okuanyi anaa odwumayɛnyi biara yɛ dɛm a nnye adze a ɔbeyɛ yie osiandɛ dza edze bɛhyɛ w'edwuma no mu no na ɔbɛkyere ndɔbaa anaa mfaso a ibenya wɔ edwuma no mu. Bɛ yi nntsia dɛ Nyankopɔn botum ehyira kumaabi a nyimpa yi do, mbom ɔkyere dɛ mbre wo dwumadzi tse no, no ho akatua so ara na ibenya. Iyi ntsi sɛ ereye biribiara na epe adze kor no kɛse a, dwetsir a edze bɛhyɛ mu no so ma no mu nyɛ dur.

Asaase a nsunsuan fa do no ɔnoara so na ewia bɔ a osi do.

Asaase da hɔ a, nsu tɔ a ogu do ma ɔyɛ nsunsuan fa do, demara so na ewia so bɔ a osi do anaa ɔhyɛ no. Sɛ nsu tɔ gu asaase do pii a, ɔma nsuka ba asaase no do, ewia so bɔ do a, onya nsunsuando wɔ asaase no do so osian ewia ne hyew ntsi. Dɛm adze ebien yi nyinara haw asaase no. Eso asaase no gye ne nyinara. Iyi kyere hɛn dɛ aba no ngui anaa no nduae nnda famu, ohia nsiyɛ na edwumadzen. Ne nyinara mu no, otwar dɛ okuanyi no hyɛ nsi na ɔhwew n'enyi ho mfifir yɛ edwuma mbre ɔbeyɛ a obenya ndzɛpa a ɔnam do ma ɔyɛɛ edwuma no. Hɛn daa daa abrabɔ mu no, bɛ yi da atsetsee na kɔdannda a ɔbra tum dze nyimpa famu, ne nyinara mu no otwar dɛ nyimpa no mia n'enyi na ɔdze sɔw dɛm akotorka no nyinara.

Mpanyimfo se, se nyimpa beenu per asaase ho a, wɔdan gya.

Dem be yi da nokwasem bi a ɔwɔ ekuafɔ ho edzi; wɔko asaase ho. Asaase da hɔ a runntum mma do nnkɔ beebi. Osian iyi ntsi, ekuafɔ gye dzi de mbre asaase no wɔ no hɔ ɔhen no na asaase no ye nedze na otum hye mbra de mma obiara nnye do edwuma. Me nsenyianofo no mu kor daa no edzi de mber bi beebi a ofi no, ekuafɔ beenu twee asaase ho manso ma kor dze ebufuw dzii ne nyenko no no so. Wɔdze asem no kor aban mu ma ɔkebaa de otwar de wɔkyer nyia odzii ne nyenko nono so no. Ahanamakye bi aporisifo yee de wɔbɔkɔ akɛkyer no so. Wɔkɔree no nna no so eku no ho wɔ ne dan mu. Asaase no bɔɔ dem nkorɔfo beenu no a nna wɔreper asaase no ho no. Wobu be yi dze kaa nkorɔfo a wɔtwetwe asekan wɔ hɔnho osian adze a ɔye ɔdomankoma dze ntsi de se wɔye dem a mbre ɔtse biara dabi obefi hɔn nyinara nsa osiande owu da amansan kɔn mu. Iyi kyere de obiara a ɔper adze bi tse dem ho no ye denara mpo a orinnkesi hwee.

Mpanyimfo se, wɔmmfa ɔwɔra asaase nntoto asaase pa ho.

Yegyina hɔn nyimdzee a yegyina do dze asaase papa toto asaase bɔn ho do a, yebotum aka de ber biara nyimpa pe adze papa kyen adze bɔn. Asaase pa na ɔwɔra asaase nyinara ye asaase dze, eso nyimpa taa dze asaase pa no ye hɔn ekuadwuma kyen ɔwɔra asaase no. Iyi ne siantsir nye de, ɔwɔra asaase no dze ekuadwuma kumaa bi na botum aye wɔ hɔ anaa eduadzewa kumaa bi na otum ye yie wɔ ɔwɔra asaase do. Nsenyianofo no mu kor kyere mu de, ɔwɔra mu asaase dze ɔwɔ ber pɔtsee bi a wɔye do edwuma a ɔye yie, iyi nntse dem wɔ asaase papa do. Ber biara a epe de eye asaase pa mu edwuma biara otum ye yie wɔ afe mu no nyinara mu. Iyi ntsi ɔye a ekuafɔ taa pe asaase pa no kyen ɔwɔra asaase no. Dza iyi kyere nye de, asaase ebien yi botum ase, mbom wɔnnye per. Yegyina ntseasee mapa do a,

yebotum aka de ɔhaw, dwumadzi anaa nsem bi botum edzi nse, mbom nnye adze a wɔye per da.

Asaase bɔn ben esutsen mpo a, ɔda ho ara ye asaase bɔn.

Asaase a ɔben nsu no ber biara na no do ye nwin, iyi ntsi ɔpe ber mpo eye edwuma wɔ ho a itum nya ndɔbaa papa. Ansaana asaase bi beben esutsen na aye asaase bɔn no nna nyimpa no dwumadzi bi na ama aba no dem. Okuanyi bi a ɔka me nsenyianofo no ho kaa de, ansaana asaase bi a ɔben nsu beye asaase bɔn no nna mbobaa wɔ asaase no mu anaa nyimpa no dwumadzi bi tse de ndur a wɔdze ye edwuma na anhwea a ɔben esutsen a wotsi dze dzi dwuma ahorow no ntsi ama asaase a ɔben esutsen ahwer ne ndze pa a ɔboa ma nduadzewa a wodua wɔ do nyin. Se asaase ye dem a, ɔmmfa ho de ɔben esutsen, edwuma a ebeye wɔ do biara nnye adze a ɔbeye yie. Iyi ntsi, asaase a ɔben esutsen na ɔda ho ye asaase bɔn dze nna ɔkyere de asaase no nnye koraa. Yɛdze be yi toto hen daa daa abrabɔ ho a, Nyimpa a ɔye nyimpa bɔn no nnye adze a ɔbesesa da. Obotum aba de ɔhye nyimpa pa dodow ntamu eso ne bra bɔn no ara na ɔbɔbɔ, wɔfa asaase bɔn a ɔda esutsen ho no suban.

Asaase a okuanyi gyina mu aba no, ɔnoara so na obegyina mu etwa.

Okuanyi biara a obodua aba no, bea a oduaa aba no ara na otwa aba no wɔ. Wonndua aba wɔ ha na wonnkotwa ndɔbaa no wɔ kan noho. Adodɔw mu no, otwar de okuanyi dze ne ndzɛmba nyinara toto yie. Se okuanyi ammfa ne ndzɛmba anntoto yie ber a adodɔw edu a, efuw tum hye no kwa do araa ma kwa no sɛɛ. Wɔdze dem be yi kaa ekuafɔ de beebi mbre wɔyɛɛ hɔn kwa no wɔmma hɔn enyi nku ho ama se otwaber du so a oeenya ndɔbaa papa. Se amma w'enyi ennku wɔdze ho na edze w'enyi tsim wo nyenko nedze do ma otwaber

du na ikotwa obi no ndɔbaa a, nna tserɛ ewia. Obi mmfi noara no kwa mu nnkotwa obi no kwa mu ndɔbaa mma ɔnnɛ yie. Asaase a iduaa wo ndɔbaa wɔ do no noara do aba na otwar dɛ itwa. Yebotum atserɛw bɛ yi ne ntseasee mu akyerɛ mu dɛ nyimpa bu dza odua. Ntsi sɛ ibu aba papa a, nna tserɛ iduaa aba papa, demara so na ibu aba bɔn a nna tserɛ iduaa aba bɔn.

4.1.2 Mbɛbusɛm a ɔfa kwa no ndɔwee na asaase no do nsiesie ho

Asaase no ndɔwee na no do nsiesie yɛ adze a no ho hia papaapa wɔ kuayɛ mu; ɔyɛ ber a wɔdze siesie asaase na wodua do aba. Kwan a wɔfa do siesie asaase no, okuanyi no n'adwempɔw a ɔdze reyɛ edwuma no na adze ho na Mfantsefo hwɛ ho dze bu bɛ fa kuayɛ ho a ɔfa mbɛ asaase no ndɔwee na asaase no do nsiesie tse. Dem fa yi hwɛ mbɛbusɛm a Mfantsefo dze dzi dwuma a ɔfa Mfantse ekuayɛ ho ber a wɔdɔw hɔn asaase na asaase no do nsiesie. Iyi da edzi wɔ mbɛbusɛm a ɔka do yi mu.

Erodɔw kookoo haban na ekɔto nwaba a wɔfa.

Asaase do nsiesieber mu no, ekuafɔ dzi dwumason wɔ asaase no ndɔwee na no do nsiesie mu ama aboa hɔn ma woetum edua aba biara a wɔpɛ dɛ wodua no wɔ dem ber no mu. Sɛ okuanyi rodɔw no kwa a, otum tu ehu wɔ adɔw no mu a bi mpo wɔ hɔ a n'enyi nda. Dem ehutu no bi nye nwaba. Adɔw mu no nnyɛ okuanyi no n'adwenmupɔw nye dɛ ɔdze rohwehwe nwaba, mbom sɛ ɔrodɔw na ɔkɔto a ɔnndan nngya. ɔyɛ ehutu a oenya efi adɔw no mu. Me nsɛnyianofɔ no mu bi kaa dɛ sɛ okuanyi rodɔw na otu dem ehu yi bi a mpen pii no wɔka dɛ ɔyɛ okuanyi mapa. Iyi ntsi ekuafɔ rodɔw na wonya bi ber woridzi dem dwuma yi a, wɔfa. Ɔwɔ mu dɛ nnyɛ nwaba no ntsi na wɔrodɔw kwa no, ɔyɛ mfaso bi a onnyi dɛ

wɔhwɛ ma ɔkɔ kwa. Hɛn daa daa abrabɔ mu no, sɛ akyedze bi a w'enyi nnda pue wo kwan mu a, otwar dɛ egye anaa onnyi dɛ epow, osiandɛ ɔyɛ obi na ɔapra ne yamu mu dze akyedze no ama wo.

Sɛ edze Memenda dɔw a, mmfa Memenda mmbu.

Ekuafɔ dze dem bɛ yi dzi dwuma dze kyere dɛ biribiara na ber pa a wɔdze yɛ. Okuanyi bi a ofi Baifikurom kaa dɛ, okuanyi biara nnyi hɔ a obotum adɔw ndɛ na ndaawɔtwe ekyir no woetwa nondɔbaa. Onkotum esi da dɛ okuanyi bɔdɔw Memenda na n'adzekyee Kwesida no ara obotum etwa. Ekwadwuma mu no yɛwɔ ber a wɔdze dɔw asaase no, ber a wɔdze tsia, ber a wɔdze hyew, ber a wɔdze dua anaa gu aba, ber a wɔdze dɔw eduadzewa no ho na afei ber a wɔdze twa anaa otwaber. Dem aber ahorow a ɔwɔ ekuadwuma mu yi no mu biara okuanyi no hwew n'enyi ho mfifir. Ɔyɛ adze a otum mpo bu ekuafɔ binom abaw mu ma wogyaa kwa no ma ɔsɛɛ. Wɔdze dem bɛ yi hye ekuafɔ nkuran dɛ mma wɔmmpa abaw wɔ hɔn dwumadzi biara mu osiandɛ sɛ wɔreberɛ wɔ hɔn dwumadzi mu a, ekyir yi mfaso bi bɛba hɔn berɛ no mu.

“Ngyinahɔma ntseasee bi da edzi wɔ hɛn adwen na hɛn ntseasee mu a ogyina hɛn nyimdzee a yɛwɔ no wɔ abɔse ntseasee na ntseasee mapa ne nyinara mu” Geeraerts (2010: 206). Yegyina hɛn nyimdzee a yɛwɔ no wɔ ekuadwuma mu dɛ nnye da ara a wodua aba no na wotwa no do tse ase dɛ biribiara a nyimpa beyɛ biara no wɔ ber pɔtsee a wɔdze yɛ. Bɛ yi hye hɛn nkuran dɛ ber bi wɔ hɔ a otwar dɛ ehew w'enyi ho mfifir na ber bi so wɔ hɔ a, enyigye ahyɛ no ma anaa yedzi dza yehweew hɛn enyi ho mfifir yɛ no ho ndzinoa. Iyi ntsi sɛ ber so dɛ okuanyi yɛ edwuma a, obir no bɔgyaa enyi yɛ edwuma osiandɛ onyim dɛ ɔrennkyɛr na otwaber no aba.

Basia tse de mbirikisi a okuanyi daw nye denara a obenya ndua akese efi mu.

Mfantsefo ko do ara dze mbe a oda hon adwenmusem a oda edzi wo hon ekuadwuma mu a wohwe ho dze toto hon abrabo ho. Ehwe be a owo sor ho yi a. ngynahoma mu no yehu de 'mbitikisi' ye efuw a opue wo kwaabirentuw mu na no ndo wee ye dzen. Naaso se okuanyi kum ne tsirmu daw a, onya ndua akese fi mu dze bi ye nyena na ohyew bi so biriw. Me nsenyianofo no kor kaa de, "Ntseasee a be yi dze to gua no da Mfantsefo adwenmusem a wowa wo awar ho. Wodze mbirikisi no gyina ho ma obaa na ndua akese no gyina ho ma mba a obaa no wo hon ba ebusua mu." Mbaa hon ntsetsee ye yaw anaa nye hon tse a nye dzen tse de okuafo rodaw mbirikisi. Mbom se banyin nya abotar na ohu no tsena a, owo mba ma no tse de mbre okuanyi no nya ndua akese fi mbirikisi no ndo wee mu no. Dza be yi rekyere hen nye de adze papa biara ne nyae nnda famu, ntsi otwar de yemia hen enyi wo abrabo mu ama yeenya daakye papa ama henho nye hen mba anaa ebusua.

*Obi a ofi Enyan Abaasa rok Ekumfi Mboroboto akodaw
Obese burow no, nna onyim dza oehu*

Yehwe be yi a owo sor ho yi a, abose ntseasee no da okuanyi a ofi Enyan Abaasa (ekuadwuma kurom/kurow a woye ekuadwuma wo ho) a oroko Ekumfi Mboroboto (far kurom) ekodua eburow, ber a ntseasee mapa no so da nyimpa a owo adwempow bi.

Mbebusem a Mfantse ekuafu dze dzi dwuma no kyere de, se obi kohwehwe biribi wo bea a adze no ho ye na wo ho a, nna tsera nyimpa no wo adwempow bi a onam do ma orokohwehwe adze no wo dem bea no do. Me nsenyianofo no mu kor kaa de ekuadwuma dze nkye ehwe Abaasa na Mboroboto a, nye Abaasa na woye ekuadwuma wo ho. Ekumfi Mboroboto ye mpoano kurow a wonntaa nnye ekuadwuma wo kurow no do. Nkye Enyan

Abaasa ye kurow a oye papaapa de woye ekuadwuma osiande kurow a woye ekuadwuma wo ho. Eso se obi fi Enyan Abaasa ko Ekumfi Mboroboto de arekeye ekuadwuma a nna nyimpa no wo dwuma potsee bi a otwar de odzi. Mfantsefo mu no nkorofu wo adwempow a otaa hon dwumadzi ekyir. Be yi kyere de se obi hwehwe biribi wo bea a onnkenya bi a nna nyimpa no wo siantsir a odze reye dem.

W'abomu na okyere w'adow.

Be a owu sor ho yi kyere dza nyimpa botum aye do a ne ngyinado nye ahoboa anaa dza okuanyi no aye anaa wo. Ekuadwuma ye edwuma a ohia ahoodzen ankasa, iyi ntsi haban dodow a okuanyi botum edzi ho dwuma anaa aye ho edwuma no gyina n'ahoboa anaa n'ahoodzen do. Enyan Apaa kuanyi bi kyere de, nnye adze a okuanyi botum dze yafun pan beye edwuma ma aye yie; otwar de odzidzi yie na odze kehya edwuma a dem da no obeye. Se okuanyi no mee yie a nna tsero oenya ahoodzen a obotum dze aye dem edwuma no. Abrabomu no, be yi rutu hen fo de ansaana nyimpa dze ne nsa beka biribi no otwar de oye krado anaa oboaboa no ho yie ana. Osiande wo mpontu wo w'edwuma mu no gyina ahoboa a eyee ansaana erehye ase. Nyimpa a oammboa no ho ansaana oedzi dwuma bi no nnye adze a obotum edzi dem dwuma no ewie.

Edaadaa wo dadze wo serebo do a, onno so daadaa wo wo nkonan enyim.

Dadze nye ekuadwuma mu edwumayedze a odzi dwumason wo mu. Odzi akotsen wo adow na ekuaye ho dwumadzi ahorow pii mu. Iyi ntsi ber biara a okuanyi dze dadze bedzi dwuma no ohwe de ne dadze no ano ye ndam a oboboa no ma n'edwuma no aye ntsem na ako do waano waano.

Be yi n'abɔse ntseasee gyina hɔ ma okuanyi a ɔnnsew ne dadze ansaana oekedzi no dwuma. Ntseasee mapa gyina hɔ ma boa a ɔmmboa noho ansaana oekedzi no dwuma. Adɔw ye edwumadzen a ohia ahoboaboa ansaana nyimpa no ahye dwumadzi no ase. Dwuma bi ne ndzii gyina hɔ ma adɔw na ahoboa a wɔye dze dzi dwuma no gyina hɔ ma dadze ne nsewee no. Se annsew dadze no yie a, adɔw no so ye dzen a ɔmma okuanyi no nndu no botae ho. Otum mpo bu okuanyi no n'abaw mu ma ogyaa adɔw, okuanyi no ne nsamu so tum paapaa osian ne dadze a n'ano ekum ntsi. Korakora no, be yi kyere de otwar de nyimpa boaboa noho yie ansaana oeedzi dwuma.

*Sebew, se inya nkwasea ahooɔzen dze dɔw w'asew a, onya
nkwasea sika dze gu w'awar.*

Be a otsia ebiase yi gyina hɔ ma okuanyi a ber biara ɔye edwuma ma n'asew na n'enyi nnkɔ noara nedze ho. Ntseasee mapa mu no, ɔda obi a ɔye edwuma a ɔnnsow aba biara edzi. Me nsenyianofo no mu kor kaa de ekɔ nkuraase dodowara mu a hɔn dwuma tsitsir nye ekuadwuma no a, wɔtaa dze hɔn mba mbaa ma mbanyin a wonyim ekuadwuma ye awar ama woetum aboa hɔn wɔ hɔn ekuadwuma ne nyee mu. Se banyin a wɔgye awar a ɔtse dem ma no no annsoa ne tsir a, otum dze ne mber nyinara ye edwuma ma ne nsewnom. Okuanyi a ɔye dem no ma n'asew no nya noho ber a ɔno a ɔdɔwee anaa ɔyee edwuma no dzi hia. Dza iyi dze beba nye de se okuanyi no ennya sika anaa enntum annhwe ne yer na ebusua no a, ɔbaa no botum eguan akɔ n'egya hɔ akepe biribi dze ahwe noho. ɔwɔ mu de eboa w'asew wɔ n'edwumaye mu a oye, mbom otwar de wɔdze nyansa to ho ama eenya ber dze edzi woara wɔdze ho so dwuma. Be yi kyere hen de otwar de nyimpa boa nkorɔfo a wohia no mboa, mbom onnyi de ɔdze n'ahooɔzen na dza ewɔ nyinara

boa nkorɔfo na igyaa woara wodze to hɔ. Iyi boa ma onyia no so nya dza obotum dze etwitwa noho wɔ ɔbra sar yi do.

Daakye asem ntsi na wɔdɔw kɔto mpuwa a, wogyam ho.

Adze a no ho nnye na koraa wɔ kwaa mu nye de obi rodɔw kwa a ɔbɔkɔ akɔto mpuwa. Nnye siantsir a okuanyi no rodɔw nye mpuwa no, eso ogyam ho anaa osiesie ho dze tweɔn daakye. Iyi nye nhyehyee a nkorɔfo ye dze to hɔ tweɔn nsutɔber anaa Esusowber no wɔ twaka. Nyimpa a wɔye nhyehyee papa dze tweɔn Esusowber no, odu ɔpeber a wɔpe dza esusow tue a wɔdze bɔhwe hɔnho gu hɔ. Iyi boa ma hɔn a wɔye nsiesie papa no nya dza wobedzi biara wɔ Esusowber no mu. Nsenyianofo no mu kor kaa de mpuwa ye adze a n'ase nkumii ye yaw ntsi se nkorɔfo ye kwa wɔ beebi na wogyaa edwuma ye wɔ hɔ a, otum hyehye epe no mu mfe pii. Iyi ntsi se ekuafɔ binom wɔ hɔ a wɔrodɔw na wɔkɔto a na woetwa egu. ɔye a na hɔn were efir de obotum aye hɔn kɛse ɔkyena bi. Hen daa daa abrabɔ mu no, be yi kyere hen de onnyi de biribi nye yi a yehwe dza ɔye hen dze nkotsee na yegya nkorɔfo dze egyaagyaamu. ɔba no mbahwe anaa abatsetse mu dem a, onnyi de yɛka de obi ne ba nnye wo ba ntsi se ɔreye bɔn anaa kɔm dze no a remma no edziban. Ekyir yi se Nyame ye no adom ma ɔye yie a annye a nna no so abɔ wo etsiɔdzen anaa annye a na wo so ekehia no mboa ɔkyena bi.

Se erodɔw na wo sekan twa wo kɔtɔkorba a, wɔmmbɔ ho ngua.

Mfantsefo ekuafɔ rodɔw a, wɔtaa dze dua ka dadze a wɔdze rodɔw no ho ma ɔboa adɔw no. De wɔdze kitsa nsa nyimfa anaa bankum no mu no dze ogyina nyia ɔrodɔw no do, de ɔye bankumnyi anaa nyimfanyi. Wɔdze dua ka dadze ho ber a wɔrodɔw. Iyi ntsi ɔye denara a dadze no botum etwa dua no. Se iyi si a onnhia biara de wɔbɔ ho ngua ma wosiesie asem

no, osiandɛ dadze na dua a wɔdze dɔw no nyinara boaboa hɔn ho wɔ adɔw mu. Osian hɔn nkitahodzi ntsi ɔyɛ adze a dadze no botum aka dua a wɔdze dɔw no, ɔba no dɛm a onnyi dɛ wɔfa no dɛ ɔyɛ adze a ɔyɛ hu biara. Ngyinahɔma mu no, dadze na abaa a wɔdze dɔw no gyina hɔ ma nyimpa a wɔwɔ nkitahodzi mapa na wɔyɛ ndzɛmba ahorow bɔ mu. Hɛn daa daa abrabɔ mu no, nyimpa a wɔtse dɛm no na wɔtaa yɛ adze tsia hɔnhɔ. Osian hɔn nkitahodzi ntsi sɛ adze bi tse dɛm si a, ɔnnkyer biara na hɔnara asɔw hɔn adze ano a wɔnnhwehwe abaguafo dɛ wonsiesie mma hɔn.

Sɛ epɛ wa 'sɛw ne pa ekyir ahwe a nna ema no kokwaa do efuw ma ɔdɔw.

Asaase a Mfantse ekuafɔ dɔw no no wɔ bɔbew ahorow, bi taa, bi so yɛ akoko akoko na bi so purow. ɔyɛ adze a sɛ obi rodɔw wɔ koko do na igyina koko no n'ase a ihu nyia ɔwɔ koko no do reyɛ edwuma no ne sisiw ekyir. Nsenyianofo no mu kor so kaa dɛ kokwaa do edwumayɛ nnyɛ adze a ɔda famu koraa, bɔfow koko no ekodu koko no do no mpo na abere. Sɛ nyimpa a ɔrofow koko no yɛ panyin anaa n'enyi efir a, ɔno gyedɛ ɔkom no mu kakra ansaana. Iyi tum ma sɛ nyimpa no sor atar no yɛ tsia a ne sisiw ekyir gu hɔ. Mfantsefo mu no nnyɛ adze obi tum hwe n'asew ne sisiw ekyir, iyi ntsi nnyɛ adze a wɔda so daa mpo dɛ wobohu. Iyi ntsi sɛ obi pɛ dɛ ohu n'asew ne sisiw ekyir a, osiandɛ onyim dɛ nnyɛ adze a ɔsɛ dɛ ɔyɛ ntsi bɛ yi kyere dɛ ɔma no koko do asaase anaa haban ma ɔyɛ do edwuma. Asew ne sisiw ekyir no, ngyinahɔma mu no, ogyina hɔ ma nyimpa ne mberɛwɛyɛ, na rema no asaase a ɔda koko do no so gyina hɔ ma edwuma bi a edze ma nyimpa no. Ihu nyimpa no ne mberɛwɛyɛ ber a edze edwuma a ɔyɛ dzen ama no. Bɛ yi kyere hɛn dɛ sɛ epɛ dɛ ihu nyimpa bi ne mberɛwɛyɛ anaa n'ahɔɔdzen a, ema no edwumadzen a nna otum kyere no yie.

Ansaana Kweku Ankan ɔrehyew n'efuw a annhyew no, na ofi Asenyi n'adɔw bɔn.

Wɔdɔw kwa na ahyew ka adɔw anaa ekuadwuma ho wɔ amambra ahorow a ɔwɔ wiadze mfɛndzanan nyinara mu a Mfantsefo ka ho. Sɛ okuanyi dɔw n'asaase wie a, ogyaa ma efuw no wow yie na ɔhyew. Mbom sɛ nyia ɔdɔw kwa no anndɔw no yie na oenntsia no yie a ne nhyewee yɛ yaw. Ehwɛ bɛ yi a ɔwɔ sor hɔ yi a, Kweku Ankan enntum annhyew n'efuw osian Asenyi n'adɔw bɔn ntsi. Asenyi gyina hɔ ma odwumayɛnyi kwadwefo a ɔnnye edwuma yie. Efuw no a annhyew yie no so gyina hɔ ma edwuma a ɔnnye no yie. Me nsenyianofo no mu kor kaa dɛ, ekuadwuma mu no sɛ edɔw epe anaa ibu hanyinii na anndɔw no yie a, no mu edwuma so yɛ yaw. Iyi ntsi sɛ obi rodɔw kwa ma okuanyi ayɛ edwuma wɔ do na ɔanndɔw no yie a, ɔma okuanyi no bere papaapa wɔ n'edwumayɛ mu. Nhwɛdo bi tse dɛ obi a oennsua edwuma yie ansaana ɔropon no ho no, no ho dahɔ ber a ɔdze dza okosuae no reye edwuma. Bɛ yi kyere hɛn dɛ akwadwer ma hɛn nsunsuando bɔn wɔ hɛn edwumayɛ mu. Iyi ntsi, edwuma biara a ebeyɛ no, otwar dɛ eyer woho yɛ no yie. Bɛ yi kasa tsia akwadwer wɔ Mfantsefo ekuafɔ mu.

Kwaa a onndzi gyina no, na wodzi ase mpepew.

Mfantsefo asaase beberee wɔ hɔ a kwaa wɔ do; bi yɛ kwaa birentuw, bi so yɛ kwaawa. Ɔtɔfabi a ekuafɔ tum dɔ kwaa bi mu kɔ no mu ndua a ɔwɔ mu no bi mpepew, ɔba no dɛm a kwaa no tum dua do gu. Nsenyianofo a menye hɔn dzii dwuma no mu kor kaa dɛ ɔnam nyimpa no dwumadzi bi a ɔsɛɛ kwaa ntsi na ɔyɛ a aban hyɛ mbra ketsee fa kwaa ahorow a ɔwɔ ɔman yi mu ho dɛ mma obiara nnkɔ mu nnkedzi mpepew no. Ɔkyere dɛ nyimpa ruwura kwaa no mu reɛ nyena nkakra nkakra wɔ mu no na kwaa no no ngui ara nye no, osiandɛ wɔdze no dɛm araa na wɔdze adan nduatwitwa. Sɛ dɛm suban yi kɔ do mber tsentsen a,

kwaa no tum dan asaase pradadaa anaa ɔdan asaase a wɔyɛ do kwa ara. Bɛ yi kyere hɛn dɛ sɛ wɔnam nduatwitwa do besɛɛ kwaa a, wɔhyɛ ase dzi kwaa no ase mpɛpɛw. Sɛ yɛdze hɛn nyimdzee a yɛwɔ no wɔ kwaa ho no fa bɛ yi ho a, yehu dɛ bɛ yi kyere hɛn dɛ sɛ biribi ribesi a, no ho nsenkyerɛdze dzi kan sisi ansaana adzekor no esi.

Edze w'ano dɔw kantonsoɛ a, bi nnwɔ wo.

Ɔwɔ mu dɛ ekuadwuma ne nyɛɛ nnda famu dze naaso sɛ inya asaase a kantonsoɛ wɔ do a, no do edwumayɛ nnda famu koraa. Ɔyɛ nsoɛ a no ho edwuma yɛ dzen papaapa osiande no dua no yɛ dzen ntsi ɔgye mber ansaana no ndɔwee edzi mu. Igu do a rodɔw no so na nsoɛ no rowowɔ wo.

Kantonsoɛ yɛ nsoɛ bi a ɔtaa pira ekuafɔ ber a wɔrodɔw hɛn kwa. Ɔgye ekuafɔ a woebir hɛn enyi ho nkotsee na wotum gyina kantonsoɛ no ndɔwee ano. Ekuafɔ a menyɛ hɛn dzii dwuma no binom kyere dɛ sɛ obi dze n'ano ara dɔw kantonsoɛ yi a, nnyɛ adze a kor mpo bɔwɔ nyimpakor no. Nyimpa tum dze n'ano yɛ ndzɛmba akese beberee osiande edze w'ano yɛ biribi a ɔnnyɛ dzen koraa. Bɛ yi kyere hɛn dɛ nnyɛ ano na wɔdze yɛ biribi, mbom irukum wo tsirmu anaa wo ntsin enyi ayɛ biribi no na wɔfrɛ no edwuma. Bɛ yi hyɛ hɛn nkuran dɛ yɛnyɛ edwumayɛfo mapa na nnyɛ ndaadaafo bi.

Mpanyimfo se, ekuadwuma mu sekan wɔ hɔ yi, obu wɔ adɔwdwuma mu hɔ ara.

Sekan anaa dadze nye edwumayɛdze tsitsir a Mfantse ekuafɔ no mu dodowara dze dzi hɛn dwuma. Sɛ worubu kwaa anaa wɔrodɔw habannyinii a, dadze anaa sekan yi ara na wɔdze dɔw. Wodu bea a ndua akese wɔ so a, ɔyɛ dadze anaa sekan yi ara na wɔdze bu. Ɔtɔfabi a

sekan anaa dadze no tum bu ber a okuanyi no dze reye edwuma. Ɔpanyin bi a oedzi mfe eduosia a ɔwɔ Baifikurom kyere de, ɔnntɔ ka de okuanyi beye edwuma wɔ ne haban mu na ne dadze bɔkɔ ekobu wɔ adzepambea. Ne nkyeremu a ɔdze maa n'asem a ɔkaa no nye de beebi a nyimpa dzi no dwuma no hɔ ara na edwuma no ho asem so ba a ɔto no wɔ. Yedze hen adwen tsim be yi n'abɔse do a, ɔda edzi de beebi a obi ye edwuma no hɔ ara so na edwuma no ho pira bi ba a otum pira wɔ. Be yi kyere hen de edwumaye mu dze ɔye denara a ɔhaw anaa pira bi beba hɔ eso mma ɔmma onnsian ɔno ntsi yenka de yenkeye edwum no bio. Otwar de nyimpa kum ne tsirmu ye edwuma ama oeenya ne daa daa edziban anaa edwuma no mu ndzinoa.

Mpanyimfo se, ekuafɔ nyinara nndɔw per.

Edwumayefo a wɔye ekuadwuma gu mu ahorow. Yewɔ hɔn a wotum dɔw kwa kese na hɔn wotum dɔw kwa nkakramba. Iyi gyina siantsir ahorow do. Ekuafɔ no bi wɔ hɔ a, wonyaa asaase kese a nkye wɔbeye kwa kese. Osian ahɔɔzen a wonnyi ntsi bɔhwɛ no na hɔn kwa so aye kumabaa. Ɔno nkyere de nyimpa no ye kwadwefo. Mbre n'ahɔɔzen botum dze no edu ara nye no. Ekuafɔ no mu bi wɔ ahɔɔzen wɔ sika afamu ma wɔdze sika hye hɔn ekuadwuma mu ber a binom so nnyi sika ntsi wɔye kakra a wobotum biara. Iyi da edzi de okuanyi n'ahɔɔzen na ɔkyere adɔw a obotum adɔw.

Kwan a okuanyi bi no ho ye har wɔ n'edwumaye mu na mbre n'edwuma no n'emudzi beye no nnkeye de mbre okuanyi fofor nedze beye. Yedze hen nyimdzee a yewɔ no wɔ ekuafɔ a wɔye ekuadwuma wɔ akwanhorow do eso hɔn nyinara tum bu ndɔbaa a hɔn ahɔɔzen

botum do tse be yi ase. Dza be yi dze to gua nye de nyimpa nyinara nnye per wo hon edwumaye mu, ahoorden mu, adwenmu mpontu, demara so na nsatsea nyinara so nnye per.

Mpanyimfo se, se okuanyi enntum anndow n'efuw a, odan kwaa.

Okuanyi biara n'enyidoadzehu nye de obotwa ndobaa a osombo wo n'edwumaye ekyir anaa otwaber mu. Mbom adze kor a otwar de yehye no nsew nye de ansaana okuanyi no botae yi botum aba mu ama no no gyede odow n'ekwadze no ho ansaana oetum etwa ndobaa a ope. Panyin bi a oka nsenyianofo no ho no so daa no edzi de nnye okuanyi biara ne pe nye de nkye no kwa beka efuw mu, eso otofabi a akwambew bi ba bebew no. Dza otaa ma okuanyi no kwa taa ye kwaa anaa ka efuw mu no bi nye akwadwer, sikasem, nsu a onnto, yarba, manso, mpofirmu yarba na adze. Okyere de se dem adze yi mu biara to okuanyi a otum ma kwa no ka efuw mu ma onam do tum see koraa. Se okuanyi no anndow no kwa ho yie a efuw begye kwa no afa ma okuanyi n'enyidoadzehu no remmba mu. Hen daa daa abrabo mu no, dza be yi rekyere hen nye de wodze nkodzen na ahopakyir nya ndzepa wo abrabo anaa obrasar yi do. Be yi kasa tsia akwadwer na oma nkuranhye wo edwumadzen mu.

M'anndow wo nan enyim, hwehwe asaase dow na enya adze.

Wo nan enyim a owo be yi mu no gyina ho ma kwa kumabaa. Dza be yi kyere nye de onnyi de okuanyi dow kwa kakrabaa anaa kumabaa na ohwe ndobaa beberee kwan. Yegyina hen nyimdzee a yewo no wo ekuaye na no mu dwumadzi mu tse be yi ase yie. Se okuanyi dow kwa kakrabaa a, onya ndobaa kakraba de mbre obi a oenya ber adow kwa yantamm benya. Iyi kyere hen de se okuanyi botum enya ndobaa papa a gyede okum ne tsirmu ye kwa kese na omia n'enyi ye mu edwumadzen ma aboa no ma oenya dza ope de onya. Hen daa daa

abrabɔ mu no dza be yi rekyere hen nye de onnyi de nyimpa dze foto kumaa bi hye edwuma mu na oda dwen de ofitsi prekoƆer a obenya mfaso keƆe. Se epe de inya mfaso keƆe a, nna otwar de imia w'enyi na edze foto keƆe hye w'edwumaye mu. OƆan kyere hen de onnyi de yeye akwadwer wɔ hen bra mu na yeye hen adwen de yebenya ndzinoa papa wɔ ekyir osiande akwadwer no nua nye kɔm. Otwar de yemia hen enyi wɔ hen edwumaye mu ama yeenya mfaso pa wɔ ekyir.

Enntum wo mbirikisi dɔw a, na efre no nsamampɔw.

Mbirikisi ye kwaabirentuw a no ndɔwee ye dzen papaapa. Se okuanyi enntum andɔw dem mbirikisi yi a nna ɔfre no nsamampɔw. Nsenyianofo a medze hɔn dzii dwuma yi no mu kor a ofi Enyan Apaa kyere de nkan no nna Mfantsefo nndɔw hɔn nsamampɔw. Nsamampɔw ye bea a wosie nyimpa a oewu ntsi nna wɔndɔw. Nna wɔwɔ gyedzi bi de dem mbea ɔtse dem no wɔndɔw hɔ. Iyi ntsi se obi nntum nndɔw no kwa a, ɔmppe de wɔbeka de ɔye kwadwefo ntsi na ɔse ɔye nsamampɔw. Nyimpa binom hu edwuma bi de ɔye edwuma a wonnkotum aye a, wɔpe adze bi dze hye no de mbre ɔbeye a wonnkobu hɔn akwadwefo. Abrabɔ mu kankɔ na yiedzi tse de mbirikisi no ndɔwee, se emmia w'enyi a, nkukuhwease bogura w'abaw mu. Oreyere hen de ɔbra hia nsiye na enyiɔdzen. Itum sisi w'anamɔn yie a, dza epe de eye biara no botum aye. Be yi tu hen fo de yemmia hen enyi a yenhye nsi wɔ ɔbra mu.

Mpanyimfo se, ekuafo yi sa a, wɔfa mu ye kwan.

Se okuanyi papa biara ye kwa a, ɔbɔ kwan a ɔfa mu kɔ no kwa no mu. Dza ɔye a ɔtaa si nye de se okuanyi no twa sa no wie a, ɔwɔ mu wɔ mu wɔ mu araa na abeye kwan a nkorɔfo beberee fa mu. Iyi no ntunadze nye de se okuanyi rokɔdɔw no kwa a, onyim de se ɔammbɔ

kwan no a obotum epira ntsi abo kwan no na aafa mu ako ne haban mu. Owɔ mu araa na nkorɔfo begye asaase wɔ dem bea no do a, wɔfa kwan a okuanyi no abo no dada no mu dze ko hon so hon haban no mu. Wɔnam dem do ma kwan no tum beye kese ma ekyir yi wotum mpo ye aman dwuma wɔ kwan no no mbɔe mu. Nyimpa n'abrabo mu no, binom per de ber biara wobeye biribi a obeye amansuon nyinara dze. Otɔfabi mpo a dza dem nyimpa yi beye no bohu no na hon enyi nda mpo de obotum aye amansuon dze anaa kwasafɔ dze. Iyi ntsi be yi kyere hen de adze biara a ebeye no otwar de epra wo yamu ye osiande nnyim mfaso a obeye ama nkorɔfo daakye.

*Se abowa biara botwa m'adze ma aye me yaw a, onnye tse
de abowa okwaku a ne nsa hyia sekan naaso onndɔw.*

Okwaku ye abowa bi a ne nsa tse de nyimpa ne nsa so onmfa nndɔw. Dza okwaku tum dze ne nsa no ye ara nye de eduadzewa a nyimpa edua no na otwa na odzi. Be yi mu no, okuanyi no da no edzi de abowa biara twa n'eduadzewa a onnye no yaw, mbom se okwaku nkotsee twa n'eduadzewa a aye no yaw osiande ne nsa tse de nyimpa ne nsa ara per. Siantsir a okuanyi no ka dem nye de, okwaku ne nsa yi se adze suo dadze mu dze dɔw a nkye obeye yie eso onmfa nndɔw na adze twa okuanyi no ndɔbaa. Obaapanyin bi a owɔ Enyamanmu mu kaa de dem be yi fa nyimpa abran a wɔwɔ ahoodzen so wɔnnye edwuma na wowiawia hon a wɔaper aye edwuma no hon ekuadze. Dem nyimpa no tse de okwaku; wɔwɔ nsa na ahoodzen tse de nyia aye kwan no ara per eso nnye adze a woboku hon tsirmu aye edwuma. Mbom se obi ye dze a, wobowia. Ngyinahɔma mu no, okwaku no gyina ho ma nyimpa a wɔwɔ ahoodzen a wɔdze ye edwuma eso wɔnnye. Be yi kyere akwadwefo hon su na mbre honho ye ehi wɔ abrasar yi do.

4.1.3 Mbɛbusɛm a ɔfa aba no nduae anaa aba no ngui ho

Eduadzewa no nduae ka ekuadwuma mu nhyehyɛ ho. Mfantsefo adwenmusem no mu dodowara na ɔda edzi wɔ eduadzewa no nduae mu. Aba kor na ibodua, asaase kor a ibodua no wɔ do na ber pɔtsee a ibodua wɔ do nyinara ka asaase no na aba no nduae ho. Dem adwenmusem yi mu dodowara na ɔda edzi wɔ dem ekuadwuma mu ber yi mu. Mbɛbusɛm yi bi na ɔwɔ ase ha yi:

*Ifua ɔdo (dwow) a fa bankye si no mpam na innyim dza ɔkɔm
ba ɔbɛgye wo.*

Be yi a ɔwɔ sor hɔ yi wobu dze fa ekuadwuma ho a ɔfa eduadzewa no nduae ho. Ekuafɔ tum bu dem be yi ber a worudua aba demara so na obiara a ɔye Mfantsenyi tum bu dze hyɛ asem a ɔpe de ɔka no ma anaa ɔdze pia n'asɛm ekyir. Ekuafɔ mu dodowara na se wodua bayer a wɔdze ndua gyan si no mpam. ɔba no dem na se bayer no annye yie na dua no so wu na obu a, nna tserɛ okuanyi no ne nsa esi famu. Mbom, ekuafɔ a wonyim de bayer no botum ewu no tum dze bankye si no mpam ama se bayer no wu a woɛnya bankye no ahyɛ bayer no anan mu. Bankye no dzi dwuma de adze a ɔboa bayer no ma otum kɔ sor. Adwen a ɔtaa iyi ekyir nye de bayer no botum ewu, se ɔba no dem a okuanyi no botum dze n'enyi ato bankye no do. Yegyina ngyinahɔma a ɔwɔ be yi mu no do a, yetse ase de ohia de yɛdwen ebien wɔ biribiara a yɛbeyɛ ho ama dza yerohwehwe no annye yie a yeenya beebi dze hen tsir afa.

Mpanyimfo se, eduwa wɔhwɛ no nsowee ho na wɔdze edua.

Be a ɔwɔ sor ho yi so ye be a Mfantse ekuafɔ dze dzi dwuma wɔ hɔn edwumaye mu. Okuanyi biara a obodua aba no dza odzi kan hwɛ nye aba no de ɔye papa anaa ɔnnye papa. Ɔda okuanyi a ɔhwɛ eduwa no nsowee ansaana ɔdze edua ye abɔse ntseasee. Se okuanyi retsew n'eduwa a, ɔhwɛ eduwa a ɔsow yie na ɔye few na ɔdze dua de mbre ɔbeye a obenya dem eduwa noara bio anaa no nsowee no nye no beɛe. Se eduadzewa bi sow yie wɔ asaase bi do a, ɔkyere de asaase no ye ma dem eduadzewa no, mbom se ansow yie a nna ɔkyere de asaase no nnye papa mma eduaba no. Ɔba no dem ber a okuanyi no aye dza ɔse fata biara so eduaba no ansow papa. Okuanyi no hu dem na ɔsan dua eduaba noara wɔ dem asaase no do bio a, oruntwa/ɔrenntsew aba papa biara.

Idua kɔnkɔnsa eburow a ofifir wo nan ho.

Be yi so ye be a ɔfa aba no nduae ho. Worudua eburow a, mpen pii no wɔdze eburow n'enyiwa no ebien anaa ebiasa gu amona kor mu, okuanyi a ɔdze eburow n'enyiwa a ɔbor enum gu amona kor mu no mmboa eburow a orudua no ne yieye, nna ɔwɔ eburow no wura no ho adwen bɔn. Se ɔba no dem a eburow no mmfifir yie, na se eburow no per fifir a, onntum nnyin yie ntsi ɔnsow aba papa biara. Okuanyi a odua kɔnkɔnsa eburow no gyina ho ma nyimpa a osusu bɔn ma no nua. Be no ne nkaa no a ɔkyere de eburow no fifir nyia oduae no ne nan ho no so kyere hen nsunsuando bɔn a nyia osusu bɔn ma no nua no nya.

Dem nsunsuando yi da nyimpa a ɔtse dem no no suban edzi. Hen daa daa abrabɔ mu no, be yi da adwen bɔn no nsunsuando edzi. Adwen bɔn no nsunsuando tse de sekan-anofanu, otwa ha twa ha. Isusu adwen bɔn fa wo nua ho a, otum dze ntoto ba ebusua mu na no

nsunsuando nnka nyia wɔdween no ho adwenbɔn no nko, nyia ɔdween adwen bɔn no so nyia ho nsunsuando. Bɔn nnyɛ na ɔnnse de yɛsosɔw do.

Sɛ inya adagyɛr bɔ bankyɛ nkɔfi a, ɔbɔ sɛn bayer ne mbɛm.

Mfantsefo mu no kwan a wɔfa do fua ɔdze no yɛ soronko fi kwan a wɔfa do hyɛ bankyɛ. Bankyɛ ne nhyɛɛ mu no, wɔdze bankyɛ ndua no hyɛ famu, ber a bayer no wɔbɔ nkɔfi ma no. Iyi ntsi na bayer bɔ akɛsɛ kyɛn bankyɛ no. Ngyinahɔma mu no, bayer no gyina hɔ ma nyimpa a ɔwɔ akwangya beberee, nna bankyɛ so gyina hɔ ma obi a n'akwangya suar. Bɛ yi kyɛrɛ hɛn de, sɛ okuanyi nya ber bɔ nkɔfi ma bankyɛ de mbɛrɛ yɛyɛ ma bayer no a, ɔbɔbɔ akɛsɛ a sɛ enndu bayer mpo a, ɔbɛbɛn ho.

Nsonsonɛɛ a ɔda bayer ne kɛsɛ na bankyɛ ne kɛsɛ ntamu no gyina hɔ ma akwangya a ɔwɔ nyimpa mu. Nyimpa ne kankɔ wɔ abrabɔ mu ne kɛsɛ gyina akwangya na ntsetsee a onya ber a orinyin no. Eso bɛ yi mmɛrɛ nnkyɛrɛ de nyimpa binom nntum nnɛɛ hɔn akwangya. Bayer bi ɔ hɔ a nkɔfi a wɔbɔ ma no no so deɛnara mpo a, ɔbɔ ketsekɛtɛ. Bɛ yi hyɛ hia a ohia de yɛma nyimpa nyina akwangya kor anaa pɛpɛpɛr mu dzen. Nyimpa botum ayɛ pɛr wɔ ahonya mu, suban mu, nyimdzeɛ mu na enyimnyam mu ber a wɔama hɔn akwangya kor anaa ɔyɛ pɛpɛpɛr wɔ ɔbra mu wɔ hɔn ahyɛsɛ mu.

Ɔbaabɔn tse de ahaban mu bankyɛ ndua sɛ edze no gu apa do mpo a, obɛfifir.

Bɛ a ɔtɔ do anan no yɛ mbɛbusɛm a ɔfa Mfantse ekuayɛ ho wɔ ekuadwuma mu na no mu kor a wɔdze da nyimpa su bi edzi. Mbɛrɛ bankyɛ no su tse no nye abɔsɛ ntseaseɛ a nyɛnya

fi be no mu na nyimpa su no so kyere ntseasee mapa no. Owɔ mu de ɔbaa bɔn na bankye na be yi reka ho asem, mbom adwen mu no, ne ntseasee ankasa gyina nyimpa no su do.

Yegyina hen nyimdzee a ɔwɔ bankye no ndua ho a, ɔwɔ enyiwa beberee a hɔ na ɔfefew wɔ a ɔtɔfabi a ɔmmfa ho na beebi a osi anaa ɔhye. Dem su a bankye ndua wɔ nye ma otum fefew wɔ beebiara a ɔwɔ; de ɔye bea a ewia ano ye dzen anaa bea a nsu taa tɔ. Iyi kyere hen de bankye ndua tum gyina wimu nsakyeree biara ano. Edze be yi toto nyimpa ne daa daa abrabɔ ho a, nyimpa no su, de ɔye papa anaa bɔn, da edzi wɔ beebiara a ɔbɔkɔ. Nyimpa no suban da edzi wɔ bea anaa atsenae biara a ɔkɔ hɔ mu.

Eburow wɔdze n'enyiwa dua.

Eduadzewa biara n'enyiwa no na no ho hia papaapa wɔ no nduae mu. Onntɔ ka de okuanyi bi dze eduadzewa a n'enyiwa nnye bodua. Okuanyi biara rugu aba a, ɔpa eduadze a n'enyiwa no ye papa na ɔdze dua. Okuanyi papa biara nnyi hɔ a ɔpa aba a n'enyiwa no asɛɛ dze dua. Ekuafɔ a menye hɔn dzii dwuma no binom kyere de mbre nyimpa n'enyiwa na ɔye ne kandzea no, demara so na eduadzewa biara n'enyiwa na ɔboa no ma ofifir. Se eduadzewa n'enyiwa no sɛɛ a, idua a nnye adze a obefifir. Iyi kyere de eduadzewa biara n'enyiwa no ye adze a no hohia papaapa osiande se onnyi hɔ a nna eduadzewa no mfaso biara nnhye da nnyi ho. De mbre be yi kyere de eburow wɔhwe n'enyiwa ho na wɔdze dua no, demara so na ɔbra wɔ hɔ yi wɔmmbɔ no biara biara. ɔbra wɔtɔ bo bɔ na ohia enyigyen na ahweyie.

Mpanyimfo se, wommfua ɔdze (ɔdo) wɔ kaar kwan mu.

Kaar kwan nnye adzeduabea. Osian mbrɛ kwan no no su tse ntsi hɔ nnye mma eduadzewa biara no nduae. Iyi ntsi idua adze biara wɔ kaar kwan do a nnye adze biara a ɔbeyɛ yie. Eduadzeyɛ biara hia asaase papa ma aboa no ma efifir yie na asow aba papa.

Eduadzewa biara a okuanyi bodua no odua no wɔ haban mu, nnye kaar kwan mu bi. Nnye adze a okuanyi botum efua ɔdze wɔ kaar kwan mu ma ayɛ yie. Sɛ obi bisa okuanyi dɛ ɔmmfa no ndɔbaa no bi mma no ber a okuanyi no rodɔw nna nyimpa no tse fie ɔrennye hwee a, okuanyi no tum bu no dem bɛ yi dze kyere nyimpa kor no. Bɛ yi kyere hen dɛ abrabɔ nda famu. Ɔbra hia ahopakyir na nsiyɛ tse dɛ mbrɛ bayer no mfuae tse ara pɛr; okuanyi no hwew n'enyi ho mfifir bɔ nkɔfi, dodɔw ho ma Nyame ye no adom a bayer no bɔ ma otu kɔ gua anaa odzi. Mfantsefo hwe bere a ɔwɔ bayer dwuma mu ho na wɔdze bu dem bɛ yi.

*Mpanyimfo se, sɛ awo tse dɛ eburow no nduae a, nkyɛ ber
biara nyimpa bodua bi.*

Dem bɛ yi kyerekyere abawoo na eburowdua mu. Abawoo yɛ adze a nyimpa a ɔrowo no fa fona na yaw mu. Ɔyɛ adze so a ɔgye ber na ahoboa ahorow; basia fa yafun a, odzi abosoom akron ansaana ɔaawo ba. Eburow dze edua a dza ohia ara nye dɛ nsu bɔtɔ. Akyɛr araa nda esia dze kɔ ndaawɔtwe dze nna efifir. Sɛ okuanyi no dɔw ho yie a, otum twa no bosoom ebiasa ntamu. Yɛdze dem dwumadzi ebien yi toto ho a, ihu no pefee dɛ wɔnnɛ wɔ kwan biara do. Bɛ yi rekyere hen dɛ nnye adze a yebotum ebu dwumadzi ebien bi dɛ wɔyɛ kor. Ɔwɔ biara na kwan a wɔfa do siw ano anaa wɔfa do yɛ a obowie asomdwee mu. Iyi sɛso

ntsi wɔdze tu nkorɔfo fo de wɔmmfa hɔnho nyɛ ekuadwuma anaa obiara nndua bi ama ber biara woennya edziban wɔ fie.

Sɛ worufua na wɔnye wo fua a, worutu so a, wɔnye wo tu.

Mfantsefo wɔ kasa bi a wɔka de ɔbra yɛ nkegyankegya. Mfantsefo amambra mu no dza wɔbeyɛ biara gyina mboa do. Wohu de nyimpa no nua nye nyimpa ntsi hɔn dwumadzi biara mu no otwar de wɔboaboa hɔnho. Iyi mmpa ekuadwuma ne nyɛ mu. Sɛ okuanyi rokɔdɔw no kwa anaa ɔrekeyɛ edwuma wɔ no kwa mu na sɛ kwan no so a, otum nye obi dzi ndɔboa. Ndɔboa yi ne ndzii mu no otum ma ekuafɔ no edwumayɛ no kɔ do waano waano. Sɛ odu otwaber a wɔboaboa hɔnho so ma hɔn dwumadzi no wie mudzi. Mbom sɛ kwan no suar a nyimpa no nkotsee botum ne nsa aso ho edwumayɛ a, ɔno kwa no wura no nkotsee yɛ ho edwuma. Mfantsefo ekuafɔ dua aba na wɔnye wo dua a, odu aba no no ntwaɛ mu so a wonngya wo ekyir. Sɛ wɔdze iyi yɛ be na wobu dze taa hɔn nsem ekyir a nna wɔrekyerɛ de onnyi de nyimpa yɛ nyiyimu wɔ no dwumadzi biara mu; nyimpa a enye no hyɛɛ ase no noara so na sɛ no ho ndzinoa ba a otwar de enye no dzi. Bɛ yi hyɛ hɛn nkuran de nyia wɔnye hyɛ edwuma pa ase no noara so na wɔnye no wie.

Nnye da a wofua ɔdo noara na wosi no mpam.

Bayerdua yɛ edwuma a wommfitsi prɛkoper yɛ. Ɔwɔ nhyehyɛɛ a ɔkɔ do ansaana edu mbre wotu. Sɛ wodua ɔdze wɔ Akanman mu a, wosi no mpam de mbre ɔbeyɛ a bayer no n'ahoma no botum abebar akɔsor de mbre ɔbeyɛ a okuanyi no botum adɔw ho. Eso nnye da ara a okuanyi no fuua bayer no ara na osi dem mpam yi. Mpo sɛ ansaana wobodua bayer no, wotwitwa bayer ne tsir no gu ewia mu ma n'enyim wo. Siantsir nye de sɛ okuanyi no annyɛ

no dem na ɔdze hye ɔdomona mu a mbowa bedzi. Okuanyi no nya abotar ye iyi nyinara ansaana woefua. Okuanyi no nya abotar tweɔm ma bayer no fifir ansaana ɔahye ase esisi no mpam. Dza be yi da no edzi nye de nyimpa ne bra mu no onnyi de ɔye ne ndzembra nhyehyedo nhyehyedo osiande adze biara na ne mber a wɔdze ye.

*Mpanyimfo se, Gyedzi a Ananse nyae dze dua bankye no,
nnye dem gyedzi no na Kweku Tsen dze tui.*

Be yi dze mbowa ebien a wɔmmpa Mfantsefo anansesem mu dzi dwuma; Ananse na ne ba Kweku Tsen. Mfantsefo anansesem mu no mpen pii na se Kweku Ananse si gyinae biara a ne ba Kweku Tsen tsia mu ma Ananse n'egyinasi no see. Iyi na Mfantsefo hwe ho dze bu dem be yi. Adwen a Ananse nyae dze dua bankye no, nnye dem adwen no ara na Kweku Tsen a ɔye Ananse ne ba dze tui. Okuanyi bi a nna ɔka me nsenyianofo no ho no kaa de adwen a nyimpa nya dze ye adze no nnye dem adwen no ara na obi a obedzi nyimpa kor no adze no benya. Be yi kyere hen de adze biara se owura no ara ye ho edwuma a ɔye no yie. Mbom se obi hye ase na obi fofor bowie a ɔye a nna adwen a ɔdze hyee ase no nyimpa a ɔrosɔw do no ammfa dem adwen no ara ennwie edwuma no.

Mpanyimfo se, biribi ntsi na okuanyi dua kookoo a, ɔmmbɔ mbɔfor wɔ ase.

Mpen pii na ekuafɔ nkanka kookoo ekuafɔ dua adze a ɔye a wɔdze nduadzewa bi tse de muoko, ntorɔba, nturopo, eduwa na adze fa ase. Hɔn a wodua kookoo no ka de wɔdze retsetse kookoo no. Iyi ntsi se obi hu de okuanyi bi edua kookoo na ɔammfa dem eduadzewa yi a wɔdze tsetse kookoo yi bi ammfa kookoo no ase a, nna kyere de okuanyi no wɔ adwempɔw a ɔdze reye dem. Okuanyi a ɔpe de n'enyi ku no kookoo ho nkotsee na

obotum aye dem, mekyere de obodua kookoo na oremmfa eduadzewa biara nntsetse no. Dza be yi rekyere hen nye de se nyimpa reye adze na biribi botum atsetsee no a, adze no no ho hia den mpo a otwar de oyi adze a obetsetsee no wo no dwumadzi no ne yieye mu no akwa ama oetum edu no botae ho ntsem.

Eburow no nduae runntum nku boredzewa.

Me nsenyianofo no kor kaa kyere me de, nduadzewa a wodua hon wo asaase kor do no per asaase no mu seradze, gyanabew na ewia ho na aboa hon ma woenyin aye pramprom. Iyi ntsi se ekuafu rudua eduadzewa a wohwe iyi nyinara ansaana woedua. Dem be yi mu no nna okuanyi no n'enyi tsim boredze no do, mbom eburow so fifiir wo asaase no do. Oba no dem a nna tere eburow no nye boredze no reber asaase no mu seradze no ho. Mbom boredze tum twe asaase mu edziban kyen eburow ntsi nnye adze a eburow no beye yie. Dza be yi rekyere hen nye de, se yeye biribiara a otwar de yehwe adze no mbre otse na yeye no ne mber mu amma ohaw a adze no tum fa mu no anhye adzekor no do.

Mpanyimfo se, okuanyi dua aba wo nokwar mu amma onhwer akatua pa.

Ekuadwuma mu edwuma kor a ohia wo mu papaapa nye aba no nduae. Okuanyi biara pra ne yamu dua aba yie ama aba a oduae no ho aba mfaso. Se okuanyi ne nsa annko n'edwumaye ho yie a, n'edwuma a oaye nyinara no otum hwer.

Okuanyi biara a opra ne yamu dow ne haban ho, ye mu edwuma biara a ose wo mu na otan no ndobaa so yie no nya ho ndzinoa biara a ofata. Dem ekuafu anaa okuanyi a opra ne yamu ye n'edwuma no suban yi da edzi wo Mfantsefo hon daa daa abrabo mu. Se nyimpa pra ne

yamu dzi dwuma biara na odzi no yie a, onya ho ndzinoa biara a ɔpe de onya wɔ ho no. Nyimpa a ɔdze akwadwer ye n'edwuma no so hwea mu wɔ bra mu. Iyi kyere de dza nyimpa beye biara no onya ho nsunsuando.

4.1.4 Mbebusɛm a ɔfa ekuadwuma mu otwaber ho

Ekuadze no ntwae anaa otwaber mu ndɔbaa papa nye dza okuanyi biara reye kua a ɔdze n'enyi tsim do. Odu dem ber yi a na okuanyi twa anaa bu no ndɔbaa na ɔdze ba fie ma wodzi anaa wɔtɔn. Onam Mfantsefo adwenmusɛm a wɔwɔ no wɔ ekuadze no ntwae ho ntsi wotum nya nkasafua ngyinahɔma bi a wɔdze afa be kwan do. Mekyere de wɔdze be no gyina ekuadze no ntwae no do mbom ne ntseasee no bor dem koraa. Dem adwenmusɛm a wɔayɛ no be a ɔfa ekuadze anaa ekuaye mu otwaber ho no na mapensapensamu wɔ ase ha yi;



*Mpanyimfo se, obi a odua haban mu eduadzewa no, ɔnoara
so na eduadzewa no sow a otwa.*

Dza be yi a ɔwɔ sor hɔ yi da no edzi nye de, okuanyi a ɔbere dua anaa gu n'aba no noara so na se ber so de otwa aba no a, otwa n'adze. Nnye obi a ne nan annka ne tsir annka na obotwa aba no. Wotum dze be yi bɔ hɔn a se okuanyi no ndɔbaa ye yie a wowia bi no kɔkɔ dze bɔ hɔn ndɔbaa no ho ban. Hen daa daa abrabɔ mu no, obi a ɔhwew n'enyi ho mfifir na ɔbere biribi ho no, noara so na se ndzinoa bi ba adze kor no ho a otwar de odzi ma ne kra enyi gye. Me nsenyianofo no mu kor kaa de se okuanyi biara dua adze wie na se obi fi ekyir befa a ɔye no yaw. Iyi ntsi se wowie hɔn edwuma na se woridzi ho aba a hɔn enyi gye. Dem be yi tu hen fo de onnyi de yeye akwadwer wɔ hen edwuma ho osiande nyimpa a ɔbere no na odzi.

Sekan a wɔdze twa boreɔdze no, noara so na wɔdze twa eburow.

Be a ɔwɔ sor hɔ yi da hia a ohia de nyimpa sɔn adze edzi. Sekan anaa dadze ye edwumayɔdze a ekuafɔ dze twa ndɔbaa dodowara. Wotum dze tu bankye, dze twa eburow, boreɔdze, ahwer na adze. Wotwa boreɔdze wɔ sor demara so na wotwa eburow so wɔ sor. Wotum dze dadze twa dem edziban ebien yi nyinara. Boreɔdze na eburow no gyina hɔ ma adze ebien a otwar de nyimpa dzi ho dwuma, ber a dadze no gyina hɔ ma kwan kor per a nyimpa no botum dze edzi dem edwuma no.


Okuanyi a ɔdze dadze twa eburow no botum so dze dem dadze no ara etwa boreɔdze so. Abrabɔ mu no, be yi kyere de yebotum egyina kwan kor do edzi dwuma ebien ma aboa hen ma henho aye har.

Wɔnam dodow dua a, wɔnam dodow bu.

Dem be yi kyere korye a Mfantse ekuafɔ dze boa dzi hɔn dwuma. Be no n'abɔse ntseasee no kyere hen de nyimpa dodow a wodua aba no dem nyimpa dodow noara na wɔdze hɔn bu. Ntseasee mapa mu no, se nyimpa a enye hɔn duae no wɔ hɔ a, hɔnara na ɔse wo de enye hɔn bu. Wɔdze ber a wodua aba no gyina hɔ ma bere na ber a wɔdze bu no gyina hɔ ma enyigye. Dza be yi dze rekyere hen nye de nyimpa a yenye hɔn bere biribi ho no dem nyimpa noara na otwar de se adze no ye yie a yenye hɔn kye ho enyigye no. Se nyimpa boa wo ma eye biribi a onnyi de iyi no ma wɔ ber a adze no aye yie, otwar de yegyina dem ber no do kaa nyimpa no hɔn mboa na yema hɔn so enyigye. Iyi boa ma korye na nkabɔmu ba hen atsenae mu aber biara.

Mpanyimfo se, awar nntse de haban mu nkatse na abo ahwe ansaana etu.

Mpen pii no se ekuafɔ a wodua nkatse rokotu hɔn nkatse a, wodzi kan tu kor bɔ hwe de enyin a ansaana woetu. Dem be yi twa mfonyin bi a ofa obi a onye obaa da ansaana awar no kyere hen. Yegyina nkatse no ntui na awar do a, nkatse no ntui no dze okuanyi no dzi kan tu bi bɔ hwe, mbom awar dze ewar nyimpa no wie ansaana se enye no beye biribi a enye no aye anaa se suban bi wo nyimpa no ho a esuma no mu tse de mbre nkatse esuma asaase mu no a, oada suban no edzi akyere wo. Iyi ntsi be yi kyere hen de obaa a wonye no da ansaana wawar no nnye ntsi yentwe henho mmfi ho. Wodze iyi tu hɔn mba fo de awar nnye adze a wokowura mu san ekyir. Ansaana obi dze ne tsir bokɔ ekowura mu no otwar de nye ahweyeie ansaana oako. Iyi seso ntsi na wodze nkatse no mbre toto awar ho; nkatse dze se onnye mpo a botum ehu na awar dze onntse dem gyede ako mu ansaana ehu nyimpa no mbre no suban tse.



Sa w'asew kyer haban mu kusi bekye wo a, wo so tu haban mu mbire kekye no osiande hɔn nyinara ye siw do adze.

Be yi da hia a ohia de nyimpa kyere enyiso wo dza obi aye ama no ho. Mpen pii no nye a kusi da siw do, demara so na mbire so fifir wo siw do. Iyi kyere hen de dem ndzamba ebien yi dzi nse wo biribi mu. Ono nye de hɔn nyinara fi siw mu anaa da siw mu. Se okuanyi dze mbire kekye n'asew osiande oakyere no kusi a nna okyere de oammfa adze a odze kyere no no ara sanee koree, mbom odze dza onye no wo twaka kekyere n'enyiso wo aye a odze aye no no. Abrabo mu no, oda edzi de nyia oaye hen papa no otwar de yedze papa tua no kaw, se papa a yedze botua kaw no enndu nedze no mpo a biribi a oso enyi biara ye. Owɔ mu de nnye adze a ibotum dze mbire atoto kusi ho, mbom wotum dze hɔn nyinara gu nkwan mu

ma ɔsesa nkwan no ne dɛw. Mfantse ekuaye mu be yi wɔdze tsetse hɔn mba de wonsua mbre wosi kyere enyiso wɔ dza obi beye ama hɔn biara mu. Be yi nkɔ mma hɔn mba nko, wɔdze tu obiara fo de se obi ye biribi ma wo a, se ɔso anaa osuar no, otwar de ema nyimpa no hu de dza nyimpa no yee no w'enyi so. Iyi ma ɔkyena bi se ihia mboa a nyimpa no botum ama wo dza ɔsen ahyese dze no mpo.

Abowa no wɔfre no ɔmmboa ekuaye ɔnam nkatse a ɔmma onnyin ma wonntu ho asoɔdzen ntsi na wɔfre no amoakuwa.

Iyi ye ekuaye ho be a ɔkyere mbre amoakuwa nyaa ne dzin. Amoakuwa ye abowa bi a yehu no de n'asowa ye dzen osian dwuma a ɔdze dzi ekuafɔ ntsi; onngyaa nkatse mma onnyin koraa na oetutu awe. Dem suban a ɔwɔ amoakuwa ho yi muo na ɔmma ekuafɔ enyi nngye no ho. Osian dem suban a ɔwɔ ntsi wɔfre no 'ammboa kua'. Ne dzin yi ara mpo ka no ho nsem nyinara. ɔmmboa mma ekuaye nnkɔ do. Dem suban a amoakuwa da no edzi yi gyina hɔ ma nyimpa bɔn a wɔwɔ ɔman mu. Dem nyimpa bɔn yi abrabɔ mma hɔn mfefo nyimpa enyi nngye hɔnho. Be yi kyere de egye suban bɔn tar w'enyiwa ase a ogya wo dzin bɔn wɔ kurow anaa ɔman mu.

Wodua no dem naaso wommbu no dem.

Mfantsefo be biara da hɔn adwenmusem a ɔfa hɔn abrabɔ mu edzi. Be a ɔwɔ sor hɔ yi da no edzi de okuanyi a ɔper aye n'edwuma no, noara na otwar de odzi ho ndzinoa no so. ɔba no dem a nna ntserɛ okuanyi no enya bere a ɔberɛ no ho mfaso. Bio, obiara so a ogyaa okuanyi no ma oduae no so ɔye a okuanyi no nngya no ekyir. Ofi ne pe mu ma hɔn nyinara bi. Se obi a oenngya no wɔ aba no ngui mu no ka de okuanyi no mma no ndzinoa no bi a, okuanyi no tum bu nyimpa a obisaa adze no dem be yi. ɔdze kyere de se worudua adze a

ɔno wonnya obi mma onngya hɔn, mbom sɛ no ho ndzinoa no ba dze a, ɔno obiara pɛ de onya bi. Abrabɔ mu no dza dem be yi reda no edzi nye dɛ onnyi dɛ nkorɔfo anaa nyimpa dze n'enyi to dzaa onndzii ho dwuma do. Ɔsan tu hen fo dɛ yenntwe henho mmfi akwadwer ho.

Dem be yi san kyere dɛ eduadzewa no beberee wɔ hɔ a no ndua na no ntwae no nnye pɛr. Eduadzwa no bi wɔ hɔ a wodua no wɔ famu eso sɛ odu otwa ber no a wotwa no wɔ sor. ɔba no abrabɔ mu a, ɔda edzi dɛ biribi n'ahyese tse no nnye dem na n'ewiei no tse. Ekuafɔ no dze ber a wɔdze dua aba no gyina hɔ ma bere a ɔwɔ dwumadzi bi mu na adze no mbui no so gyina hɔ ma enyigye a ɔwɔ edwumadzen ekyir.

*Abofra dɛ ɔbɛtsetsew muoko a wongyaa no, na ɔka n'enyi a,
noara bohu kwan efi ho.*

Muoko y[eduadzewa a ekuafɔ taa dua no w] h]n kwa mu. S[muoko nyin ma]ber a, osian ne hyew ntsi w]mma mbofra kwan mma w]nntsetsew bi. Osian ne hyew no ntsi s[abofra dzi ho agor a]b[ka n'enyiwa. Abofra y[seanntse na wotu no fo w] ho na oenntsie a, wongyaa no ma muoko no hye no anaa]ka n'enyi ama]dze ay[esuadze.

Nyimpa dodowara na wɔwɔ hen nkurow ahorow mu a wokyr afotu. Sɛ itu hɔn fo wɔ suban bɔn bi ho a, ɔye dɛ mbre ɔfotufɔ no rekasa kyere dua; wonntsie dza ɔka kyere hen no. Binom mpo bu afotufɔ no nkwiseafo. Nyimpa a wɔtse dem no, be yi kyere dɛ wongyaa hɔn ma wɔnnye, dɛ mbre muoko ka nyimpa n'enyi a ɔhyehye nyia muoko no aka n'enyi

no, demara na se hon suban no ho asotwe so ba a hon a woyee no so bosow dem asotwe no. Se oba no dem a wosua nyansa anaa wonya nyimdzee wo mu mpo kyen de obi bekyer hon atsena ho etu hon fo.

W'enyi tua wo hanoa a, ennse de ibobu san ma.

Nyimpa a n'enyi tua ne hanoa nye be a otɔ do enum no n'abɔse ntseasee ber a nyimpa a owɔ biribi anaa adze kumaa no ye ne ntseasee mapa. Okuanyi biara a ogyina no kwa ne tsir a ohu ne hanoa no da edzi de kwa a okuanyi no yee no suar. Oba no dem a na oda edzi de okuanyi no nnye adze a no ndɔbaa so beye kese. Edze be yi toto hen daa daa abrabɔ ho a, be yi kyere de se obi gu aba kumaa bi anaa odze sika kumaa bi hye edwuma mu a nnye adze a nyimpa no benya ndzinoa kese wo edwuma no ho. Iyi nye nhyira a Nyame dze hyira hen no mmbɔ ebira, mbom osi do dua de se epa ndzinoa pii anaa ndɔbaa pii a otwar de ehye wo sapɔw mu nsu na ikum wo tsir mu ye ewumadzen. Okuanyi a no kwa kakrabaa na otwaber du a odze ndɔbaa a obor no kwa ne kese do ba fie no Mfantsefo bu no de oye ewi. Dem be yi ara so hye hen tsipia de yenyer henho nnye edwumadzen na mfaso papa bi wo edwumadzen mu.

Awar tse de haban mu eduadzewa wɔnnsow pepɛɛper ansaana ɔatsetsew.

Se nde yi ara mpo idua aba a nnye adze a ne nyinara botum ayeyie da kor. Biara nya abotar sow wo ne ber pa mu. Oba no dem a ekuafɔ no dzi kan twa dza aber anaa enyin no na se ekyir yi dza okaa ekyir no so nyin anaa ober a, woetwa no so. Nde a bi aber a okyena na bi so be ber. Eduadzewa no biara wo ber potsee a odze ber.

Be yi kyere hen de nnye adze a nyimpa nyinara yiedzi ba da kor mu; nde obi dze ba a, akyena so beye obi nedze. Binom hon yiedzi ba anapa, binom so dze ba ewiaber na binom so dze aba ewimbir. Iyi ntsi se wo ber nnsoe a, otwarde inya abotar dze tweon Oboadze ne ber pa.

Kotokorba a aketseew aberee ato famu no se woridzi a womma no ebun.

Eduaba biara ber a na wodzi. Iyi ntsi ansaana obi bedzi eduaba bi no nna eduaba no aber aye ma wodzi ansaana. Mpen pii no, aye a osiande edaudzewa no ndua no bi wowaree ntsi gyede wofow anaa wodze kotokorba tsew. Kotokorba no boa ma yetum tsew eduaba a aber na awo sor ma ntsi yennkotum atew.

Se kotokorba ketsew aduadzewa a aber fi dua no sor to famu na woridzi a, onnyi de woma ono a aketseew aberee no ebun. Iyi ye adze a osi wo nyimpa abrabo mu. Binom wo ho a, se obi ye papa ma hon a dza wotum dze tua nyimpa no kaw ma aye yie ara nye bon. Be yi rekyere hen de onnyi de se obi boa hen ma se yeye yie a, yetow dem nyimpa a woboa hen no kyen anaa yeyi hon ma. Otwar de yebon hon abaw do anaa yema hon abawdobodze a ofata. Be yi tu hen fo de obiara a aye papa no papa ara na otwar de yedze tua no kaw.

Mpanyimfo se, haban mu eburow ennyin ma woenntwa no nna ofi abowa akrantse.

Okuanyi dua eburow a, n'enyidoadzehu nye de eburow no bosow ma oetwa aton anaa oeebu ahye ne san ma. Mbom otofabi a de ekuafonnyidoadzehu yi mmba mu osian nkrantse hon suban bi ntsi. Nkrantse tum tu okuanyi a onnye da ndow n'eburow kwa ho no

n'eburow do sa we eburow no ne kɛse. Bi so wɔ hɔ a, okuanyi no adɔw eburow no ho so nkrantse no bɔkɔ kwan no mu akɔwe. Iyi da nkrantse hɔn su bi a wɔdze haw ekuafɔ edzi.

Bɛ yi da krantse edzi dɛ ɔno ntsi na okuanyi n'eburow nnyɛ yie anaa twa eburow a annso dɛ nkyɛ okuanyi no rohwehwɛ. Iyi ne siantsir ara nye dɛ nkrantse taa twa eburow a ɔnnhyɛɛ da nnyiin papa anaa afor no a onnguanee no.

Yegyina hen nyimdzee a yɛwɔ no wɔ krantse no dwumadzi ho no do a, yetse nyimpa ne tamfo ne ndzeyɛɛ bi ase. Atamfo per dɛ aber nyinara wɔbema hɔn a wɔtan hɔn no ahwe ase ama worunntum nndzi yie wɔ ɔbra sar yi do.

Mpanyimfo se, okuafo nduadzewa ntui tse dɛ ɔwemfo a ɔwen nkuku na nkaka mbrɛ obesi biara bi bɛsɛe anaa bɔbɔ.

Bɛ a ɔwɔ sor hɔ yi dze ɔwemfo a ɔdze awendɛtse dzi dwuma na okuanyi a orutwa n'ekuaдзе toto ho. Dza bɛ yi ka wɔ hen daa daa abrabɔ mu nye dɛ, nyimpa ne bra dze ɔyɛ no denara a pɔw bɛba ne beebi. Nnyɛ adze a no nyinara bɔkɔ tɔɔtsenn da. Akwambew ahyɛ ɔbra mu ma, dza ebeyɛ biara no akwambew tum bew wo wɔ mu. Dza bɛ yi dze ma hen nye dɛ nkukuhwease na yiedzi nyinara bɔ mu ma ɔbra yɛ enyika, iyi ntsi sɛ ber a no mu yɛ dzen ba a, onnyi dɛ yema no ho yaw ka hen hye. Otwar dɛ yema hen tsir do wɔ mber a no mu yɛ dzen mu osiandɛ mbrɛ ɔtse biara mber papa bɛba. Hen daa daa abrabɔ mu no bɛ yi kyere hen dɛ nnyɛ adze a yebotum enya adze nyina ama henho.

Mpanyimfo se, ahoɔdzen a okuanyi nya dze tu n'ekuaдзе no, ɔnnɛ ɔno na ohia dze dɔw.

Ekuadwuma mu wɔ mber ahorow pii na biara na kwan a wɔfa do dzi ho dwuma. Mber no bi mu dwumadzi nnda famu, demara so na bi wɔ ho a no mudwumadzi no gye ahoɔden ansaana okuanyi no etum edzi dem dwuma no. Kwan no ndɔwee, ne ntsiae, kwan no ne nhyewee, ne mpamee, aba no ngui anaa no nduae, eduadzewa no no dɔwho na dza ɔkeka ho nyinara na kwan a wɔfa do dze ye no na ahoɔden a okuanyi no hi adze edzi ho dwumano so ye soronko fi biara ho.

Okuanyi botum egyina ne nan do atsetsew muoko, ntorɔba, eduwa, na adze anaa etu bankye, bayer anaa ebu eburow na dza ɔkeka ho a dem dwumadzi yi nnhye da nnhia ahoɔden kese biara. Adɔw dze ɔye edwumadzen a ohia ahoɔden. Be yi a Mfantsefo nam hon adwenmusem a wɔwɔ no wɔ ekuaye ho dze to gua yi kyere de ɔhaw biara na kwan a wɔnam do sɔw ano. Nhwɛdo bi tse de kwan a wɔfa do tu panyin fo no nnye dem kwan no ara na wɔfa do tu abofra so fo.

Mpanyimfo se, haban mu edziban a oetwa edzi ewie no, wɔnnsan nnyi nnsie.

Okuanyi no dwumadzi mu no se otwa no ndɔbaa ba fie na se ɔdze hye san do a, ekyir yi ɔsan tu ndɔbaa a ɔdze ahye san do no na ɔton anaa odzi. Ndɔbaa a okuanyi no aton anaa edzi no, nnye adze a ɔbesan enya no bio dze ahye ne san do. Baifikurow okuanyi bi a nna ɔka me nsenyianofo no ho kaa kyere me de, okuanyi biara nyim de se okuanyi nya ton no ndɔbaa a, nnye adze a ɔbesan enya no bio. Dza dem ber no wonyim de wonenya wɔ mu ara nye sika. Iyi ntsi se okuanyi nya ton anaa dzi no ndɔbaa a onyim de dem ndɔbaa no nnye adze a ne nsa besan aka bio. Ngyinahoma a ɔwɔ dem be yi mu nye de se adze bi dzi wɔ wo

na se esee no anaa ema ofi wo nsa a nnye adze a ebesan enya dem adze noara bio anaa ebesan aka de dem adze no ye wodze. Nhwedo bi tse de obi a oye nkokɔ na ber biara a no nkokɔ no botow no odzi, nnye adze a obenya nkokɔ mba ma hon so enyin ma no nkokɔ no adɔr.

Okuanyi enu abe kentsen kor asoa no, n'enyi mber daadze nkokor.

Okuanyi dua aba na oye ho edwuma a ofata wie a, n'apedze nye de otwaber so a obotwa aba a oso enyi. Se okuanyi n'adaaso ba mu ma otwa ndobaa a ofata a, n'enyi gye papaapa, mbom se ammba no dem na no ndobaa no ammba papa a no were how. Otum mpo ma binom pa abaw wo ekuadwuma mu. Se okuanyi no ndobaa no so enyi a mpen pii no wogyaa mpepew wo kwa no mu ma mbowa so ba kwa no mu a weenya bi edzi anaa nyimpa abobfo a wonnyi asaase a woye do edwuma so ba kwa no mu a, weenya bi dze ako fie.

Be yi kyere hen de okuanyi a oenu abe kentsen kor no n'enyi mber nkorkor a odeda famu no. Se dem kuanyi yi yi abe nkorkor no a odeda famu no so ka dza oso no ho a, nna tserɛ n'enyi ber adze. Hen daa daa abrabo mu no, hon a wowo biribi anaa biribi wo hon nsamu no enyi mber ndzɛmba nketsenketse bi. Mbom, iyi nnkyere de esikafo binom enyi mber ndzɛmba nketsenketse bi.

Obaa a, onndzi afe wo awar ase no otu bankye a onnhye mu.

Bankye ye edziban a Mfantse ekuafɔ taa hye. Dza woye nye de, se ekuafɔ tu bankye no a, wohye bi hye anan mu. Se okuanyi annye iyi a nna tserɛ oegyaa asaase no do bankye hye ntsi nnye adze a se bankyetu ba afe a oda hon enyim no a obotum etu bankye wo n'ananmu ho. Be yi kyere hen de obaa a orinndzi afe wo awar ase no tu bakye a onnhye mu mpo na

efifir ma oetutu. Obaa a otse dem no gye dzi de nnye adze a bankye no beye yie no na owɔ awar no ase ntsi nnye adze a obenya ho mfaso.

Bankye a obaa no tu wie a onnye mu no kyere etsiodzen. Ngyinahoma mu no be yi gyina ho ma nyimpa a owɔ adwen bon anaa ne tsirmu ye dzen. Mfantse ekuafɔ gyina dem be yi da adwensu na ndzeyee bi a etsiodzemfo da no edzi wo hen atsenae mu.

4.1.5 Mbɛbusɛm a Mfantsefo dze dzi dwuma a ɔfa ekuadze no ntɔnee ho

Ekuadze anaa ndɔbaa no ntɔnee nye ekuadwuma mu dwumadzi a otwa tun. Iyi ntsi Mfantsefo bo ndzɛmba bi enyikam wo mu na wɔdze ye be dze forafɔra hon kasa mu ma ɔye daw. Ha na ekuafɔ dze hon ekuadze ko guamu koton nya sika. Ekuadze no bi wo ho so a wɔton no wo haban mu. Ekuafɔ no binom wo ho a wotwaa ekuadze no ara na wɔaton, binom so dze ekuadze no sie kakra ma bo ba mu ansaana wɔaton. Mbɛbusɛm a ɔfa eduadzewa no ntɔnee mu a Mfantsefo dze dzi dwuma no da hon adwenmusɛm a ɔfa ɔbra ho edzi. Ma yenhwe dem mbɛbusɛm yi bi;

Edziban no ntɔnee bu wo okuafɔ noara ne nsamu.

Okuanyi no dwuma a odzi no ne ngyinado nye de obotum aboa ma edziban aban kurom ma obiara enya bi edzi. Se okuanyi n'edwuma no ye yie ma edziban pue gua do anaa ba kurom a, nna n'ahom aka no ho osiande n'enyidoadzehu aba mu. Otɔafabi a, okuanyi n'enyidoadzehu yi tum ba mu araa ma oko tsia noara so.

Se edziban bobu do wɔ guaman do a, nna tsere okuanyi n'edwumadzen na ama aba no dem. Se ekuafɔ yer hɔnho ye edwuma yie a, ɔma edziban anaa dem ndɔbaa no bu wɔ guamu ber a otwaber aba. Iyi nye dem be yi ne ngyina do anaa n'abɔse ntseasee. Mbom se eba hen daa daa abrabɔ mu a, abofra bi ne bra mu annye dzen amma no a nna ofi n'awofo hɔn edwumadzen a wɔreye anaa wɔyee. Be yi kyere hen de obiara a ɔnam kwan bi do ma hen bra aye mberew ama hen no otwar de yekyere enyiso ma dem nyimpa no.

ɔbaa tɔn ntorɔba, na ɔnntɔn etudur.

Mfantsefo mu no nnye adze a mbasiafo dze etudur dzi dwuma. Iyi seso ntsi no ntɔnee so wɔnntaa nnhu mbasiafo de wɔtɔn. Se bohu de obi rotɔn etudur a nna nyimpa kor no ye banyin. Okuanyi bi a ofi Enyan Apaa daa no edzi kyere me de Mbasiafo dze nkan no nna se wɔbɔtɔn adze a nna ɔye adze a ɔfa edziban ho.

Mbebussem a ɔfa Mfantse ekuaye da ho ara da hɔn adwenmusem a wɔwɔ no wɔ wiadze ho edzi. Be yi da edwumaye mu nkyekyemu edzi. Be yi kyerekyere ɔbaa a ɔtɔn ntorɔba na ɔnntɔn etudur mu. Etudur na ntorɔba nnyi twaka biara ntsi otwar de wɔtɔn biara nko. Abrabɔ mu no, obiara wɔ dza otum ye anaa n'ahɔɔdzen botum aye. Obiara nnyi hɔ a obotum aye edwuma nyinara. Ndzemba bi wɔ hɔ a wɔdze ma nyimpa pɔtsee bi osiande hɔn na wotum ye no yie de hɔn edwuma.

ɔbaa tɔn mouko na oennya mfaso a, ne mfaso nye ɔwaabɔ.

Muoko ye ekuadze a Mfantsefo ekuafɔ dua. Onam muoko ne hyew ntsi sɛ ɔdɔ wo mu a na egya wo ɔwaabɔ. Obotum ama abɔ waw mber tsentsen a muoko ne hyew no ntsi ɔma ɔye yaw kyen waw papa.

Bɛ yi kyere dɛ, ɔbaa ennya mfaso wɔ muokotɔn mu a nna nnye ɔwaabɔ. Ngyinahɔma mu no, ɔbaa a ɔwɔ bɛ yi mu no gyina hɔ ma nyimpa a wɔma nyimpa binom kɔ yaw bi mu anaa wɔye nyimpa bi bɔn. ɔwaabɔ a muokotɔnni no bɔ no gyina hɔ ma ne ndzeyɛbɔn no nsunsuando. Ndzeyɛ bɔn mu nnyi mfaso, gyedɛ enyinguase a ɔnnye dɛ mbre ɔwaabɔ a muokotɔnni no nya no tse ara.

Dhe do eburow ye fɛw naaso ɔnnso tɔ.

ɔhye anaa ɔhe ye beebi a wɔ asaase do a yɛdze kyere mbre obi n'asaase n'ano ka. Wotum dze ndzɛmba ahɔrow ye ahyɛnsɛwdze kyere dɛm ɔhe yi. Dza yetum dze kyere asaase do ɔhe no bi nye nyamedua, ntɔmbɛ, yesubɔgya na dza ɔkeka ho. Osian manso ntsi, sɛ nkorɔfo ye kwa a wɔhyɛ da ara dua adze bi dze hye ɔhe no nsew wɔ beebi a ɔhe no nnhyɛ da nnda edzi papa no.

Bɛ ɔwɔ sor hɔ yi da ndzɛmba papa a ɔwɔ guamu edzi dɛ ɔye bɛ no ne ntseasee mapa. Mfantsefo nkurow mu no, ɔtɔfabi a, ekuafɔ dua eburow wɔ hɔn kwa ahye do dze ye ɔhe. Dɛm eburow a wodua no wɔ ɔhe do yi taa nyin yie na ɔye fɛw so, mbom ɔye a ɔnntaa ndɔɔ so dɛ atɔfo benya no dodow atɔ. Eburow a ɔwɔ abɔse ntseasee mu no gyina hɔ ma ndzɛmba a ɔwɔ gua do a ɔye fɛw/papa wɔ guamu, mpɛn pii no ɔye a wɔnntaa ndɔɔ so wɔ gua mu na

ɔyɛ dzen so dɛ benya bi atɔ. Ɖbra mu no, nyimpa a wɔyɛ papa na wɔwɔ adwen pa a wɔboa
ɔman no mpo nndɔ so.

Nkwankyɛn nkontomire ennya bo a, nna ofi ntefi.

Kontomire y[mankanyi no nk]n mu no a w]dze y[edziban no. S[okuanyi dua
mankanyi a, osiand[nny[n'edziban no nkotsee na]p[ntsi w]hw[d[wobedzi no
nkontomire no so nyiu ama s[w]dze k] gua a enya bo. S[mankanyi fifir w] kwanky[n
a, akwantsemfo mma onnya no ho koraa. Ma binom ritsiatsia do no nna ntafi a
worutu gu do dze dza]nny[agor. }ba no d[m a]mma kontomire no nny[ak]nd] ntsi
s[okuanyi no dze k] gua a onnya bo.

Kontomire a osi kwankyɛn no ntaa nnyɛ akɔndɔ osiandɛ nyimpa nam kwan ho a wɔtaa toto
ntefi gu do ntsi. Iyi yɛ adze a kontomire no nnkotum ayɛ ho hwee ma ayɛ yie. Ngyinahɔma
mu no, kontomire no gyina hɔ ma nyimpa a ohyia akwansiwdze bi a osiw ne kankɔ anaa
ne yieyɛ kwan wɔ kwan bi do. Sɛɛ yɛdze abaatan yɛ mfatoho a, abaatan binom ho nnyɛ
akɔndɔ osian hɔn mba hɔn ntsetsee ntsi. Nnyɛ dɛm a nkyɛ hɔn so hɔn ho botum ayɛ fɛw tse
dɛ mbre hɔn nsefo ho tse no. Iyi ntsi, biribiara a obesi no wɔ ne siantsir.

Dasedzi ntsi na okuanyi tɔn n'adze ma obi a, odzi ano.

Ekuafɔ nye hɔn a wɔtɔ hɔn ekuadze dzi ekuadze no ano kɛpem dɛ bo no bodu beebi a hɔn
nyinara bɛgye ato mu. Ɖba no dɛm a okuanyi no rennka dɛ nyia ɔtɔ ndɔbaa no esisi no,
demara so na nyia ɔtɔ ekuadze no so rennka dɛ okuanyi no esisi no. Hen daa daa abrabo
mu no, bɛ yi rekyerɛ hen dɛ yɛgye binom anaa afofor hɔn adwenkyerɛ to mu wɔ egyinasi

mu a aboa papaapa. Mfantsefo na hɔn adwenmusem a wɔwɔ no wɔ abra mu na ekuadze no ntɔnee mu da no edzi de onnyi de ber biara nyimpa ye n'adwen de dza ɔwɔ ne tsir mu biara ye papa, otwar de ɔpe nkorɔfo so adwenkyere ama aboa no ma oedu no botae ho a orinntsiaatsia obiara ne fahodzi do.

Okuanyi tɔn n'ekwadze foo a, ahɔho tɔ bi.

Nyimdzee a ɔda edzi wɔ dem be yi mu no wɔto no abaw a onnhya. Be no da okuanyi a ɔtɔn n'ekwadze foo anaa okuanyi a ɔmmfa do nnsɔa n'ekwadze edzi. Siantsir ahorow na ɔma ekuafɔ tsetsew hɔn ekuadze do anaa wɔtɔn hɔn ekuadze foo. Otum ba de bi a nna eduadzewa no roporɔw, ebu do, anaa se okuanyi no kɔ ohia neminemi mu a. Okuanyi a ɔko dem haw yi mu biara mu no tum tsew n'ekwadze do de mbre abeye a atɔfo bɔtɔ ama no. Otum so ba de, osiande ekuafɔ binom dwen ahɔho so ho ntsi, ɔye a wɔtsew hɔn ekuadze do de mbre abeye a ahɔho so botum atɔ bi osiande ahɔho nnkyer na ɔatɔ bitsi. Hɔho nnyim mbre wɔtɔn adze anaa adze bi no bo wɔ beebi ntsi se okuanyi no hu a otum hwe ho na ɔtsew n'ekwadze do ma ahɔho so tum tɔ bi. Ibe yi kyere hen de se obi ye adze a nkye onnyi de ɔye a, nna ɔwɔ adwempɔw a ɔdze reye dem adze no.


Mpanyimfo se, bankye wɔ hɔ yi, wɔnntɔn mmfɔra eburow.

Iyi so ye be a ɔrekyere hen de ɔsor kwan a wɔfa do dzi dwuma biara. Bankye na eburow nyina ye haban mu edziban anaa edziban a wɔfa no haban mu ba fie. Naaso dem nse a wodzi yi nnkyere de wɔmmfa hɔn mbɔ mu ntɔn. Bankye na eburow no gyina ma dwumadzi ahorow ebien a nyimpa twar de odzi ho dwuma. ɔwɔ mu dem nsem bi wɔ hɔ a wodzi nse wɔ ahyese no dze, mbom kwan a wɔfa de dzi ho dwuma no ye soronko koraa. Mfatoho bi tse de woridzi mbɔndarto ho asem wɔ ahemfie na panyin bi dze adzewia asem abɔbɔ mu.

Wotum gyina be a otse dem yi do tsen panyin no dze kyere no de kwan a wofa do ka mbondarto asem no ye soronko fi kwan a wofa do ka adzewia asem. Nnye adze a wodzi dem asem ebien yi fora ma oye yie.

Okuanyi ton adze ko beebi a obenya mfaso.

Mbea ahorow wo ho a okuanyi botum aton n'ekwadze; Mbom ekuafu to de wodze hon ekwadze ko beebi potsee bi koton hon ekwadze a wogye dzi de ho na wodze hon ekwadze no ko a wonya mfaso. Mfantsefo bu dem be yi dze kyere de onnyi de nyimpa tsena faakor ber a onnya mfaso biara mmfi dem bea no. Wodze kyere de se beebi angye wo a, beebi botum agye wo ntsi ho na otwar de eko. Anaa beebi a ho gye wo no na otwr de eko. Wodze da adwenmusem a owo Mfantsefo mu de se etse faakor a etse w'adze do no mu, ntsi otwar de nyimpa sesa ne ndzeyee mu kakra.



Okuanyi ton no ndobaa wo n'aber mu.

De mbre medzi kan ada no edzi dada no, ekuafu binom bu, tu, anaa twa hon ndobaa ara a nna wodze ekese guamu aton gye hon sika, binom so nya abotar dze ndobaa no sie ma bo kakra ba mu wo gua do ansaana waton. Ekuafu a waton hon ekwadze wo ber a wotwae no ara na hon a wotweon kakra ma bo ba mu ansaana waton no nyinara wo botae a onam do ma woye dem. Dem be yi so da Mfantsefo adwenmusem a owo wo obra mu kyere hen. Be yi kyere hen de nyimpa ne bra ne fa beebiara hia botae, se ridzi dwuma bi na ammfu botae biara ennsi w'enyi do a, nnye adze a ibotum edzi dem dwuma no ma aye yie.

Mbire bu no ntɔnee na ɔmmbu no nduae.

Sɛ mbire ba a, obu wɔ no ntɔnee mu, mbom no nduae dze ɔnnye edwuma a ɔda famu. Iyi kyere dɛ mbire no nduae dze nyimpa kumaa bi na wotum dua. Bɛ yi kyere hen dɛ hen daa daa abrabɔ mu no botum ehu obi a ndɛ yi oedzi yie wɔ ɔbra mu, nnye dɛ ofitsii ara na odzii yie, ne yieyɛ no gyina ndeda no mbɔdzembɔ do. Yiedzi fi ahofama, ahopakyir na edwumadzen mu ba. Bɛ yi kyere hen dɛ ohia dɛ nyimpa yɛ edwumadzen ama aaboa no ma ɔdze epira daakye.

Okuanyi a ɔnntɔn no ndɔbaa no, nna onyim dza oehu.

Okuanyi biara n'enyidoadzehu k[se nye d[n'eduadzewa b]sow yie. Ekuafɔ dodowara na s[h]n eduadzewa sow yie a w[t]n nya sika w] mu. }t]fabi a bohu no na okuanyi bi no nd]baa enyiyin ayey[ak[se ak[se so nna onntui anaa onntwae. Ansaana okuanyi bi b[y] d[m no nna onyim dza]rohwehw[w] eduadzewa no ho.

Sɛ okuanyi anntɔn no ndɔbaa anaa n'ekwadze wɔ ber bi mu a nna ɔreyɛ ahweyie. Iyi kyere dɛ okuanyi a ɔyɛ dɛm no nna oehu dɛ bo nto mu botum aba ɔkyena bi. Iyi ntsi wɔnntɔn hɔn ekwadze no, mbom wɔdze sie tweɔn dɛm bo ntomu no ama woenya mfaso pii. Dza bɛ yi da no edzi nye dɛ nyimpa a ɔyɛ ahweyie no dzi konyim wɔ dza ɔbeyɛ biara mu.

Okuanyi n'eduadzewa, ɔnoara na onyim no bo.

Eduadzewa beyɛ yie a nna osiandɛ okuanyi edua na ɔayɛ ho edwuma ma ayɛ yie ntsi a. Iyi ntsi okuanyi a odzii dɛm dwuma yi nyinara no na sɛ odu ber a wɔrema ekwadze no bo so a,

ɔdze bo to do. Mfantsefo daa daa abrabɔ mu no, dza be yi da no edzi nye de obi runntum nnhu dza ɔrehaw obi. Nyimpa a ɔrefa ɔhaw bi mu no na obotum akyerekyerɛ mu yie ma nkorɔfo atse no ase.

Haban mu owifo nntɔn ekuadze tse de owura.

Be yi Mfantsefo gyina adwenmusem a ɔda Mfantse ewifo a wowia ekuafɔ hɔn ekuadze hɔn suban edzi. Mbre okuanyi a noara fonaa kwa no ho no bɔtɔn ndɔbaa no nnye dem na owifo a okowiaa ndɔbaa no so bɔtɔn no osiande onnyim mbre no ho edwumaye ye yaw. Nokwar nye de, osiande onnyim mbre ekuadwuma si ye dzen ntsi ɔbɔtɔn ekuadze no fɔfofofo. Dza be yi kyere hen nye de adze a obi noara annhwew n'enyi ho mfifir annye no ɔye a hɔn a wɔdze hye hɔn nsa no nnhye da nnhwe do yie. Iyi ntsi na nkorɔfo beberee se wɔdze egyapadze hye hɔn nsa de wɔnhwe do a ɔnnkyer biara na egyapadze no aseɛ no.

Okuanyi a ɔtɔn eduadzewa a wodzi no, ɔnoara so na ɔbɔ ho ban.

Bamb] y[adze a no ho hia w]]bra sar yi do. Ekuafɔ dua h]n nd]baa ma onyin a, w]b] ho ban fi ewifo na mbowa a w]s[[eduadzewa no nsa. S[okuanyi ammb] no nduadzewa ho ban a. otum hwer mfaso a nky[otwar d[onya. Iyi ntsi s[okuanyi n'eduadzewa benya bo w] gua do a, nna bamb] a]dze maa nduadzewa no so dzi mu ad]ntsen.

Be yi da bambɔ a okuanyi dze bɔ n'ekuadze ho ban bi tse de adɔw, mbowa a wɔsɛɛ eduadzewa hɔn nkumii na mpo ewifo a wowia ndɔbaa no a okuanyi no bɔ ekuadze no ho ban fi hɔn ho. Dza be yi rekyere hen nye de dza ɔma wo nsa kɔ w'ano no otwar de ebɔ ho

ban amma emmfi wo nsa. Siantisir nye de dza oma wo nsa ko w'ano no noara so na oma inya ahoodzen dzebɔ wo bra. Se dem adze no fi ho a nna tserɛ w'ano edziban abɔ wo.

*Ɔwam Kasa Bireku Ata, ɔse ɔpe obi ma ɔakɛse Anɔkyewa
Ɔmfo de ongyaa haban mu ɔtandur ho awaawaa ntɔnee na
ɔnoara mpo a ɔmeen ɔtandur n'aba kɔtoo ne yamu mpo
kokoram ato ne tsir mu.*


Ɔtandur y[dua a]y[dzen ma ntsi]y[a ekuafɔ a wofua bayer taa dze si h]n bayer mpam. W]dze d[m dua yi si mpam a]nnk[r koraa na agye anaa afef[w. Iyi ma]ky[r ansaana ebu ntsi obotum agye bayer no abamba araa ekodu no ntuiber mu ansaana s[dua no bowu a ewu. Ekuafɔ binom so a wonyim d[w]dze]tandur y[edur no fufuaw]tandur no a ekuafɔ noara bi dze esi mpam no dze y[edur. }ba no d[m a osiand[no ho no a]b]boa ma afef[w no nnyi h] no ntsi]nnky[r koraa na dua no ebu. D[m suban yi tum haw okuanyi no ne bayer no ne nyinii na no nt]nee nyinara osiand[s[bayer no ennyin yie a nny[adze a]b]b] ak[se so ma enya bo w] gua do.

Dem be yi nye Yadav mbebusɛm a ɔdze dzii dwuma a Singh na Dorjey (2004) dze to gua no. Anɔkyewaa Ɔmfo ye nunsinyi a ɔwaawaa ɔtandur no ho tɔn ma nkorɔfo ma wɔdze sa kokoram yarba. Naaso, Ɔwam Kasa Bireku Ata a ɔmeen ɔtandur n'aba too ne yamu mpo kokoram no a ɔtandur no sa no bi atow n'apampamu. Ɔwam Kasa Bireku to Anɔkyewaa Ɔmfo nkra fa suahu a oenya efi ɔtandur no ho. Dza be yi kyere hen nye de nnye edur biara na ɔye edwuma.

4.2 Nsentsitsir a ɔda edzi wɔ Mfantse mbɛbusɛm a ɔfa ekuafɔ ho mu

Dem fa yi pensapensa nsentsitsir a ɔda edzi wɔ Mfantse mbɛbusɛm a ɔfa ekuafɔ ho mu. Agyekum (2017) mu no, nsentsitsir yɛ adze bi a no ho hia papaapa wɔ kasadwin dwuma ahorow bi tse dɛ kodzisɛm, akyerɛwtsɛn, ahwɛgor na awɛnsɛm mu. Ɔwɔ mu dɛ Agyekum ammfa bɛ annka ho dɛ nsentsitsir ho hia wɔ mu eso ɔyɛ adze a yennkotum eyi efi mbɛbusɛm mu ma ayɛ yie osiandɛ bɛ biara wɔ asentsitsir bi a ɔda edzi wɔ mu. Medze dem fa yi pensapensa dem nsentsitsir a ɔda edzi wɔ mbɛ a Mfantsefo dze dzi dwuma a ɔfa kuaye ho mu.

4.2.1 Edwumadzen ne nyɛɛ



Edziban no ntɔnee bu wɔ okuanyi noara ne nsa mu.

Bɛ a ɔwɔ sor hɔ yi da adwempɔw a ɔwɔ edziban no mbui ekyir wɔ guamu. Sɛ edziban bu wɔ guamu a, nna ogyina edwumadzen a okuanyi yɛɛ do. Iyi kyere dɛ Mfantse ekuafɔ dze enyi tsim siantsir a wɔyɛ hɔn ekuadwuma do; wɔdze si hɔn enyi do dɛ wɔbɛyɛ edwumadzen ma nyimpa enya ho mfaso. Sɛ hɔn edwumadzen no ho ba mfaso ma edziban pa ba a, hɔn enyi gye.

4.2.2 Dzenhyɛ

Asaase a nsunsuan fa do no, ɔnoara so na ewia bɔ a osi do.

Asaase yɛ adze bi a otum wow weseɛ anaa otum so yɛ atekyɛ. Asaase tum gye ɔhyewber na awɔwber nyinara ano. Asentsitsir a dem bɛ yi da no edzi nye dzenhyɛ. Mbrɛ ekuadwuma

mu dwumadzi ahorow tse no hia de okuanyi no ku ne tsir na ohye noho dzen ye n'edwuma annye a obopa abaw. Owɔ mu de okuanyi n'enyidoadzehu nye de obotwa ndɔbaa papa, naaso otɔfabi a nna n'apedze no ammba mu, oba no dem a nna otwar de ohye noho dzen na osan so ye edwuma no bio kyerekyere Nyame beye no adom ma oeenya ndɔbaa papa wo afe a obeba no mu.

4.2.3 Abotar

Okuanyi a otwoɔn asaase n'aba a osom bo no, onya abotar kodu de ne nsa beka Esusuow na Obese.

Nnye ber biara na ekuafɔ dua aba anaa gu aba; Mfantse ekuafɔ gu aba anaa dua aba wo Esusuow na Obeseber mu, ber a nsu to yie no mu. Odu dem ber yi a, adze biara a edze bogu famu no osiande nsu wo asaase no mu ntsi onkyer koraa na efifir. Iyi ntsi ekuafɔ nya abotar tweɔn dem ber yi ansaana woedua hon nduadzewa na nduadzewa no enya nsu dze efifir na adze enyin ma okuanyi no so enya ne mfaso a ope de onya. Dza iyi da no edzi nye de ekuadwuma hia abotarsie de mbre oda edzi wo Mfantsefo abrabɔ mu no.

4.2.4 Enyidosi

Mpanyimfo se, ekuadwuma mu sekan wo ho yi, obu wo adɔdwuma mu ho ara.


Be a owɔ sor ho yi da hia a ohia de nyimpa dze biribi si n'enyi do wo abrabɔ mu anaa no dwumdzi biara mu. Se okuanyi reye edwuma na ne dadze anaa sekan no bu a, nna okyere de okuanyi no dze dadze anaa sekan no dzii dwuma a otwar de adze dzi no ma obui. Iyi kyere de nna okuanyi no n; enyi tsim siantsir a okotɔɔ sekan no do. Demara so na se nyimpa

reye edwuma na se opira wo edwuma no mu a nna tserɛ nyimpa no dze biribi esi n'enyi do a ɔreyɛ. Mbom, se okuanyi ne dadze bu wo edwuma mu a, onngyaa edwuma no ye, ɔwo do ye edwuma no ma onya ho mfaso. Iyi kyere de dza nyimpa beye biara otwar de ɔdze biribi si n'enyi do.

4.2.5 Edwumadzen

Mbire bu no ntɔnee na ommbu no nduae.

Se mbire ba a, otum bu ara yie, eso no nduae nnye adze a ɔda famu. Iyi kyere de se obi pe de odua mbire a, otwar de ɔdze ahodzen soronko bi hye no dwumadzi no mu. Dem edwumadzen yi na ɔboɔa no ma no mbire no etum efifir na aye yie. Be yi kyere hen de edwumadzen mu wo mfaso a woto no abaw a onnhya.



4.2.6 Onuadɔ

Asaase a ɔsow kube no, ɔnoara so na ɔsow abe.

Dem be yi a ɔwo sor ho yi da asentsitsir a ɔye onuadɔ edzi wo nyimpa ne bra mu. Nyankopɔn na ɔboɔ nyimpa nyinara de mbre asaase a ɔsow abe no so sow kube no ara. Yegyina hen nyimdzee a yewo no wo asaase a ɔsow abe na ɔsan so sow kube do dze kyere de otwar de nyimpa dze bu na enyidze a ɔfata ma ne nyenko nyimpa osiande Nyankopɔn na ɔboɔ nyimpa biara. Iyi ntsi otwar de yehu nyimpa nyinara de woye per ama aboa eyi nyiyi efi nyimpa asetsena mu.

4.2.7 Owurayɛ/ɔdzedzeho

Okuanyi n'edudzewa, ɔnoara na onyim no bo.

Be a ɔwɔ sor hɔ yi da no edzi de otwar de dza odzi wɔ obi no ne nsa ka n'adze. Se okuanyi bere wɔ n'ekwadwuma mu na se otwaber du ma otwa n'ekwadze na ɔrotɔn a, nnye obi foror na ɔbekyere no bo a ɔmmfa nntɔn no. Dza iyi kyere hen nye de nyimpa a adze bi dzi wɔ no no ɔno na ɔwɔ tum wɔ adze no do. Bio, se asem bi so si a, nyimpa a asem no fa no ho no na otum kyere asem no mu yie, nnye ob a ogyina nkyen bi.

4.2.8 ɔbra mu adandan

Ifua ɔdo (edwow) a fa bankye si no pam na inyim dza ɔkɔm ba a ɔbegye wo.

Okuanyi no ndɔbaa beye yie ama no a ne ngyina do kese gyina wimu nsakyeree na nsutɔ nhyehyee do. Iyi ma ɔtɔfabi a ekuafo nnhye da nntum nnkyere de hɔn edudzewa beye yie anaa ɔrennye yie wɔ afe bi mu. Iyi hye hɔn ma ɔtɔfabi a wodua edudzewa foror dze ye ngyina-ekyir ka dza wodua ankasa no ho. Adwempɔw a ɔtaa iyi ekyir nye de se edudzewa a wɔdze sii hɔn enyi do de worudua no afe no mu no annye yie a, nna wɔdze hɔn enyi ato dza wɔdze yee ngyina-ekyir no do. Be yi da bankye a yedze si bayer mpam dze ye ngyina-ekyir ma bayer no ama se bayer anaa ɔdo no annye yie a, woetu bankye no ahye ɔdo no anan mu.

4.2.9 Nsonsonee

Mpanyimfo se, bankye wɔ hɔ yi, wɔnntɔn mmfɔra eburow.

Bankye na eburow ye eduadzewa ebien a wɔnnɛ wɔ kwan biara mu; wɔnntɔn hɔn mmbɔ mu wɔ gua do. Bɛ yi wɔ asentsitsir a ɔfa nsonsonɛ ho a ɔkyerɛ dɛ ridzi biribiara ho dwuma a otwar dɛ ihu dɛ ɔsor kwan a ebɛfa do edzi dɛm dwuma no. Kwan a wɔfa do tɔ bankye no nnye dɛm kwan no ara na wɔfa do tɔn eburow, ntsi sɛ edze hɔn fora tɔn a nnye adze a ɔbeyɛ yie bi. Mfantsefo mu no, asem a obesi biara na kwan pa a wɔfa do sɔw ano, iyi ntsi wɔmmfa nsem mmbobɔ mu biara biara dɛ wɔrosɔw ano bi. Wɔhwe siesie nsem a osi no nkorkor ama aboa ma woetum esiw asem kor no ano yie. Iyi kyere dɛ nsonsonɛ wɔ nsem mu, ntsi sɛ woridzi ho dwuma so a otwar dɛ wodzi no wɔ kwan soronko do.

4.2.10 Ndaase

Sɛ w'asew kyer haban mu kusi bɛkyɛ wo a, wo so tu haban mu mbire kɛkyɛ no osiandɛ hɔn nyinara yɛ siw do adze.

Asentsitsir a ɔfa ndaase anaa enyisɔ da edzi wɔ bɛ a ɔwɔ sor hɔ no mu. Sɛ obi yɛ obi ayɛ a, ohia dɛ nyia ɔayɛ no ayɛ no da n'enyisɔ edzi kyere nyia ɔyɛɛ no ayɛ no. Akwan horow na nkorɔfo dua do kyere hɔn enyisɔ; dɛ nyimpa no dze n'anofamfa bɛka nhyirasɛm egu nyia ɔkyɛɛ no adze no anaa no so dze biribi bɛkyɛ no dze akyerɛ n'enyisɔ wɔ dza ɔyɛɛ no ho. Mfantsefo hu ndaase dɛ ɔyɛ adze a no ho hia wɔ hɔn asetsena mu, iyi ntsi na wɔka dɛ, sɛ inyim akyɛdze gye a, nna otwar dɛ ihu meda wo ase so ka.

4.2.11 Koryɛ

Wɔnam dodow dua a, wɔnam dodow bu.

Koryɛ yɛ asentsitsir a bɛ a ɔwɔ sor hɔ yi reda no edzi. Ekuafɔ a wɔbɔ mu dua aba anaa gu aba no gyina hɔ ma kuw kor a wɔwɔ botae kor, iyi ntsi sɛ odu otwaber so a, otwar dɛ dɛm

nyimpa no ara san so kotwa, Iyi kyere korye a ɔwɔ dem nyimpakuw no mu. Be yi kyere hen de otwar de yeɛ kor na yekwetsir enyiber.

4.2.12 Ahobambo

Okuanyi a ɔtɔn eduadzewa a wodzi no, ɔnoara so na ɔbɔ ho ban.

Ahobambo ye adze a no ho hia papaapa wɔ nyimpa ne dwumadzi na abrabɔ mu. Okuanyi dua aba na se onyin na ɔammɔ no ban a, ewifo na mbowa bi tum see dza okuanyi no ahwew n'enyi ho mfifir aye no. Mfantsefo gyina hɔn adwenmusem a wɔwɔ no wɔ okuanyi n'ekwadze ho ahobambo ho da hia a ohia de nyimpa bɔ n'egypadze ho ban edzi. Be yi hye hen nkuran de kakra biara a yeɔwɔ no otwar de yeɔ ho ban.

4.2.13 Nyinii

Asaase tse de nyimpa dasanyi se ɔsow aba denara mpo a, opi.

Be yi mu no wɔdze asaase no su toto nyimpa no su ho. Nnye adze a nyimpa botum eyi nyin akwa efi ne bra mu; mbre ɔtse biara no benyin. Mbre nyimpa ne nyinii tse nye de, mber bi wɔ hɔ a beye abofra, ber bi so beba a bohu no na enyin araa ma inntum mpo nnye hwee. Mpen dodow a wodua anaa wɔye edwuma wɔ asaase no do no na asaase no seradze no so yew araa na ɔreyew. Nyimpa so wɔ dem su yi bi, nyimpa rinyin no nna nna n'ahodzen so famu ara na ɔroko.

4.2.14 Mfaso

Okuanyi tɔn adze kɔ beebi a obenya mfaso.

Okuadze no ntɔnee mu mfaso nye ekuafɔ dodowara hɔn enyidoadzehu. Iyi ntsi okuanyi tɔn n'ekuadze wɔ ber na bea a ɔbɔboa no ma oeenya mfaso pii. Sɛ ɔba no dɛ otwar dɛ ɔdze no ndɔbaa no sie kakra ansaana bo ba a ɔaatɔn a ɔye no dɛm. Iyi kyere dɛ okuanyi biara nnyi hɔ a ɔdze si n'enyi do dɛ ɔreyɛ edwuma na ɔabɔ kaw. Mfaso nye ekuafɔ enyidoahzdehu dɛ mbɛ obiara a ɔbeyɛ edwuma no ye no ara pɛr.

4.3 Kasasu ahorow a ɔda edzi wɔ Mfantse ekuayɛ ho mbɛ mu

Agykum (2013) kyere dɛ, kasasu ye ntotoho bi a ogyina twaka na ntseasee bi a yenya fi adwen mu mfonyin, amambra na hen atsenae mu nsem ho. Mbɛbusɛm a ɔfa Mfantse ekuayɛ ho no mu mmpa kasasua ahorow a ɔda Mfantsefo adwenmusɛm edzi. Kasasu ahorow a ɔda edzi wɔ mbɛ no mu bi na mapɛnsapɛnsa mu wɔ ase ha yi.

4.3.1 Ntotoho

Ngyinahɔma nye dɛ edze ndzɛmba ebien a wɔnnɛ wɔ su mu toto ho. Agyekum (2013: 185) kyere mu dɛ, ntotoho nye dɛ ye dze ndzɛmba ebien toto ho, mbom ntotoho no mu no yɛdze nkasafua bi tse dɛ 'Tse de , de na kyɛn' anaa nyɛe nkasafua bi tse dɛ 'se ' dzi hyɛ adze ebien no ntamu. Ntotoho da nɛ a ɔwɔ biribi mu edzi, na sɛ iyi bedzi mu a, ndzɛmba a ye dze toto ho no wɔ su bi a ɔnnɛ dada. Ntotoho a ɔwɔ mbɛbusɛm no mu bi nye dza ɔwɔ ase ha yi;

Ohen ne ntam tse de ahabayer mona, eto mu a, mmfa woho nndzi.

Be a ɔwɔ sor hɔ yi dze ohen ne ntam toto roto ɔdo mona mu ho. Bayer anaa ɔdo mona mu do na se eto mu a nnye adze a ebe fa woho tɔtorɔtɔ. De mara na se obi to ohempɔn bi ne ntam so a, ɔmmfa no ho tɔtorɔtɔ. Nkan no nna nkye obi to ohempɔn ne ntam a, wotwa no akyer anaa wotwa no esu. Nyame ye wo adom a, ɔno wɔbɔ wo kaw ara. Iyi ntsi nna nnye adze a obi ka ohen ne ntam na akantam ɔaakɔto ntam no.

Basia tse de mbirikisi a okuafo dɔw, ɔye denara a obenya ndua akese efi mu.

Be a ɔwɔ sor hɔ yi ye ngyinahɔma a ɔdze ɔbaa toto mbirikisi ho. Mbirikisi ye efuw a ɔye dzen de okuanyi botum adɔw ansaana oeedua no ndɔbaa. Mbom se itum dɔw wie na eye w'edwuma wɔ n'ananmu hɔ a ɔsow papaapa. Ehwe ɔbaa so a, mbaa ye nyimpa bi a hɔn asem ye dzen papaapa, mbom se hu no tsena so a ɔbe ye mfaso ama wo. Agyekum se no ewur de otwar de ntotoho nya nse na twaka bi. Mbaa na mbirikisi nyinara ye adze a hɔn ho edwuma ye dzen, nna nsonsonnee a ɔda hɔn ntamu nye de mbirikisi ye efuw na ɔbaa so ye nyimpa. Ntsi dem be yi mu no, wɔdze efuw no su no atoto nyimpa su ho.

4.3.2 Se-nyimpa

Dem kasasu yi dze adze a ɔnnye nyimpa gyina hɔ ma odzi dwuma de nyimpa. Agyekum (2013: 187) kyere de, se -nyimpa mu no, wɔma ndzemba, mboa anaa adze a nyimpa nntum nnsuo mu dzi dwuma de nyimpa. Dem kasasu yi mu no wɔma dem ndzemba a wɔma wodzi

dwuma de nyimpa no nya nyimpa su, bobew, atsenka na adze. Se-nyimpa da edzi wo dem mbebussem yi mu.

Kwaa a ɔannyɛ hwee amma wo no, ɔbɔɔ bankye ampesi maa idzii.

Se kwaa wo ho a nkorɔfo hu de mfaso biara nnyi ho. Mbom se iwura kwaa no mu a, inya mfaso pii fi mu. Siantsir nye de, se edɔw kwaa no na eye no kwa a, inya edziban pii fi mu. Oye nyimpa na yenyim de otum kitsa adze wo ne nsamu dze ma nyimpa, naaso be yi mu no yehu de wɔdze dem su yi ama asaase de otum dze adze ma obi. Dza ɔma ɔye mbordo mpo nye de otum bo bankye ampesi ma nyimpa.

Kotɔkoraba a ɔakɛtsew aberee ato famu no se woridzi a, wɔmma no ebun.

Be a ɔwo sor ha yi ye be a ɔye se nyimpa anaa ɔdze nyimpa su ma adze bi a ɔnnye nyimpa. Be yi mu no wɔdze nyimpa su ma kɔkɔkorba. Yenyim de kɔtɔkorba ye adze a wɔdze tsew ekutu anaa wotum dze tsew eduaba, mbom nnye noara na ɔtsew eduaba no. Se kɔtɔkorba botum atsew eduaba a, gyede nyimpa suo mu ansaana. Be yi mu no wɔma kɔtɔkorba no dzi dwuma de mbre ɔye nyimpa. Ono nye de otum tsew aba a aber.

4.3.3 Nsawɔwdo


Nsawɔwdo mu no, yedze nkasafua anaa nsentɔw ebien a wɔse su anaa ntseasee mu bo mu dzi dwuma. Wotum nya abɔse kor, anaa so yehu hon de ɔye asentɔw bi ne fa bi, anaa wotum kyere mu de wɔye abɔenyim (Agyekum (2013: 89). Mfantse mbebussem a ɔfa ekuafɔ ho no mu bi ye nsawɔwdo. De m mbe no bi na ɔwo ase ha yi; dodow nya dwuma a wodzi ho mfaso

*Wɔnam dodow **dua** a, wɔnam dodow **bu**.*

Nsawɔwdo wɔ be a ɔwɔ sor hɔ a ɔfa Mfantse ekuafɔ ho no mu. Be no mu no, nkasafua a ɔma nsempruw ebien a ɔwɔ mu no ye soronko ara nye “dua” na “bu”. Ihu de nkasafua a ɔye a ɔdze nsonsonnee ba nsempruw ebien no ntamu no bɔ enyim anaa bɔ ebira de mbre Agyekum (2013) ka no.

*Asaase a ɔsow **kube** no, ɔnoara so na ɔsow **abe***

Bio, be a ɔwɔ sor hɔ yi da nsawɔwdo edzi wɔ mu. Be *asaase a ɔsow kube no, noara so na ɔsow abe* wɔ nsempruw ebien a nkasafua ebien na ɔma nsempruw no ye soronko fi biara ho. Nkasafua a odzi dem dwuma yi nye abe na kube. Iyi so ma yehu de dza Agyekum (2013) ka nkasafua ebien a wɔbɔ ebira na otum dze nsonsonnee ba nsempruw ebien a ɔda edzi wɔ nsawɔwdo mu no ye nokwar.



4.3.4 Nkɔnsonante ntoatoado

Nkɔnsonante ntoatoado nye de yerinya kɔnsonante a odzi nkasafua ebien na no mboree a wɔtoatoa do wɔ asentɔw mu (Agyekum, 2013). ɔkyere de, ɔtaa dzi nkasafua a wɔtoatoa do pɛɛ enyim wɔ awensem na ndwom mu. Muhun de dem kɔnsonante ntoatoado yi bi da edzi wɔ Mfantse mbebusɛm a ɔfa kuaye ho mu. Nkɔnsonante ntoatoado a ɔwɔ Mfantse mbe a ɔfa ekuafɔ anaa kuaye ho bi na ɔwɔ ase ha yi;

*Nnye yenkɔdɔw nkotsee nye sekan na mbom se kɔtɔkoraba ka
ho a, na ɔye kyeraw kyeraw.*

Be a ɔwɔ sor hɔ yi mu no kɔnsonante ntoatoado anaa yenya nkasafua a wɔtoatoa do a kɔnsonante kor na odzi hɔn enyim wɔ mu. Ye hwɛ mfatoho bi tse de "...kɔtɔkorba ka a, na ɔye kyeraw kyeraw". Yehu de ɔnye dza Agyekum (2013) ka no wɔ twaka de yenya nkasafua a wɔtoatoa do pɛɛ na kɔnsonante kor dzi hɔn enyim. Yehwɛ mfatoho a medze ato gua no a yehu de "kɔtɔkorba na Ka" toa do pɛɛ na hɔn nyinara so dze ngyegyee "k" hyɛ ase, demara so na ɔda edzi wɔ "kyeraw kyeraw" mu.

4.3.5 Enyihaahaa

Enyihaahaa ye kwetsikwan kasasu a kwan akasafo dua do dze kasa dzi dwuma a ɔma wɔto hɔn nsem no mu nkyen ka (Agyekum, 2013). Ɔye kasasu a ɔma akasafo ka asem ma ɔye huhuuu kyen mbre otwar de ɔye no. Enyihaahaa mu no, akasafo nnka kasa no ara bi, mbom wɔdze kasa ntrado dzi dwuma wɔ hɔn kasa no mu. Ɔtɔfbi a yenya enyihaahaa wɔ mbɛbusɛm a ɔfa Mfantse kuayɛ ho no bi mu. De m mbɛ yi bi na medze ato gua wɔ ase ha yi;

Basia tse de mbirikisi a okuafo dɔw, ɔye denara obenya ndua akɛse efi mu.

Be a ɔwɔ sor hɔ yi dze dze mbirikisi no su toto mbasiafo su ho. Ɔwɔ mu de ɔbaa no ho edwumaye ye yaw, eso orunntum nnye dzen araa ma ɔnnye de mbre mbirikisi no ndɔwee tse. Mbirikisi no ndɔwee ye dzen araa ma ohia mbanyin a woepirim hɔn akoma ana woetum adɔw. Eso ɔbaa dze ne nsenkaa bi ye dzen dze eso nnye adze a ɔtse de mbre rodɔw mbirikisi. Tɔfabɔ mu no, be yi ahaahaa enyi wɔ mbasiafo hɔn suban ho de ɔdze totoo mbre mbirikisi no ndɔwee tse ho.

4.4 Ofa yi no tɔfabɔ

Tsir yi hwɛɛ mbɛbusɛm a Mfantsefo dze dzi dwuma a ofa Mfantse ekuayɛ ho. Bɛ yi dzi kan yɛɛ mpɛnsampɛnsamu faa Mfantse mbɛbusɛm pɔtsee a ofa ekuadwuma ho, ekyir yi ohwɛɛ mbɛbusɛm a ofa asaase do nsiesie ho, dza ofa kwa no ndɔwee, dza ofa otwaber ho na dza ofa ndɔbaa no ntɔnee ho. Bio, ofa yi sanee hwɛɛ nsentsitsir a oda edzi wɔ dem mbɛbusɛm yi ho na korakoraa no ohwɛɛ kasasu ahorow a oda edzi wɔ mbɛbusɛm no mu.



5.0 Nyienyim

Ofa yi yɛ ofa a otwa tun wɔ nhwehwɛmu dwumadzi yi mu. Dza oda edzi wɔ ofa yi mu nye ofa yi ne nyienyim, dwumadzi yi no tɔfabɔ, dza nhwehwɛmu yi da no edzi, adwenkyerɛ na ofa yi no tɔfabɔ.

5.1 Dwumadzi yi no tɔfabɔ

Dwumadzi yi hwehwɛmu mbɛbusɛm a Mfantsefo dze dzi dwuma a ofa ekuafɔ ho. Nhwehwɛmu yi dze 'Conceptual Metaphor Theory' a Lakoff na Johnson (1980) dze bɔbɔɔ adze pɛɛ nhwehwɛmu yi no mboanosɛm mpɛnsampɛnsamu ekyir. Adwenmusem yi kyere

dɛ Metafo ne ntseasee dzi mu ber a yeatserew abɔse ntseasee no mu ma yeehu ntseasee mapa no. Nhwɛhwɛmu yi pɛ mbuae ma nsembisa a ɔwɔ ase ha yi;

- Eben mbɛbusɛm pɔtsee na Mfantsefo dze dzi dwuma a ɔfa Mfantse ekuayɛ ho?
- Eben nsentsitsir na ɔda edzi wɔ dem mbɛbusɛm no mu?
- Kasasu ben na ɔda edzi wɔ dem mbɛ no mu?

Mabɔ dza nhwɛhwɛmu yi da no edzi a ɔnye nsembisa yi wɔ twaka no tɔfa wɔ ase ha.

Nhwɛhwɛmu yi wɔ nkyekyɛmu enum. ɔfa a odzi kan no yɛ nyienyim ma nhwɛhwɛmu yi.

Dza ɔda edzi wɔ ɔfa a odzi kan no mu nye nhwɛhwɛmu yi ne ngyinado, ɔhaw no, nhwɛhwɛmu yi no botae na nhwɛhwɛmu yi ho nsembisa. Nhwɛhwɛmu yi ho mfaso, nhwɛhwɛmu yi ho akwambew, bea a nhwɛhwɛmu yi pem na nhwɛhwɛmu yi ne nhyeyɛɛ nyinara so da edzi wɔ ɔfa yi mu.

ɔfa a ɔtɔ do ebien no pensapɛnsa enyimdzefo bi adwenkyerɛ a ɔnye nhwɛhwɛmu yi wɔ twaka mu. Dza ɔda edzi wɔ ɔfa yi mu nye Akanfo na hɔn kasa, mbɛbusɛm, nsentsitsir na kasasu a ɔda edzi wɔ Mfantse mbɛbusɛm a ɔfa Mfantse ekuafo ho. ɔfa a otwa tun wɔ ɔfa yi mu da ‘Conceptual Metaphor Theory’ edzi dɛ ɔyɛ adwenmusem a medze piaa nhwɛhwɛmu yi ne mpensampensamu edzi.

Tsir a ɔdɔ do ebiasa no so da nhwɛhwɛmu kwan a medze dzi dwuma edzi. ɔfa yi pensapɛnsa nhwɛhwɛmu su, nyimpa a medze hɔn dzii dwumadzi yi, nyimpa pɔtsee a medze hɔn dzi dwuma yi na nyiyimu akwan. Bea a minyaa mboanosem no, kwan a mefaa do nyaa

nsemboano dze dzi dwuma yi nyinara so da edzi wɔ nhwehwɛmu yi mu. Ɔfa otwa tun wɔ tsir yi mu nye akwansere na ɔfa yi no tɔfabɔ.

Ɔfa a ɔtɔ do anan da mbɛbusem bi a Mfantsefo dze dzi dwuma a ɔfa Mfantse ekuafɔ ho. Ɔfa yi dzi kan da mbɛbusem a ɔfa Mfantsefo ekuafɔ no ho, ɔhwɛ mbɛbesem a ɔfa asaase ho, dza ɔfa adɔw ho, dza ɔfa aba no nduae ho, dza ɔfa ndɔbaa no ntwae na dza ɔfa ndɔbaa anaa eduadzewa no ntɔnee ho.

Ɔfa a ɔtɔ do enum no ye nhwehwɛmu dwumadzi yi ne fa a ɔtɔ do enum. Dem fa yi na ɔye nhwehwɛmu no no tɔfabɔ. Dza ɔda edzi wɔ mu nye ɔfa no ne nyienyim, nhwehwɛmu dwumadzi yi no tɔfabɔ, dza nhwehwɛmu dwumadzi yi dze to gua na ɔfa yi no tɔfabɔ.

5.2 Dza nhwehwɛmu dwumadzi yi dze to gua

Nhwehwɛmu yi no botae nye de ɔpensapensa mbɛbusem a Mfantsefo dze dzi dwuma a ɔfa Mfantsefo ekuafɔ ho, nsentsitsir a ɔda edzi wɔ dem mbɛbusem no mu na kasasu ahorow a ɔda edzi wɔ dem mbɛbusem no mu. Nhwehwɛmu yi dze ‘Conceptual Metaphor Theory’ piasa nhwehwɛmu yi ne mpensampensamu ekyir. Ɔye nokwasem de mbɛbusem ne ntseasee gyina ntseasee ebien a ‘Conceptual Metaphor Theory’ da no edzi nyinara (mekyere, abɔse ntseasee na ntseasee mapa no nyinara). Dem mbɛbusem yi wɔ ngyinahɔma su na ohia de wɔdze toto hen daa daa abraɔ ho.

Dza nhwehwɛmu yi da no edzi no kyere de Mfantsefo dze mbɛbusem a ɔfa kuaye ho fitsi ekuadwuma mu asaase nsiesie, aba no nduae, haban no mu ndɔwee, ndɔbaa no ntwae, na ndɔbaa no ntɔnee nyinara. Dem mbɛbusem yi mu bi ye ntsiantisia na bi so wowaree. Ɔda

edzi de, mbebusem a oye ntsiantsia no wo ntseasee a no mu do na ne nkyerekyeremu so wowar kyen mbebusem a owowaree no. Dza mboanosem no ne mpensampensamu no da edzi no kyere de mbebusem yi mu bi wo nsentsitsir a oda edzi wo mu na kasasu ahorow a oda edzi wo mbebusem no mu. Tsir asem a oda edzi wo mbebusem yi mu no bi nye abotar, edwumadzen, ahobambo, nkabomu, odzedze, akwadwer na adze. Mbebusem a ofa Mfantse kuaye ho no mu nsentsitsir no da Mfantsefo adwenmusem ahorow edzi.

Muhu de se igyina tsir asem do a, oda edzi de mbebusem no mu dodowara ye dza otsia akwadwer na ohye edwumadzen nkuran. Muhu de, dza onam do ma mbebusem no hye edwumadzen nkuran no gyina mbre ekuadwuma no su tse no do. Bio, asentsitsir a ofa abotar ho so mmpa Mfantse mbebusem a ofa ekuadwuma ho mu. Iyi so tum gyina ohaw a ekuafu fa mu bi tse de ope, guamu nsensem a ofa ekuafu hon ekuadze no ntonee ho na mber tsentsen a ndobaa no bi dzi ansaana no twaber aso do. Dem ohaw yi nyinara gye abotar kakra de mbre oda edzi wo asentsitsir a ofa abotar ho wo mbe no bi mu no.

Ekuadwuma ye dzen na ohia ahoodzen soronko bi wo no ho dwumadzi nyinara mu. Iyi ntsi ohye ekuafu ma wobu hon ekuadze ho ban fi ewifo nsamu. Iyi so botum egyina adwempaw a otaa asentsitsir a ofa owuraye/odzedze ho do de mbre makyerekyere mu wo ofa 4.3 mu no. Asentsitsir a ofa mkabomu anaa korye ho da edzi wo Mfantse ekuadwuma ho mbe mu. Osian mbre adaw ho edwuma ye dzen ntsi ekuafu gyina hon a wobia hon wo hon edwumaye mu no na se hon kwa yi ndobaa so a wonye hon ara etwa na se mfaso bi wo ho a hon nsa aka bi.

Dza nhwehwemu yi da no edzi no so kyere de kasasu ahorow bi so da edzi wo dem mbebussem yi mu. Kasasu a oda edzi wo mbebussem no mu bi nye ngyinahoma, se-nyimpa, enyihaahaa, nsawodo na dza okeka ho.

5.3 Adwenkyere

Mprempre nhwehwemu yi fa Mbebussem a Mfantsefo dze dzi dwuma a ofa Mfantse ekuafu anaa kuaye ho a ogyina 'Conceptual Metaphor Theory' do yee mpensampensamu a ofa ho. Mususu de nhwehwemufu a wobeye nhwehwemu a ofa nhwehwemu a otse dem ho no botum atserew nhwehwemu yi mu na wواهwe dza ofa mboawa a wowa Mfantse nkurow do ho. Bio, de mbre Mfantse kasa no nkorbata no ye ebiasa yi, nhwehwemufu no bi so botum ahwe ho wo nkorbata bi tse de Esuantse Twi anaa Ekuapem Twi mu. Kasa a onnye Akan kasa bi tse de Awona, Kasem, Dagbani, Dangme na ne nkeka ho so botum aye nhwehwemu afa tsir asem yi ho. Nhwehwemufu bi so botum ye ntotoho nhwehwemu afa dza maye yi ho na odze atoto kasa fofor bi dze ho.

Mususu d[nhwehw[mufu b[kyeya enyi ahw[ns[ntsitsir p]tsee bi tse d[edwumadzeny[, Owuray[, aseda, abotar, nyinii na adze.

5.4 Tofabo

Nhwehwemu dwumadzi yi mbebusema ofa kuaye ho wo Mfantsefo mu. Nhwehwemu yi apensapensa mbebussem potsee a wodze dzi dwuma a ofa Mfantsefo ekuafu ho na mbebussem a wodze dzi dwuma wo ekuadwuma no ne nyee mu mber a oko do wo mu no bi mu. Nsentsitsir ahorow a oda edzi wo mbebussem no mu so dwumadzi yi aboa ada no edzi;

nsentsitsir a ɔfa owurayɛ/ɔdzedze, abotar, edwumadzen na adze. Bio, nhwehwɛmu yi apensapensa kasasu ahorow a ɔda edzi wɔ dem mbe yi mmu bi tse de ntotoho, sɛ-nyimpa, mbawor kor ngyegyee ntoatodo, kɔnsonante kor ngyegyee ntoatodo, enyihaahaa, nsawɔdo na adze.

‘Conceptual Metaphor Theory’ ngyinado mu no, adwenmusem ahorow a ɔfa Mfantsefo ho da edzi wɔ dem mbeusem yi mu. Nhwehwɛmu yi akyere de mbeusem a ɔfa kuayɛ ho no tu nyimpa fo wɔ suban bɔn bi tse de enyiber, pɛsɛankonya, etsiɔdzen, akwadwer na adze ho. Mbeusem yi hye nyimpa nkuran ma wɔda suban pa a ɔfa Mfantsefo adwenmusem a ɔfa ɔbra ho bi tse de nkabɔmu, edwumadzen ne nyee, pɛrɛpɛrye na adze edzi.



MBOAYɛ MBUUKUU

Abakah, E. N. (2008). *Proverbs: The depository of the Akan traditional philosophy*. The Sixth co-Existence Conference of West African Languages in Burkina Faso.

Abakah, E. N. (2016). Hypothesis on the diachronic development of the Akan language Group. *Journal of Universal Language* 17-1.

Acharya, A. S., Prakash, A., Saxena, P., Nigan, A. (2013). Sampling: why and how of it? *Indian Journal of Medical Specialities*, 2013;4(2):330-333. Retrieved on 2nd December 2022.

Addo, A. H. (2006). *Values of adinkra and agama symbols*. Kumasi: Bigshy Designs and publications.

Agyekum, K. (2005a). The pragmatics of request in Akan communication. *Legon Journal of Humanities*, 16, 1-26.

Agyekum, K. (2006). Akan traditional arbitration: its structure and language. *Journal of Multilingual and Multi development*, 16 (1-26).

Agyekum, K. (2010). *Akan Kasa Nhyehyeee*. Accra: Dwumfuor Publication.

Agyekum, K. (2011). *Akan Kasadwini*. Accra: Dwumafuor Publication.

- Agyekum, K. (2012). Akan proverbs and aphorisms about marriage. *Research Review* 27.2:1-24
- Agyekum, K. (2013). *Introduction to literature*. Legon-Accra: Adwinsa Publications Ltd.
- Agyekum, K. (2017). The Ethnosemantics and proverbs of ohia 'poverty' in Akan *Legon Journal of the Humanities*, 28 (2), 23-48.
- Agyemang, B. C., Asumeng, A. M. and Amponsah, B. (2015). The relevance of Ghanaian Akan proverbs to explanations of contemporary human resource principles and corporate values. *Journal of Business Research*, 9, 2015.
- Akinmade, A. C. (2009). Some Ondo philosophical proverbs for practical living. *An International Multi-Disciplinary Journal, Ethiopia Vol. 3 (2)*.
- Akmajian, A. R. Demers, A. Farmer and R. Harnish. (2001). *Linguistics: An Introduction to Language and Communication*. Cambridge: The MIT Press.
- Albert, S. (1977). Politics in Swahili proverbs. *Ufahamu: A journal of African studies*, 8(1).
- Amate, P. (2011). *Visual representation of selected Akan proverbs in Ghana: their philosophical and socio-cultural values*. MPhil Thesis. Ghana, Kwame Nkrumah University of Science and Technology, Kumasi.
- Annobil, J. A. (1955). *Mbe Nkyerekyeremu*. Methodist Book Depot Ltd, Cape Coast.
- Azure, A. J. (2010). Literary analysis of Gurene proverbs. *Journal of African languages and cultures*, 1(1), 67-76.
- Bannerman, J. Y., (2011). *Mfantse-Akan mbe nkyerekyeremu*. Volume (A-K).
- Bauer, L. (1988). *Introducing linguistics morphology*. Edinburgh: Edinburgh University Press.
- Boham, I. (1997). *Mfantse kasa ho Mbra na Dwumadzi Buukuu*. Accra: Bureau of Ghana Languages.
- Borentine, M. (1999). *Word and image: a synthesis of Twi proverbs and photographs*. Conveyed in Nzema proverbs. *International Journal of Language and Literature*, 6(2), 112-117.
- Cavanaugh, S. (1997). Content analysis: concepts, methods and application. *Nurse Research*, 4(3), 5-16.
- Crytal, D. (1990). *Linguistics*. Bangor : Penguin Books Ltd.
- Creswell, J. W. (2009). *Research design: Qualitative, quantitative and mixed methods approaches (3rd edition)*. Thousand Oaks, CA: Sage publications.

- Devlieger, P. J. (1999). Frames of reference in African proverbs on disability. *International Journal of Disability, Development and Education*. <https://www.tandfonline.com/loi/cijd20>.
- Diabah. G. and Amfo, A. A. (2018). To dance or not to dance: masculinities in Akan proverbs and their implications for contemporary societies. *Ghana Journal of Linguistics* 7.2: 179-198.
- Dorjey, A. and Singh, K. R. (2004). Farming proverbs: analysis of their dynamics and armer's knowledge. *Indian Journal of Traditional Knowledge*, 3(3), 276-286.
- Etikan, I. and Bala, K. (2017). Sampling and sampling methods. *Biometrics & Biostatistics International Journal*. Volume 5, Issue 6. Retrieved on 2nd December 2017.
- Evans, V., Bergen, B. & Zinken, J. (2007). The cognitive linguistics enterprise: an overview. *The Cognitive Linguistics Reader*, London Oakville: Equinox Publishing Ltd.
- Finnegan, R. (1970). *Oral literature in Africa*. London: Oxford University Press.
- Geeraerts, D. (2010). *Theories of lexical semantics*. New York, Oxford University Press.
- Goddard, C. (2006). *Ethno-pragmatics: A New Paradigm*. Griffith University.
- Gruba, P. and Zobel, J. (2017). *How to write your first thesis*. Switzerland: Spring International Publishing AG.
- Inusah, A. & Issahaku. J. S. (2019). The role proverbs in Dagbani. *International Journal of Language, Literature and Culture*, 6(1): 1-10.
- Janda, L. A. (2010). Cognitive linguistics in the year 2010. *International Journal of Cognitive Linguistics*, Vol. 1(1), 1-30.
- Johnston, D. D. and Vanderstoep, S. W. (2009). *Research methods for everyday life: Blending qualitative and quantitative approaches*. United States of America:
- Kobia, M. J. (2016). A conceptual metaphorical analysis of Swahili proverbs with reference to chicken metaphor. *International Journal of Education and Research*, 4(2).
- Kothari, C. R. (2004). *Research methodology: Methods and techniques*. New Delhi, New Age International (P) Ltd. Retrieved on 2nd December 2020.
- Kovecses, Z. (2002). *Metaphor: A Practical Introduction*. Oxford: Oxford University Press.

- Kquofi, S., Amate, P. & Tabi-Agyei, E. (2013). Symbolic representation and socio-cultural significance of selected Akan proverbs in Ghana. *Research on humanities and social sciences*, 3.
- Lakoff, G. & Johnson, M. (1980). *Metaphors we live by*. Chicago: The University of Chicago Press.
- Malik, M. (2017). A theoretical analysis of the communicative significance of proverbs in English Language. *Journal Of Humanities And Social Science (IOSR-JHSS)* 22(3).
- Marshall, M. N. (1996). *Sampling for qualitative research*. Great Britain: Oxford University Press. Vol. 13, No. 6. Retrieved on 2nd December, 2020.
- Mensah, I. (2020). *Mɛɛbusem a afoarfo dze dzi dwuma bi mu mpensampensamu: nsempɔwtsitsir na kasasu ahorow*. M.Phil. Thesis, University of Education, Winneba.
- Mieder, W. (2004). *Proverbs: A Handbook*. Greenwood: Folklore Handbooks.
- Nabifar, N. (2013). A Comparative study of English and Persian proverbs on basis of cognitive linguistics. *Technical Journal of Engineering and Applied Sciences*: 2013-3-18/2287-2302.
- Odoom, K. J. (2013). *Mfantse Kusum Amandze na Amambra*. Agona Swedru: Educational Publishing.
- Owu-Ewie, C. (2014). A morphosyntactic analysis of some Fante habitation names (eonym). *The International Journal of humanities and Social Studies*, 2 (5) pp. 232-243.
- Owu-Ewie, C. (2017). *Introduction to traditional and action research*. Koforidua, Database multimedia.
- Owu-Ewie, C. (2019). Proverbs in marriage: counseling role and implication. *Long Journal of the Humanities*, 30(1), 24-53. School for International Training College Semester Abroad.
- Patton, M.C. (2002). *Qualitative research and evaluation methods (3th ed.)*. New York, NY: Oxford University Press.
- Penelope, B and Stephen, L. (1978). Stephen (1978) Universals of Language Usage: Politeness Phenomena, in E. Goody (ed.). *Questions and Politeness*. Cambridge: Cambridge University Press.

Retrieval from <https://www.researchgate.net/publication/281037471>

- Richards, I. A. (1936). *The Philosophy of Rhetoric*. Oxford: Oxford University Press.
- Shamsutdinova, E. K., Martynova, E. V., Ereemeeva, G. R. & Baranova, A. R. (2017). Proverbs and sayings related to animals in Arabic, English and Tatar press. *The Turkish Online Journal of Design, Art and Communication TOJDAC*.
- Sidhu, K. S. (2012). *Methodology of research in Education*. New Delhi: Sterling Publishers Private Limited.
- Stemler, S. (2001). An overview of content analysis. *Practical Assessment, Research and Evaluation*, 7(17).
- Sultan, S. (2013). Saraiki proverbs related to runaway women. *Journal of Law and Social Research*. No.4, pp. 65-67.
- Tetteh, E. K. (2013). *Literal features of Akan proverbs*. Accra: Doku St.
- Tuckman, B. W. (1999). *Conducting educational research (5th ed.)*. United States: Wadsworth Group.
- Villers, D. (2016). Proverbiogenesis: the phases of proverbial birth. *In proceedings of 9th Interdisciplinary Colloquium on Proverbs. Tavira: International Association of Paremiology*, 369-380.
- Wiafe-Akenten, N. A. (2015). *Sedee yede Akanfoɔ mme di dwuma wɔ enne mmerɛ yi radio ne television so*. M.Phil Thesis, Department of Linguistics, University of Ghana, Legon, Accra, Ghana.
- Wonkyi, P. N. (2016). *Kuayɛ mu nkasafua na nsemfua ho nhwehwɛ wɔ kaka ntseasee kwan do*. M.Phil Thesis. University of Education, Winneba.
- Yakub, M. (2018). An ethno-pragmatic perspective of the 'concept of patience' as conveyed in Nzema proverbs. *International Journal of Language and Literature*, 6(2), 112-117.
- Yankah, K. (1989). *The proverb in the context of Akan RHETORIC*. New York: Peter Lang.
- Yankah, K. (1991). *Oratory in Akan Soceity*. Sage Publications, Ltd: Discourse & Society, Vol. 2, No. 1 (1991), pp. 47-64

NKEKAHO A

Nsɛmbisa bi a medze boaa mboanosem no ne nhwehwɛ no

1. Wo ntseasee wɔ mbɛbusɛm ho nye dɛn?
2. Ewɔ mbɛbusɛm bi a ɔfa ekuadwuma ho anaa?
3. Ibotum ama me dɛm mbɛbusɛm no mu bi?
4. Ewɔ mbɛbusɛm bi a ɔfa asaase nsiesie ho wɔ ekuadwuma mu?
5. Mbɛbusɛm a ɔfa adɔw, eduadzewa no ntwae na no ntɔnee ho so ɛ?
6. Annye yie koraa no ma me mbe ebien ebien fa tsir asem a ɔwɔ asem bisa 4 na 5 no mu?
7. Eben nsentsitsir na yebotum enya efi mbe no mu?
8. Ana dɛm nsentsitsir yi da Mfantsefo adwenmusɛm bi edzi?

NKEKAHO B

Mbɛbusɛm bi a ɔda edzi wɔ nhwehwɛmu yi mu

1. *Ɔbaa bɔn tse de haban mu bankye ndua, se edze no gu apa do mpo a, obefɛfir.*
2. *Asaase tse de nyimpa dasanyi, se ɔsow aba denara mpo a, ɔpo.*
3. *Emo se ɔpe nsu assase, naaso idua no po do a, ommɛfir.*
4. *Wo fasew ammbɔ a nna ofi w'asaase.*
5. *Mpanyimfo se, asaase bɔn tse de nsoe, ɔmmɔ nkaa ansaana ɔawɔ.*
6. *Asaase a ɔsow kube no, ɔnoara so na ɔsow abe.*
7. *Mpanyimfo se, asaase a wodua do ekuadze ho manso, wɔtwe no owura.*
8. *Okuanyi n'asaase do mbire, wotu no noara.*
9. *Asaase a ɔgye kuromanyi no, ɔnoara so na ɔgye ahɔho.*
10. *Mpanyimfo se, pintsinn asaase nnda hɔ kwa.*
11. *Okuafo a ɔrotwoɔn asaase n'aba a ɔsom bo no, onya abotar kodu de ne nsa beka Esusuow na Ɔbesɛ.*
12. *Asaase a ɔbɔsow eduadzewa no nnyim ɔpe ber.*
13. *Asaase biara n'enyinyamhye nye ndɔbaa a obefi mu bopue.*
14. *Asaase bɔn noara da noho edzi wɔ edwumaye mu.*
15. *Asaase a dua ɔtsen si do no, noara so na dua a akyea so si do.*
16. *W'enyi tua wo hanoa a, ennse de ibodu san ma.*
17. *Asaase a nsunsuan fa do no ɔnoara so na ewia bɔ a osi do.*
18. *Mpanyimfo se, se nyimpa beenu per asaase ho a, wɔdan gya.*
19. *Mpanyimfo se, wɔmmfa ɔwora asaase nntoto asaase pa ho.*
20. *Asaase bɔn ben esutsen mpo a, ɔda ho ara ye asaase bɔn.*

21. *Asaase a okuafo gyina mu aba no, anoara so na obegyina mu etwa.*
22. *Erodɔw kookoo haban na ekɔto nwaba a wɔfa.*
23. *Sɛ edze Memenda dɔw a, mmfa Memenda mmbu.*
24. *Baasia tse de mbirikisi a okuanyi dɔw ɔye denara obenya ndua akese efi mu.*
25. *Obi a ofi Enyan Abaasa rokɔ Ekumfi Mborɔbɔtɔ akɔdɔw ɔbesɛ burow no, nna onyim dza oeho*
26. *W'abɔmu na ɔkyere w'adɔw.*
27. *Edaadaa wo daze wɔ serebo do a, ano so daadaa wo wɔ nkonan enyim.*
28. *Sɛbew, sɛ inya nkwasea ahɔɔdzen dze dɔw w'asew a, onya nkwasea sika dze gu w'awar.*
29. *Daakye asem ntsi na wɔdɔw kɔto mpuwa a, wogyam ho.*
30. *Sɛ erodɔw na wo sekan twa wo kɔtɔkorba a, wɔmmbɔ ho ngua.*
31. *Sɛ epa w'asew ne pa ekyir ahwe a nna ema no ko kwaa do efuw ma ɔdɔw.*
32. *Ansaana Kweku Ankan ɔrehyew n'efuw a annhyew no, na ofi Asenyi n'adɔw bɔn.*
33. *Kwae a onndzi gyina no, na wodzi ase mpepew.*
34. *Edze w'ano dɔw kantonsoe a, bi nnwɔ wo.*
35. *Mpanyimfo se, ekuadwuma mu sekan wɔ hɔ yi, obu wɔ adɔdwuma mu hɔ ara.*
36. *Mpanyimfo se, ekuafo nyinara nndɔw per.*
37. *Mpanyimfo se, sɛ okuafo enntum anndɔw n'efuw a, ɔdan kwaa.*
38. *Mma nndɔw wo nan enyim, hwehwe asaase dɔw na enya adze.*
39. *Enntum wo mbirikisi dɔw a, na efre no nsamampɔw.*

40. *Mpanyimfo se, okuanyi yi sa a, wɔfa mu ye kwan.*
41. *Se abowa biara botwa m'adze ma aye me yaw a, ɔnnkɛye tse de abowa okwaku a ne nsa hyia sekan naaso ɔndɔw.*
42. *Ifua ɔdo (dwow) a fa bankye si no mpam na innyim dza ɔkɔm ba ɔbɛgye wo.*
43. *Mpanyimfo se, eduwa wɔhwɛ no nsowee ho na wɔdze edua.*
44. *Idua kɔnkɔnsa eburow a, ofifir wo nan ho.*
45. *Se inya adagyir bɔ bankye nkɔfi a, ɔbɔ sen bayer ne mbɛm.*
46. *Eburow wɔdze n'enyiwa dua.*
47. *Mpanyimfo se, wommfua ɔdze (ɔdo) wɔ kaar kwan mu.*
48. *Mpanyimfo se, se awo tse de eburow no nduae a, nkyɛ ber biara nyimpa bodua bi.*
49. *Se worufua na wɔnye wo fua a, worutu so a, wɔnye wo tu.*
50. *Nnye da a wofua ɔdo noara na wosi no mpam.*
51. *Mpanyimfo se, Gyedzi a Ananse nyae dze duaa bankye no, nnye dem gyedzi no na Kweku Tsen dze tui.*
52. *Mpanyimfo se, biribi ntsi na okuafo dua kookoo a, ɔmmɔ mbɔfor wɔ ase.*
53. *Eburow nan irunntum nnkum bɔredzewa.*
54. *Mpanyimfo se, okuanyi ye n'edwuma wɔ nokwar mu amma ɔnnhwer akatua pa.*
55. *Mpanyimfo se, obi a odua haban mu eduadzewa no, ɔnoara so na eduadzewa no sow a otwa.*
56. *Sekan a wɔdze twa bɔredze no, noara so na wɔdze twa eburow.*
57. *Wɔnam dodow dua a, wɔnam dodow bu.*

58. *Mpanyimfo se, awar nntse de haban mu nkatse na abɔ ahwe ansaana etu.*
59. *Sa w'asew kyer haban mu kusi bekye wo a, wo so tu haban mu mbire kekye no osiande hɔn nyinara ye siw do adze.*
60. *Abowa no wɔfrɛ no ɔmma boa ekuaye ɔnam nkatse a ɔmma onnyin ma wonntu ho asoɔdzen ntsi na wɔfrɛ no amoakuwa.*
61. *Wodua no dem naaso wommbu no dem.*
62. *Abofra de ɔbetsetsew muoko a wongyaa no, na ɔka n'enyi a, noara bohu kwan efi ho.*
63. *Awar tse de haban mu eduadzewa wɔnnsow pɛpɛpɛr ansaana ɔatsetsew.*
64. *Kɔɔkoraba a ɔakɛtsew aberee ato famu no se woridzi a wɔmma no ebun.*
65. *Mpanyimfo se, haban mu eburow ennyin ma woenntwa no nna ofi abowa ɔkrantse.*
66. *Mpanyimfo se, okuafo nduadzewa ntui tse de ɔwemfo a ɔwen nkuku na nkaka mbre obesi biara bi bɛsɛe anaa bɔbɔ.*
67. *Mpanyimfo se, ahoɔdzen a okuafo nya dze tu n'ekwadze no, ɔnnye ɔno na ohia dze dɔw.*
68. *Mpanyimfo se, haban mu edziban a oetwa edzi ewie no, wɔnnsan nnyi nnsie.*
69. *Okuanyi enu abe kentsɛn kor asoa no, n'enyi mumber daadze nkorkor.*
70. *ɔbaa a, onndzi afe wɔ awar ase no otu bankye a ɔnnhye mu.*
71. *Edziban no ntɔnee bu wɔ okuafo noara ne nsamu.*
72. *ɔbaa tɔn ntorba, na ɔnntɔn etudur.*
73. *ɔbaa tɔn mouko na oennya mfaso a, ne mfaso nye ɔwaabɔ.*

74. *Ɔhe do eburow ye few naaso ɔnnso tɔ.*
75. *Nkwankyen nkomire ennya bo a, na ofi ntefi.*
76. *Dasedzi ntsi na okuanyi tɔn n'adze ma obi a, odzi ano.*
77. *Okuafo tɔn n'ekuaɖze foo a, ɔhɔho tɔ bi.*
78. *Mpanyimfo se, bankye wɔ hɔ yi, wɔnntɔn mmfora eburow.*
79. *Okuanyi tɔn adze kɔ beebi a obenya mfaso.*
80. *Okuanyi tɔn no ndɔbaa wɔ n'aber mu.*
81. *Mbire bu no ntɔnee na ɔmmbu no nduae.*
82. *Okuanyi a ɔnntɔn no ndɔbaa no, nna onyim dza oeehu.*
83. *Okuanyi n'eduadzewa, ɔnoara na onyim no bo.*
84. *Haban mu owifo nntɔn ekuadze tse de owura.*
85. *Okuanyi a ɔtɔn eduadzewa a wodzi no, ɔnoara so na ɔbɔ ho ban.*
86. *Ɔwam Kasa Bireku Ata, ɔse ɔpe obi ma ɔaakese Anɔkyewa Kɔmfo de ongyaa haban mu ɔtandur ho awaawaa ntɔnee na ɔnoara mpo a ɔmeen ɔtandur n'aba kɔtoo ne yamu mpo kokoram ato ne tsir mu.*
87. *Se w'asew kyer haban mu kusi bekye wo a, wo so tu haban mu mbire kekye no osiande hɔn nyinara ye siw do adze.*
88. *Ɔhen ne ntam tse de ahabanyer mona, etɔ mu a, mmfa woho nndzi.*
89. *Kwaa a ɔannye hwee amma wo no, ɔbɔɔ bankye ampesi maa idzii.*
90. *Nnye yenkɔdɔw nkotse nye sekan na mbom se kɔtɔkoraba ka ho a, na ɔye kyeraw kyeraw.*